

सिरि उसहदेव सामिस्स णमो । सिरि गोडी - जिराउला - सव्वोदयपासणाहाणं णमो । नमोऽत्थुणं समणस्स भगवओ महइ महावीर वद्धमाण सामिस्स । सिरि गोयम - सोहम्माइ सव्व गणहराणं णमो । सिरि सुगुरु - देवाणं णमो । *५५५५ अणुओगद्वाराइं ५५५५ [सुत्तं १. मंगलं] १. नाणं पंचविहं पणत्तं । तं जहा-आभिणिबोहियणाणं १ सुयणाणं २ ओहिणाणं ३ मणपज्जवणाणं ४ केवलणाणं ५ । [सुत्ताइं २-५. आवस्सगाणुओगपइण्णा] २. तत्थ चत्ताति णाणाइं ठप्पाइं ठवणिज्जाइं, णो उद्दिस्संति णो समुद्दिस्संति णो अणुण्णविज्जंति, सुयणाणस्स उद्देसो समुद्देसो अणुण्णा अणुओगो य पवत्तइ । ३. जइ सुयणाणस्स उद्देसो समुद्देसो अणुण्णा अणुओगो य पवत्तइ, किं अंगपविट्ठस्स उद्देस्सो समुद्देसो अणुण्णा अणुओगो य पवत्तइ ? अंगबाहिरस्स उद्देसो समुद्देसो अणुण्णा अणुओगो य पवत्तइ ? अंगपविट्ठस्स वि उद्देसो समुद्देसो अणुण्णा अणुओगो य पवत्तइ, अंगबाहिरस्स वि उद्देसो समुद्देसो अणुण्णो अणुओगो य पवत्तइ । इमं पुण पट्ठवणं पडुच्च अंगबाहिरस्स उद्देसो ४ । ४. जइ अंगबाहिरस्स उद्देसो समुद्देसो अणुण्णा अणुओगो य पवत्तइ, किं कालयस्स उद्देसो समुद्देसो ४ ? उक्कालियस्स उद्देसो समुद्देसो ४ ? कालियस्स वि उद्देसो ४ उक्कालियस्स वि उद्देसो ४ । इमं पुण पट्ठवणं पडुच्च उक्कालियस्स उद्देसो ४ । ५. जइ उक्कालियस्स उद्देसो ४ किं आवस्सगस्स उद्देसो ४ ? आवस्सगवइरित्तस्स उद्देसो ४ ? आवस्सगस्स वि उद्देसो ४ आवस्सगवइरित्तस्स वि उद्देसो ४ । इमं पुण पट्ठवणं पडुच्च आवस्सगस्स अणुओगो [सुत्ताइं ६-८. आवस्सयाइपयनिकखेवपइण्णा] ६. जइ आवस्सयस्स अणुओगो आवस्सयणं किमंगं अंगाइं ? सुयक्खंधो सुयक्खंधी ? अज्झयणं अज्झयणाइं ? उद्देसगो उद्देसगा ? आवस्सयणं णो अंगं णो अंगाइं, सुयक्खंधो णो सुयक्खंधा, णो अज्झयणं अज्झयणाइं, णो उद्देसगो णो उद्देसगा । ७. तम्हा आवस्सयं णिक्खिविस्सामि, सुयं णिक्खिविस्सामि, खंधं णिक्खिविस्सामि, अज्झयणं णिग्घिविस्सामि । ८. जत्थ य जं जाणेज्जा णिक्खेवं णिक्खेवे णिरवसेसं । जत्थ वि य न जाणेज्जा चउक्कयं निक्खेवे तत्थ ॥१॥ [सुत्ताइं ९-२९. आवस्सयस्स निकखेवो] ९. से किं तं आवस्सयं ? आवस्सयं चउव्विहं पणत्तं । तं जहा-नामा-वस्सयं १ ठवणावस्सयं २ दव्वावस्सयं ३ भावावस्सयं ४ । १०. से किं तं नामवस्सयं ? २ जस्स णं जीवस्स वा अजीवस्स वा जीवाण वा अजीवाण वा तदुभयस्स वा तदुभयाण वा आवस्सये ति नामं कीरए । से तं नामावस्सयं । ११. से किं तं ठवणावस्सयं ? २ जणं कट्ठकम्मे वा चित्तकम्मे वा पोत्थकम्मे वा लेप्पकम्मे वा गंथिमे वा वेढिमे वा पूरिमे वा संघाइमे वा अक्खे वा वराडए वा एगो वा अणेगो वा सब्भावठवणाए वा असब्भावठवणाए वा आवस्सए ति ठवणा ठविज्जति । से तं ठवणावस्सयं । १२. नाम-ट्ठवणाणं को पइविसेसो ? णामं आवकहियं, ठवणा इत्तिरिया वा होज्जा आवकहिया वा । १३. से किं तं दव्वावस्सयं ? २ दुविहं पणत्तं । तं जहा-आगतो य १ णो आगतो य २ । १४. से किं तं आगतो दव्वावस्सयं ? २ जस्स णं आवस्सए ति पदं सिक्खितं ठितं जितं मितं परिजितं णामसमं घोससमं अहीणक्खरं अणच्चक्खरं अव्वाइद्धक्खरं अक्खलियं अमिलियं अवच्चामेलियं पडिपुण्णं पडिपुण्णघोसं कंठोट्ठविप्पमुक्कं गुरुवायणोवगयं । से णं तत्थ वायणाए पुच्छणाए परियट्ठणाए धम्मकहाए, णो अणुप्पेहाए । कम्हा ? “ अणुवओगो दव्व ” मिति कट्ठु । १५. [१] णेगमस्स एगो अणुवउत्तो आगमओ एगं दव्वावस्सयं, दोण्णि अणुवउत्ता आगमओ दोण्णि दव्वावस्सयाइं, तिण्णि अणुवउत्ता आगमओ तिण्णि दव्वावस्सयाइं, एवं जावइया अणुवउत्ता तावइयाइं ताइं णेगमस्स आगमओ दव्वावयाइं । [२] एवमेव ववहारस्स वि । [३] संगहस्स एगो वा अणेगा वा अणुवउत्तो वा अणुवउत्ता वा आगमओ दव्वावस्सयं वा दव्वावस्सयाणि वा से एगे दव्वावस्सए । [४] उज्जुसुयस्स एगो अणुवउत्तो आगमओ एगं दव्वावस्सयं, पुहत्तं नेच्छइ । [५] तिण्हं सद्दनयाणं जाणए अणुवउत्ते अवत्थू । कम्हा ? जइ जाणए अणुवउत्ते ण भवति । से तं आगमओ दव्वावस्सयं । १६. से किं तं नोआगतो दव्वावस्सयं ? २ तिविहं पणत्तं । तं जहा- जाणगसरीरदव्वावस्सयं १

सौजन्य :- प.पू. साध्वीश्री याज्ञलताश्री७ म.सा. ना शिष्या प.पू. सा. महाप्रज्ञाश्री७ म.सा. नी प्रेरणाथी
 इंदोरथी हस्तिनापुर शीखर७ इत्यादि यात्रा समिति ह. जयंती अेल जैन अने टीलीपभाई शाह

भवियसरीरदव्वावस्सयं २ जाणगसरीरभवियसरीरवतिरित्तं दव्वावस्सयं ३ । १७. से किं तं जाणगसरीरदव्वावस्सयं ? २ आवस्सए त्ति पदत्थाधिकारजाणगस्स जं सरीरयं ववगयचुतचावितचत्तदेहं जीवविप्पजढं सेज्जागयं वा संथारगयं वा सिद्धसिलातलगयं वा पासित्ता णं कोइ भणेज्जा अहो ! णं इमेणं सरीरसमुस्सएणं जिणदिट्ठेणं भावेणं आवस्सए त्ति पयं आघवियं पण्णवियं परूवियं दंसियं निदंसियं उवदंसियं । जहा को दिट्ठंतो ? अयं महुकुंभे आसी, अयं घयकुंभे आसी । से तं जाणगसरीरदव्वावस्सयं । १८. से किं तं भवियसरीरदव्वावस्सयं ? २ जे जीवे जोणिजम्मणिकखंते इमेणं चेव सरीरसमुस्सएणं आदत्तएणं जिणोवदिट्ठेणं भावेणं आवस्सए त्ति पयं सेयकाले सिक्खिस्सइ, न ताव सिक्खइ । जहा को दिट्ठंतो ? अयं महुकुंभे भविस्सइ, अयं घयकुंभे भविस्सइ । से तं भवियसरीरदव्वावस्सयं । १९. से किं तं जाणगसरीरभवियसरीरवतिरित्ते दव्वावस्सए ? २ तिविधे पण्णत्ते । तं जहा—लोइए १ कुप्पावयणिते २ लोउत्तरिते ३ । २०. से किं तं लोइयं दव्वावस्सयं ? २ जे इमे राईसर-तलवर-माडंबिय- कोडुंबिय-इब्भ-सेट्ठि-सेणावइ-सत्थवाहप्पभित्तिओ कल्लं पाउप्पभायाए रयणीए सुविमलाए फुल्लुप्पल-कमलकोमलुम्मिल्लियम्मि अहपंडुरे पभाए रत्तासोगप्पगासकिंसुय-सुयमुह-गुंजद्धरागसरिसे कमलागर-नलिणिसंडबोहए उट्ठियम्मि सूरे सहस्सरस्सिम्मि दिणयरे तेयसा जलंते मुहधोयण-दंतपक्खालण-तेल्ल-फणिह-सिद्धत्थय-हरियालिय-अद्दाग-धूव-पुप्फ-मल्ल-गंध-तंबोल-वत्थमाइयाइं दव्वावस्सयाइं करेत्ता ततो पच्छा रायकुलं वा देवकुलं वा आरामं वा उज्जाणं वा सभं वा पवं वा गच्छंति । से तं लोइयं दव्वावस्सयं । २१. से किं तं कुप्पावयणियं दव्वावस्सयं ? २ जे इमे चरग-चीरिग-चम्मखंडिय-मिच्छुंडग-पंडरंग-गोतम-गोव्वतिय-गिहिधम्म-धम्मचिंतग-अविरुद्ध-विरुद्ध-वुट्ठ-सावगप्पभित्तयो पासंडत्था कल्लं पाउप्पभायाए रयणीए जाव तेयसा जलंते इंदस्स वा खंदस्स वा रुद्धस्स वा सिवस्स वा वेसमणस्स वा देवस्स वा नागस्स वा जक्खस्स भूयस्स वा मुगुंदस्स वा अज्जाए वा कोट्टिकिरियाए वा उवलेवण-सम्मज्जणाऽऽवरिसण-धूव-पुप्फ-गंध-मल्लाइयाइं दव्वावस्सयाइं करेत्ति । से तं कुप्पावयणियं दव्वावस्सयं । २२. से किं तं लोगोत्तरियं दव्वावस्सयं ? २ जे इमे समणगुणमुक्कजोगी छक्कायनिरणुकंपा हया इव उद्दामा गया इव निरंकुसा घट्टा मट्टा तुप्पोट्टा पंडरपडपाउरणा जिणाणं अणाणाए सच्छंदं विहरिरुणं उभओकालं आवस्सगस्स उवट्ठंति । से तं लोगोत्तरियं दव्वावस्सयं । से तं जाणगसरीरभवियसरीरवइरित्तं दव्वावस्सयं । से तं नोआगमतो दव्वावस्सयं । से तं दव्वावस्सयं । २३. से किं तं भाववस्सयं ? २ दुविहं पण्णत्तं । तं जहा-आगमतो य १ णोआगमतो य २ । २४. से किं तं आगमतो भाववस्सयं ? २ जाणए उवउत्ते । से; तं आगमतो भाववस्सयं । २५. से किं तं नोआगमतो भाववस्सयं ? २ तिविहं पण्णत्तं । तं जहा-लोइयं १ कुप्पावयणियं २ लोगोत्तरियं ३ । २६. से किं तं लोइयं भावावस्सयं ? २ पुव्वणहे भारहं अवरणहे रामायणं । से तं लोइयं भावावस्सयं । २७. से किं तं कुप्पावयणियं भावावस्सयं ? २ जे इमे चरग-चीरिय-जाव पासंडत्था इज्जंजलि-होम-जप्प-उंदुरुक्क-नमोक्कारमाइयाइं भावावस्सयाइं करेत्ति । से तं कुप्पावयणियं भावावस्सयं । २८. से किं तं लोगोत्तरियं भाववस्सयं ? २ जण्णं इमं समणे वा समणी वा सावए वा साविया वा तच्चित्ते तम्मणे तल्लसे तयज्झवसिते तत्तिव्वज्झवसाणे तयट्ठोवउत्ते तयप्पियकरणे तब्भावणाभाविते अण्णत्थ कत्थइ मणं अकरेमाणे उभओकालं आवस्सयं करेत्ति । से तं लोगोत्तरियं भावावस्सयं । से तं नोआगमतो भावावस्सयं । से तं भावावस्सयं । २९. तस्स णं इमे एगट्ठिया णाणाघोसा णाणावंजणा णामधेज्जा भवंति । तं जहा— आवस्सयं १ अवस्सकरणिज्ज २ धुवणिग्गहो ३ विसोही य ४ । अज्झयणछक्कवग्गो ५ नाओ ६ आराहणा ७ मग्गो ८ ॥२॥ समणेण सावएण य अवस्सकायव्वयं हवति जम्हा । अंतो अहो-निसिस्स उ तम्हा आवस्सयं नाम ॥३॥ से तं आवस्सयं । [सुत्ताइं ३०.-५१. सुयस्स निक्खेवो] ३०. से किं तं सुयं ? २ चउव्विहं पण्णत्तं । तं जहा—नामसुयं १ ठवणासुयं २ दव्वसुयं ३ भावसुयं ४ । ३१. से किं तं नामसुयं ? २ जस्स णं जीवस्स वा अजीवस्स वा जीवाण वा अजीवाण वा तदुभयस्स वा तदुभयाण वा सुए इ नामं कीरति । से तं नामसुयं । ३२. से किं तं ठवणासुयं ? २ जण्ण कट्टकम्मे वा जाव सुए इ ठवणा ठविज्जति । से तं ठवणासुयं । ३३. नाम-ठवणाणं को पतिविसेसो ? नामं आवकहियं, ठवणा इत्तिरिया वा होज्जा आवकहिया वा । ३४. से किं तं दव्वसुयं ? २ दुविहं पण्णत्तं । तं जहा—आगमतो य १ नोआगमतो य २ । ३५. से किं तं आगमतो दव्वसुयं ? २ जस्स णं सुए त्ति पयं सिक्खियं ठियं जियं परिजियं

जाव कम्हा ? जइ जाणते अणुवउत्ते ण भवइ । से तं आगमतो दव्वसुयं । ३६. से किं तं णोआगमतो दव्वसुयं ? २ तिविहं पन्नत्तं । तं जहा—जाणयसरीरदव्वसुयं १ भवियसरीरदव्वसुयं २ जाणयसरीरभवियसरीरइरित्तं दव्वसुयं ३ । ३७. से किं तं जाणयसरीरदव्वसुतं ? २ सुतत्तिपदत्थाहिकारजाणयस्स जं सरीरयं ववगयचुत्तचित्तदेहं जीवविप्पजहं सेज्जागयं वा संथारगयं वा सिद्धसिलायलगयं वा, अहो ! णं इमेणं सरीरसमुस्सएणं जिणदिट्ठेणं भावेणं सुए इ पयं आघवियं पण्णवियं परूवियं दंसियं निदंसियं उवदंसियं । जहा को दिट्ठंतो ? अयं मधुकुंभे आसी, अयं घयकुंभे आसी । से तं जाणयसरीरदव्वसुतं । ३८. से किं तं भवियसरीरदव्वसुतं ? २ जे जीवे जोणीजम्मणनिक्खंतं इमेणं चेव सरीरसमुस्सएणं आदत्तएणं जिणोवइट्ठेणं भावेणं सुए इ पयं सेकाले सिक्खिस्सति, ण ताव सिक्खति । जहा को दिट्ठंतो ? अयं मधुकुंभे भविस्सति, अयं घयकुंभे भविस्सति । से तं भवियसरीरदव्वसुतं । ३९. से किं तं जाणयसरीरभवियसरीरवतिरित्तं दव्वसुतं ? २ पत्तयपोत्थयलिहियं । ४०. अहवा सुत्तं पंचविहं पण्णत्तं । तं जहा—अंडयं १ बोंडयं २ कीडयं ३ वालयं ४ वक्कयं ५ । ४१. से किं तं अंडयं ? अंडयं हंसगब्भादि । से तं अंडयं । ४२. से किं तं बोंडयं । बोंडयं फलिहमादि । से तं बोंडयं ॥ ४३. से किं तं कीडयं ? कीडयं पंचविहं पण्णत्तं । तं जहा—पट्टे १ मलए २ अंसुए ३ चीणंसुए ४ किमिरागे ५ । से तं कीडयं । ४४. से किं तं वालयं ? वालयं पंचविहं पण्णत्तं । तं जहा—उण्णिए १ उट्टिए २ मियलोमिए ३ कुतवे ४ किट्टिसे ५ । से तं वालयं । ४५. से किं तं वक्कयं ? वक्कयं सणमाई से तं वक्कयं । से तं जाणगसरीरभवियसरीरवतिरित्तं दव्वसुयं । से तं नोआगमतो दव्वसुयं । से तं दव्वसुयं । ४६. से किं तं भावसुयं ? २ दुविहं पन्नत्तं । तं जहा—आगमतो य १ नोआगमतो य २ । ४७. से किं तं आगमतो भावसुयं ? २ जाणते उवउत्ते । से तं आगमतो भावसुयं । ४८. से किं तं नोआगमतो भावसुयं ? २ दुविहं पन्नत्तं । तं जहा— लोइयं १ लोउत्तरियं च २ । ४९. से किं लोइयं भावसुयं ? २ जं इमं अण्णाणिएहिं मिच्छदिट्ठीहिं सच्छंदबुद्धि-मइविगप्पियं । तं जहा— भारहं रामायणं हंभीमासुरुक्कं कोडिल्लयं घोडमुहं सगभद्दिआओ कप्पासियं नागसुहुमं कणगसत्तरी वइसेसियं बुद्धवयणं वेसियं काविलं लोयाययं सट्ठित्तं माढरं पुराणं वागरणं नाडगादी, अहवा बावत्तरिकलाओ चत्तारि य वेदा संगोवंगा । से तं लोइयं भावसुयं । ५०. से किं तं लोकोत्तरियं भावसुयं ? २ जं इमं अरहंतेहिं भगवंतेहिं उप्पन्ननाण-दंसणधरेहिं तीत-पडुप्पन्न-मणागतजाणएहिं सव्वन्नूहिं सव्वदरिसीहिं तेलोक्कचहिय-महिय-पूइएहिं अप्पडिहयवरनाण-दंसणधरेहिं पणीतं दुवालसंगं गणिपिडगं । तं जहा-अयारो १ सूयगडो २ ठाणं ३ समवाओ ४ वियाहपण्णत्ती ५ नायधम्मकहाओ ६ उवासगदसाओ ७ अंतगडदसाओ ८ अणुत्तरोववाइयदसाओ ९ पण्हावागरणाइं १० विवागसुयं ११ दिट्ठिवाओ १२ य । से तं लोकोत्तरियं भावसुयं । से तं नोआगमतो भावसुयं । से तं भावसुयं । ५१. तस्स णं इमे एगट्टिया नाणाघोसा नाणावंजणा नामधेज्जा भवंति । तं जहा— सुय सुत्तं गंथ सिद्धंत सासणे आण वयण उवदेसे । पण्णवण आगमे या एगट्टा पज्जवा सुत्ते ॥४॥ से तं सुयं । [सुत्ताइं ५२-७२. खंधस्स निक्खेवो] ५२. से किं तं खंधे ? २ चउव्विहे पण्णत्ते । तं जहा-नामखंधे १ ठवणाखंधे २ दव्वखंधे ३ भावखंधे ४ । ५३. से किं तं नामखंधे ? २ जस्स णं जीवस्स वा अजीवस्स वा जाव खंधे ति णामं कज्जति । से तं णामखंधे । ५४. से किं तं ठवणाखंधे ? २ जण्णं कट्टकम्मे वा जाव खंधे इ ठवणा ठविज्जति । से तं ठवणाखंधे । ५५. णाम-ठवणाणं को पतिविसेसो ? नामं आवकहियं, ठवणा इत्तिरिया वा होज्जा आवकहिया वा । ५६. से किं तं दव्वखंधे ? २ दुविहे पण्णत्ते । तं जहा—आगमतो य १ नोआगमतो य २ । ५७. [१] से किं तं आगमओ दव्वखंधे ? २ जस्स णं खंधे इ पयं सिक्खियं ठियं जियं मियं जाव णेगमस्स एगे अणुवउत्ते आगमओ एगे दव्वखंधे, दो अणुवउत्ता आगमओ दो [ण्णि] दव्वखंधाइं, तिण्णि अणुवउत्ता आगमओ तिण्णि दव्वखंधाइं, एवं जावइया अणुवउत्ता तावइयाइं ताइं दव्वखंधाइं । [२] एवमेव ववहारस्स वि । [३] संगहस्स एगो वा अणेगा वा अणुवउत्ता वा अणुवउत्ता वा दव्वखंधे वा दव्वखंधाणि वा से एगे दव्वखंधे । [४] उज्जुसुयस्स एगो अणुवउत्तो आगमओ एगे दव्वखंधे, पुहत्तं णेच्छति । [५] तिण्णं सट्ठयाणं जाणए अणुवउत्ते अवत्थू । कम्हा ? जइ जाणए कहां अणुवउत्ते भवति ? । से तं आगमओ दव्वखंधे । ५८. से किं तं णोआगमतो दव्वखंधे ? २ तिविहे पण्णत्ते । तं जहा—जाणगसरीरदव्वखंधे १ भवियसरीरदव्वखंधे २ जाणगसरीरभवियसरीरवइरित्ते दव्वखंधे ३ । ५९. से किं तं जाणगसरीरदव्वखंधे ? २

खंधे इ पयत्थाहिगारजाणगस्स जाव खंधे इ पयं आघवियं पण्णवियं परूवियं जाव से तं जाणगसरीरदव्वखंधे । ६०. से किं तं भवियसरीरदव्वखंधे ? २ जे जीवे जोणिजम्मणनिकखंते जाव खंधे इ पयं सेकाले सिक्खिस्सइ । जहा को दिट्ठंतो ? अयं महुकुंमे भविस्सइ, अयं घयंकुंभे भविस्सति । से तं भवियसरीरदव्वखंधे । ६१. से किं तं जाणगसरीरभवियसरीरवइरित्ते दव्वखंधे ? २ तिविहे पण्णत्ते । तं जहा-सचित्ते १ अचित्ते २ मीसए ३ । ६२. से किं तं सचित्तदव्वखंधे ? २ अणेगविहे पण्णत्ते । तं जहा-हयखंधे गयखंधे किन्नरखंधे किंपुरिसखंधे महोरगखंधे उसभखंधे । से तं सचित्त-दव्वखंधे । ६३. से किं तं अचित्तदव्वखंधे ? २ अणेगविहे पण्णत्ते । तं जहा-दुपएसिए खंधे तिपएसिए खंधे जाव दसपएसिए खंधे संखेज्जपएसिए खंधे असंखेज्जपएसिए खंधे अणंतपएसिए खंधे । से तं अचित्तदव्वखंधे । ६४. से किं तं मीसदव्वखंधे ? २ अणेगविहे पण्णत्ते । तं जहा-सेणाए अग्गिमखंधे सेणाए मज्झिमखंधे सेणाए अच्छिमखंधे । से तं मीसदव्वखंधे । ६५. अहवा जाणगसरीरभवियसरीरवतिरित्ते दव्वखंधे तिविहे पन्नत्ते । तं जहा-कसिणखंधे १ अकसिणखंधे २ अणेगदवियखंधे ३ । ६६. से किं तं कसिणखंधे ? २ से चेव हयक्खंधे गयक्खंधे जाव उसभखंधे । से तं कसिणखंधे । ६७. से किं तं अकसिणखंधे ? २ से चेव दुपएसियादी खंधे जाव अणंतपदेसिए खंधे । से तं अकसिणखंधे । ६८. से किं तं अणेगदवियखंधे ? २ तस्सेव देसे अवचित्ते तस्सेव देसे उवचिए । से तं अणेगदवियखंधे । से तं जाणगसरीरभवियसरीरवतिरित्ते दव्वखंधे । से तं नोआगतो दव्वखंधे । से तं दव्वखंधे । ६९. से किं तं भावखंधे ? २ दुविहे पण्णत्ते । तं जहा-आगतो य १ नोआगतो य २ । ७०. से किं तं आगतो भावखंधे ? २ जाणए उवउत्ते । से तं आगतो भावखंधे । ७१. से किं तं नोआगतो भावखंधे ? २ एसिं चेव सामाइयमाइयाणं छण्हं अज्झयणाणं समुदयसमिइसमागमेणं निप्पन्ने आवस्सगसुयक्खंधे भावखंधे त्ति लब्भइ । से तं नोआगतो भावखंधे । से तं भावखंधे । ७२. तस्स णं इमे एगट्टिया नाणाघोसा नाणावज्जा नामधेज्जा भवंति । तं जहा- गण काय निकाय खंधं वग्गरासी पुंजे य पिंड नियरे य । संघाय आकुल समूह भावखंधस्स पज्जाया ॥५॥ से तं खंधे । **[सुत्तं ७३. आवस्सगस्स अत्थाहिगारा]** ७३. आवस्सगस्स णं इमे अत्थाहिगारा भवंति । तं जहा- सावज्जजोगविरती १ उक्कित्तण २ गुणवओ य पडिवत्ती ३ । खलियस्स निंदणा ४ वणतिगिच्छ ५ गुणधारणा ६ चेव ॥६॥ **[सुत्तं ७४. आवस्सगस्स अज्झयणाइं]** ७४. आवस्सगस्स एसो पिंडत्थो वणितो समासेणं । एत्तो एक्केकं पुण अज्झयणं कित्तइस्सामि ॥७॥ तं जहा-सामाइयं १ चउवीसत्थओ २ वंदणं ३ पडिक्कमणं ४ काउस्सग्गो ५ पच्चक्खाणं ६ । **[सुत्तं ७५. अणुओगदाराणामसमुक्कित्तणं]** ७५. तत्थ पढमज्झयणं सामाइयं । तस्स णं इमे चत्तारि अणुओगदारा भवंति । तं जहा-उवक्कमे १ णिक्खेवे २ अणुगमे ३ णए ४ । **[सुत्ताइं ७६-९१. उवक्कमाणुओगदारं]** ७६. से किं तं उवक्कमे ? उवक्कमे छव्विहे पण्णत्ते । तं जहा- नामोवक्कमे १ ठवणोवक्कमे २ दव्वोवक्कमे ३ खेत्तोवक्कमे ४ कालोवक्कमे ५ भावोवक्कमे ६ । ७७. नाम-ठवणाओ गयाओ । ७८. से किं तं दव्वोवक्कमे ? २ दुविहे पण्णत्ते । तं जहा-आगतो य १ नोआगतो य २ जाव जाणगसरीरभवियसरीरवतिरित्ते दव्वोवक्कमे तिविहे पण्णत्ते । तं जहा-सचित्ते १ अचित्ते २ मीसए ३ । ७९. से किं तं सचित्तदव्वोवक्कमे ? २ तिविहे पण्णत्ते । तं जहा- दुपयाणं १ चउप्पयाणं २ अपयाणं ३ । एक्केके दुविहे-परिकम्मे य १ वत्थुविणासे य २ । ८०. से किं तं दुपए उवक्कमे ? २ दुपयाणं नडाणं नट्टाणं जल्लाणं मल्लाणं मुठियाणं वेलंबगाणं कहगाणं पवगाणं लासगाणं आइक्खगाणं लंखाणं मंखाणं तूणइल्लाणं तुंबवीणियाणं कायाणं मागहाणं । से तं दुपए उवक्कमे । ८१. से किं तं चउप्पए उवक्कमे ? २ चउप्पयाणं आसाणं हत्थीणं इच्चाइ । से तं चउप्पए उवक्कमे । ८२. से किं तं अपए वक्कमे ? २ अपयाणं अंमाणं अंबाडगाणं इच्चाइ । से तं अपए उवक्कमे । से तं सचित्तदव्वोवक्कमे । ८३. से किं तं अचित्तदव्वोवक्कमे ? २ खंडाईणं गुडादीणं मत्स्यंडीणं । से तं अचित्तदव्वोवक्कमे । ८४. से किं तं मीसए दव्वोवक्कमे ? २ से चेव थासग-आयंसगाइमंडित्ते आसादी । से तं मीसए दव्वोवक्कमे से तं जाणयसरीरभवियसरीरवइरित्ते दव्वोवक्कमे । से तं नोआगतो दव्वोवक्कमे । से तं दव्वोवक्कमे । ८५. से किं तं खेत्तोवक्कमे ? २ जण्णं हल-कुलियादीहिं खेत्ताइं उवक्कामिज्जति । से तं खेत्तोवक्कमे । ८६. से किं तं कालोवक्कमे ? २ जं णं नालियादीहिं कालस्सोवक्कमणं कीरति । से तं कालोवक्कमे ।

८७. से किं तं भावोक्कमे ? २ दुविहे पण्णत्ते । तं जहा-आगमतो य १ नोआगमतो य २ । ८८. [से किं तं] आगमओ भावोक्कमे ? २ जाणए उवउत्ते । से तं आगमओ भावोक्कमे । ८९. [से किं तं] नोआगमतो भावोक्कमे ? २ दुविहे पण्णत्ते । तं जहा-पसत्थे य १ अपसत्थे य २ । ९०. [से किं तं] अपसत्थे भावोक्कमे ? २ डोडिणि-गणिया-ऽमच्चाईणं । से तं अपसत्थे भावोक्कमे । ९१. [से किं तं] पसत्थे भावोक्कमे ? २ गुरुमादीणं । [से तं पसत्थे भावोक्कमे] । से तं नोआगमतो भावोक्कमे । से तं भावोक्कमे । [सुत्ताइं ९२-५३३. पयारंतरेण उवक्कमदारं] ९२. अहवा उवक्कमे छव्विहे पण्णत्ते । तं जहा-आणुपुव्वी १ नामं २ पभाणं ३ वत्तव्वया ४ अत्थाहिगारे ५ समयारे ६ । [सुत्ताइं ९३-२०७. उवक्कमाणुओगदारे आणुपुव्वीदारं] ९३. से किं तं आणुपुव्वी ? २ दसविहा पण्णत्ता । तं जहा-नामा-णुपुव्वी १ ठवणाणुपुव्वी २ दव्वाणुपुव्वी ३ खेत्ताणुपुव्वी ४ कालाणुपुव्वी ५ उक्कित्ताणुपुव्वी ६ गणणाणुपुव्वी ७ संठाणाणुपुव्वी ८ सामायारियाणुपुव्वी ९ भावाणुपुव्वी १० । ९४. से किं तं णामाणुपुव्वी ? नाम-ठवणाओ तहेव । ९५. दव्वाणुपुव्वी जाव से किं तं जाणगसरीरभवियसरीरवइरित्ता दव्वाणुपुव्वी ? २ दुविहा पण्णत्ता । तं जहा-उवणिहिया य १ अणोवणिहिया य २ । ९६. तत्थ णं जा सा उवणिहिया सा ठप्पा । ९७. तत्थ णं जा सा अणोवणिहिया सा दुविहा पन्नत्ता । तं जहा-णेगम-ववहाराणं १ संगहस्स य २ । ९८. से किं तं णेगम-ववहाराणं अणोवणिहिया दव्वाणुपुव्वी ? २ पंचविहा पण्णत्ता । तं जहा-अट्टपयपरूवणया १ भंगसमुक्कित्तणया २ भंगोवदंसणया ३ समयारे ४ अणुगमे ५ । ९९. से किं तं णेगम-ववहाराणं अट्टपयपरूवणया ? २ तिपएसिए आणुपुव्वी, चउपएसिए आणुपुव्वी जाव दसपएसिए आणुपुव्वी, संखेज्जपदेसिए आणुपुव्वी, असंखेज्जपदेसिए आणुपुव्वी, अणंतपएसिए आणुपुव्वी । परमाणुपोग्गले अणाणुपुव्वी । दुपएसिए अवत्तव्वए । तिपएसिया आणुपुव्वीओ जाव अणंतपएसिया आणुपुव्वीओ । परमाणुपोग्गला अणाणुपुव्वीओ । दुपएसिया अवत्तव्वगाइं । से तं णेगम-ववहाराणं अट्टपयपरूवणया । १००. एयाए णं णेगम-ववहाराणं अट्टपयपरूवणयाए किं पओयणं ? एयाए णं णेगम-ववहाराणं अट्टपयपरूवणयाए भंगसमुक्कित्तणया कीरइ । १०१. से किं तं णेगम-ववहाराणं भंगसमुक्कित्तणया ? २ अत्थि आणुपुव्वी १ अत्थि अणाणुपुव्वी २ अत्थि अवत्तव्वए ३ अत्थि आणुपुव्वीओ ४ अत्थि अणाणुपुव्वीओ ५ अत्थि अवत्तव्वयाइं ६ । अहवा अत्थि आणुपुव्वी य अणाणुपुव्वी य १ अहवा अत्थि आणुपुव्वी य अणाणुपुव्वीओ य २ अहवा अत्थि आणुपुव्वीओ य अणाणुपुव्वी य ३ अहवा अत्थि आणुपुव्वीओ य अणाणुपुव्वीओ य ट्क, अहवा अत्थि आणुपुव्वी य अवत्तव्वए य १ अहवा अत्थि आणुपुव्वी य अवत्तव्वयाइं च २ अहवा अत्थि आणुपुव्वीओ य अवत्तव्वए य ३ अहवा अत्थि आणुपुव्वीओ य अवत्तव्वयाइं च ट्क, ट्क इति चतुःसंख्याद्योतकोऽक्षराङ्को ज्ञेयः । अहवा अत्थि अणाणुपुव्वी य अवत्तव्वए य १ अहवा अत्थि अणाणुपुव्वी य अवत्तव्वयाइं च २ अहवा अत्थि अणाणुपुव्वीओ य अवत्तव्वए य ३ अहवा अत्थि अणाणुपुव्वीओ य अवत्तव्वयाइं च ट्क । अहवा अत्थि आणुपुव्वी य अणाणुपुव्वी य अवत्तव्वए य १ अहवा अत्थि आणुपुव्वी य अणाणुपुव्वी य अवत्तव्वयाइं च २ अहवा अत्थि आणुपुव्वी य अणाणुपुव्वीओ य अवत्तव्वए य ३ अहवा अत्थि आणुपुव्वी य अणाणुपुव्वीओ य अवत्तव्वयाइं च ट्क अहवा अत्थि आणुपुव्वीओ य अणाणुपुव्वी य अवत्तव्वए य ५ अहवा अत्थि आणुपुव्वीओ य अणाणुपुव्वी य अवत्तव्वयाइं च ६ अहवा अत्थि आणुपुव्वीओ य अणाणुपुव्वीओ य अवत्तव्वए य ७ अहवा अत्थि आणुपुव्वीओ य अणाणुपुव्वीओ य अवत्तव्वयाइं च ८, एए अट्टभंगा । एवं सव्वे वि छव्वीसं भंगा २६ । से तं नेगम-ववहाराणं भंगसमुक्कित्तणया । १०२. एयाए णं णेगम-ववहाराणं भंगसमुक्कित्तणयाए किं पओयणं ? एयाए णं णेगम-ववहाराणं भंगसमुक्कित्तणयाए भंगोवदंसणया कीरइ । १०३. से किं तं णेगम-ववहाराणं भंगोवदंसणया ? २ तिपदेसिए आणुपुव्वी १ परमाणुपोग्गले अणाणुपुव्वी २ दुपदेसिए अवत्तव्वए ३ तिपदेसिया आणुपुव्वीओ ४ परमाणुपोग्गला अणाणुपुव्वीओ ५ दुपदेसिया अवत्तव्वयाइं ६ । अहवा तिपदेसिए य परमाणुपोग्गले य आणुपुव्वी य अणाणुपुव्वी य १ अहवा तिपदेसिए य परमाणुपोग्गला य आणुपुव्वी य अणाणुपुव्वीओ य २ अहवा तिपदेसिया य परमाणुपोग्गले य आणुपुव्वीओ य अणाणुपुव्वी य ३ अहवा तिपदेसिया य परमाणुपोग्गला य आणुपुव्वीओ य अणाणुपुव्वीओ य ४, अहवा तिपदेसिए य दुपदेसिए

य आणुपुव्वी य अवत्तव्वए य १ अहवा तिपदेसिए य दुपदेसिया य आणुपुव्वी य अवत्तव्वयाइं च २ अहवा तिपदेसिया य दुपदेसिए य आणुपुव्वीओ य अवत्तव्वए य ३ अहवा तिपदेसिया य दुपदेसिया य आणुपुव्वीओ य अवत्तव्वयाइं च ४, अहवा परमाणुपोग्गले य दुपदेसिए य अणुपुव्वी य अवत्तव्वए य १ अहवा परमाणुपोग्गले य दुपदेसिया य अणुपुव्वी य अवत्तव्वयाइं च २ अहवा परमाणुपोग्गला य दुपदेसिए य अणुपुव्वीओ य अवत्तव्वए य ३ अहवा परमाणुपोग्गला य दुपदेसिया य अणुपुव्वीओ य अवत्तव्वयाइं च ४ । अहवा तिपदेसिए य परमाणुपोग्गले य दुपदेसिए य आणुपुव्वी य अणुपुव्वी य अवत्तव्वए य १ अहवा तिपदेसिए य परमाणुपोग्गले य दुपदेसिया य आणुपुव्वी य अणुपुव्वी य अवत्तव्वयाइं च २ अहवा तिपदेसिए य परमाणुपोग्गला य दुपदेसिए य आणुपुव्वी य अणुपुव्वीओ य अवत्तव्वए य ३ अहवा तिपदेसिए य परमाणुपोग्गला य दुपदेसिया य आणुपुव्वी य अणुपुव्वीतो य अवत्तव्वयाइं च ४ अहवा तिपदेसिया य परमाणुपोग्गले य दुपदेसिए य आणुपुव्वीओ य अणुपुव्वी य अवत्तव्वए य ५ अहवा तिपदेसिया य परमाणुपोग्गले य दुपदेसिया य आणुपुव्वीओ य अणुपुव्वी य अवत्तव्वयाइं च ६ अहवा तिपदेसिया य परमाणुपोग्गला य दुपदेसिए य आणुपुव्वीओ य अणुपुव्वीओ य अवत्तव्वयाइं च ८ । से तं नेगम-ववहाराणं भंगोवदंसणया । १०४. [१] से किं तं समोयारे ? २ नेगम-ववहाराणं आणुपुव्वीदव्वाइं कहिं समोयरंति ? किं आणुपुव्वीदव्वेहिं समोयरंति ? अणुपुव्वीदव्वेहिं समोयरंति ? अवत्तव्वयदव्वेहिं समोयरंति ? नेगम-ववहाराणं आणुपुव्वीदव्वाइं आणुपुव्वीदव्वेहिं समोयरंति, णो अणुपुव्वीदव्वेहिं समोयरंति, नो अवत्तव्वयदव्वेहिं समोयरंति । [२] नेगम-ववहाराणं अणुपुव्वीदव्वाइं कहिं समोयरंति ? किं आणुपुव्वीदव्वेहिं समोयरंति ? अणुपुव्वीदव्वेहिं समोयरंति ? अवत्तव्वयदव्वेहिं समोयरंति ? २ णो आणुपुव्वीदव्वेहिं समोयरंति, अणुपुव्वीदव्वेहिं समोयरंति, णो अवत्तव्वयदव्वेहिं समोयरंति । [३] नेगम-ववहाराणं अवत्तव्वयदव्वाइं कहिं समोयरंति ? किं आणुपुव्वीदव्वेहिं समोयरंति ? अणुपुव्वीदव्वेहिं समोयरंति ? अवत्तव्वयदव्वेहिं समोयरंति ? २ नो आणुपुव्वीदव्वेहिं समोयरंति, णो अणुपुव्वीदव्वेहिं समोयरंति, अवत्तव्वयदव्वेहिं समोयरंति । से तं समोयारे । १०५. से किं तं अणुगमे ? २ णवविहे पणत्ते । तं जहा-संतपयपरूवयणा १ दव्वपमाणं च २ खेत्त ३ फुसणा य ४ । कालो य ५ अंतरं ६ भाग ७ भाव ८ अप्पाबहुं ९ चेव ॥८॥१०६. [१] नेगम-ववहाराणं आणुपुव्वीदव्वाइं किं अत्थि णत्थि ? णियमा अत्थि । [२] नेगम-ववहाराणं अणुपुव्वीदव्वाइं किं अत्थि णत्थि ? णियमा अत्थि । [३] नेगम-ववहाराणं अवत्तव्वगदव्वाइं किं अत्थि णत्थि ? नियमा अत्थि । १०७. [१] नेगम-ववहाराणं आणुपुव्वीदव्वाइं किं संखेज्जाइं असंखेज्जाइं अणंताइं ? नो संखेज्जाइं नो असंखेज्जाइं अणंताइं । [२] एवं दोण्णि वि । १०८. [१] नेगम-ववहाराणं आणुपुव्वीदव्वाइं लोग्गस्स कतिभागे होज्जा ? किं संखेज्जइभागे होज्जा ? असंखेज्जइभागे होज्जा ? संखेज्जेसु भागेषु होज्जा ? असंखेज्जेस्सु भागेषु होज्जा ? सव्वलोए होज्जा ? एगदव्वं पडुच्च लोग्गस्स संखेज्जइभागे वा होज्जा असंखेज्जइभागे वा होज्जा संखेज्जेसु भागेषु वा होज्जा असंखेज्जेसु भागेषु वा होज्जा सव्वलोए वा होज्जा, नाणादव्वाइं पडुच्च नियमा सव्वलोए होज्जा । [२] नेगम-ववहाराणं अणुपुव्वीदव्वाइं किं लोग्गस्स संखेज्जइभागे होज्जा ? असंखेज्जइभागे होज्जा ? संखेज्जेसु भागेषु होज्जा ? असंखेज्जेसु भागेषु होज्जा ? सव्वलोए वा होज्जा ? एगदव्वं पडुच्च नो संखेज्जइभागे होज्जा असंखेज्जइभागे होज्जा नो संखेज्जेसु भागेषु होज्जा नो असंखेज्जेसु भागेषु होज्जा नो सव्वलोए होज्जा, नाणादव्वाइं पडुच्च नियमा सव्वलोए होज्जा । [३] एवं अवत्तव्वगदव्वाणि वि । १०९. [१] नेगम-ववहाराणं आणुपुव्वीदव्वाइं लोग्गस्स किं संखेज्जइभागं फुसंति ? असंखेज्जइभागं फुसंति ? संखेज्जे भागे फुसंति ? असंखेज्जे भागे फुसंति ? नो सव्वलोगं फुसंति ? एगदव्वं पडुच्च लोग्गस्स संखेज्जइभागं वा फुसंति असंखेज्जइभागं वा फुसंति संखेज्जे वा भागे फुसंति असंखेज्जे वा भागे फुसंति सव्वलोगं वा फुसंति, नाणादव्वाइं पडुच्च नियमा सव्वलोगं फुसंति । [२] नेगम-ववहाराणं अणुपुव्वीदव्वाणं पुच्छा, एगं दव्वं पडुच्च नो संखेज्जइभागं फुसंति असंखेज्जइभागं फुसंति नो संखेज्ज भागे फुसंति नो असंखेज्जे भागे फुसंति नो सव्वलोगं फुसंति, नाणादव्वाइं पडुच्च नियमा सव्वलोगं फुसंति । [३] एवं अवत्तव्वगदव्वाणि वि भाणियव्वाणि । ११०. [१] नेगम-ववहाराणं आणुपुव्वीदव्वाइं कालओ केवचिरं होति ? एगं दव्वं पडुच्च जहण्णेणं एगं समयं उक्कोसेणं असंखेज्जं कालं, नाणादव्वाइं पडुच्च णियमा सव्वद्धा । [२] एवं दोन्नि वि ।

१११. [१] णेगम-ववहाराणं आणुपुव्विदव्वाणमंतरं कालतो केवचिरं होति ? एगं दव्वं पडुच्च जहण्णेणं एगं समयं उक्कोसेणं अणंतं कालं, नाणादव्वाइं पडुच्च णत्थि अंतरं । [२] णेगम-ववहाराणं अणाणुपुव्विदव्वाणं अंतरं कालतो केवचिरं होइ ? एगं दव्वं पडुच्च जहण्णेणं एगं समयं उक्कोसेणं असंखेज्जं कालं, नाणादव्वाइं पडुच्च णत्थि अंतरं । [३] णेगम-ववहाराणं अवत्तव्वगदव्वाणं अंतरं कालतो केवचिरं होति ? एगं दव्वं पडुच्च जहण्णेणं एगं समयं उक्कोसेणं अणंतं कालं, नाणादव्वाइं पडुच्च णत्थि अंतरं । ११२. [१] णेगम-ववहाराणं आणुपुव्वीदव्वाइं सेसदव्वाणं कइभागे होज्जा ? किं संखेज्जइभागे होज्जा ? असंखेज्जइभागे होज्जा ? संखेज्जेसु भागेसु होज्जा ? असंखेज्जेसु भागेसु होज्जा ? नो संखेज्जइभागे होज्जा नो असंखेज्जइभागे होज्जा नो संखेज्जेसु भागेसु होज्जा नियमा असंखेज्जेसु भागेसु होज्जा । [२] णेगम-ववहाराणं अणाणुपुव्वीदव्वाइं सेसदव्वाणं कइभागे होज्जा ? किं संखेज्जइभागे होज्जा ? असंखेज्जइभागे होज्जा ? संखेज्जेसु भागेसु होज्जा ? असंखेज्जेसु भागेसु होज्जा ? नो संखेज्जइभागे होज्जा असंखेज्जइभागे होज्जा नो संखेज्जेसु भागेसु होज्जा नो असंखेज्जेसु भागेसु होज्जा । [३] एवं अवत्तव्वगदव्वाणि वि । ११३. [१] णेगम-ववहाराणं आणुपुव्वीदव्वाइं कयरम्मि भावे होज्जा ? किं उदइए भावे होज्जा ? उवसमिए भावे होज्जा ? खाइए भावे होज्जा ? खाओवसमिए भावे होज्जा ? पारिणामिए भावे होज्जा ? सन्निवाइए भावे होज्जा ? णियमा साइपारिणामिए भावे होज्जा । [२] अणाणुपुव्विदव्वाणि अवत्तव्वयदव्वाणि य एवं चेव भाणियव्वाणि । ११४. [१] एएसि णं भंते ! णेगम-ववहाराणं आणुपुव्वीदव्वाणं अणाणुपुव्वीदव्वाणं अवत्तव्वयदव्वाण य दव्वट्टयाए पएसट्टयाए दव्वट्ट-पएसट्टयाए कयरे कयरेहिंतो अप्पा वा बहुया वा तुल्ला वा विसेसाहिया वा ? गोतमा ! सव्वत्थोवाइं णेगम-ववहाराणं अवत्तव्वयदव्वाइं दव्वट्टयाए, अणाणुपुव्वीदव्वाइं दव्वट्टयाए विसेसाहियाइं, आणुपुव्वीदव्वाइं दव्वट्टयाए असंखेज्जगुणाइं । [२] पएसट्टयाए णेगम-ववहाराणं सव्वत्थोवाइं अणाणुपुव्वीदव्वाइं अपएसट्टयाए, अवत्तव्वयदव्वाइं पएसट्टयाए विसेसाहियाइं, आणुपुव्वीदव्वाइं पएसट्टयाए अणंतगुणाइं । [३] दव्वट्ट-पएसट्टयाए सव्वत्थोवाइं णेगम-ववहाराणं अवत्तव्वगदव्वाइं दव्वट्टयाए, अणाणुपुव्वीदव्वाइं दव्वट्टयाए अपएसट्टयाए विसेसाहियाइं, अवत्तव्वगदव्वाइं पएसट्टयाए विसेसाहियाइं, आणुपुव्वीदव्वाइं दव्वट्टयाए असंखेज्जगुणाइं, ताइं चेव पएसट्टयाए अणंतगुणाइं । से तं अणुगमे । से तं णेगम-ववहाराणं अणोवणिहिया दव्वाणुपुव्वी । ११५. से किं तं संगहस्स अणोवणिहिया दव्वाणुपुव्वी ? २ पंचविहा पणत्ता । तं जहा-अट्टपयपरूवणया १ भंगसमुक्कित्तणया २ भंगोवदंसणया ३ समयारे ४ अणुगमे ५ । ११६. से किं तं संगहस्स अट्टपयपरूवणया ? २ तिपएसिया आणुपुव्वी चउप्पएसिया आणुपुव्वी जाव दसपएसिया आणुपुव्वी संखिज्जपएसिया आणुपुव्वी असंखिज्जपएसिया आणुपुव्वी अणंतपदेसिया आणुपुव्वी, परमाणुपोग्गला अणाणुपुव्वी, दुपदेसिया अवत्तव्वए । से तं संगहस्स अट्टपयपरूवणया । ११७. एयाए णं संगहस्स अट्टपयपरूवणयाए किं पओयणं ? एयाए णं संगहस्स अट्टपयपरूवणयाए संगहस्स भंगसमुक्कित्तणया कीरइ । ११८. से किं तं संगहस्स भंगसमुक्कित्तणया ? २ अत्थि आणुपुव्वी १ अत्थि अणाणुपुव्वी २ अत्थि अवत्तव्वए ३, अहवा अत्थि आणुपुव्वी य अणाणुपुव्वी य ४ अहवा अत्थि आणुपुव्वी य अवत्तव्वए य ५ अहवा अत्थि अणाणुपुव्वी य अवत्तव्वए य ६, अहवा अत्थि आणुपुव्वी य अणाणुपुव्वी य अवत्तव्वए य ७ । एवं एए सत्त भंगा । से तं संगहस्स भंगसमुक्कित्तणया । ११९. एयाए णं संगहस्स भंगसमुक्कित्तणयाए किं पओयणं ? एयाए णं संगहस्स भंगसमुक्कित्तणयाए संगहस्स भंगोवदंसणया कज्जति । १२०. से किं तं संगहस्स भंगोवदंसणया ? २ तिपएसिया आणुपुव्वी १ परमाणुपोग्गला अणाणुपुव्वी २ दुपएसिया अवत्तव्वए ३, अहवा तिपएसिया य परमाणुपोग्गला य आणुपुव्वी य अणाणुपुव्वी य ४ अहवा तिपएसिया य दुपएसिया य आणुपुव्वी य अवत्तव्वए य ५ अहवा परमाणुपोग्गला य दुपएसिया य अणाणुपुव्वी य अवत्तव्वए य ६, अहवा तिपएसिया य परमाणुपोग्गला य दुपएसिया य आणुपुव्वी य अणाणुपुव्वी य अवत्तव्वए य ७ । से तं संगहस्स भंगोवदंसणया । १२१. से किं तं समयारे ? २ संगहस्स आणुपुव्विदव्वाइं कहिं समयरंति ? किं आणुपुव्वीदव्वेहिं समयरंति ? अणाणुपुव्वीदव्वेहिं समयरंति ? अवत्तव्वयदव्वेहिं समयरंति ? संगहस्स आणुपुव्वीदव्वाइं आणुपुव्वीदव्वेहिं समयरंति, नो अणाणुपुव्वीदव्वेहिं समयरंति, नो अवत्तव्वयदव्वेहिं समयरंति । एवं दोण्णि वि सट्ठाणे सट्ठाणे समयरंति । से तं समयारे । १२२. से किं तं अणुगमे ? २ अट्टविहे

पन्नत्ते । तं जहा- संतपयपरूवणया १ दव्वपमाणं २ च खेत्त ३ फुसणा ४ य । कालो ५ य अंतरं ६ भाग ७ भाव ८ अप्पाबहुं नत्थि ॥९॥ १२३. संगहस्स आणुपुव्वीदव्वाइं किं अत्थि णत्थि ? नियमा अत्थि । एवं दोण्णि वि । १२४. संगहस्स आणुपुव्वीदव्वाइं किं संखेज्जाइं असंखेज्जाइं अणंताइं ? नो संखेज्जाइं नो असंखेज्जाइं नो अणंताइं, नियमा एगो रासी । एवं दोण्णि वि । १२५. संगहस्स आणुपुव्वीदव्वाइं लोगस्स कतिभागे होज्जा ? किं संखेज्जतिभागे होज्जा ? असंखेज्जतिभागे होज्जा ? संखेज्जेसु भागेषु होज्जा ? असंखेज्जेसु भागेषु होज्जा ? सव्वलोए होज्जा ? नो संखेज्जतिभागे होज्जा नो असंखेज्जतिभागे होज्जा नो संखेज्जेसु भागेषु होज्जा नो असंखेज्जेसु भागेषु होज्जा, नियमा सव्वलोए होज्जा । एवं दोण्णि वि । १२६. संगहस्स आणुपुव्वीदव्वाइं लोगस्स किं संखेज्जतिभागं फुसंति ? असंखेज्जतिभागं फुसंति ? संखेज्जे भागे फुसंति ? असंखेज्जे भागे फुसंति ? सव्वलोगं फुसंति ? नो संखेज्जतिभागं फुसंति नो असंखेज्जतिभागं फुसंति नो संखेज्जे भागे फुसंति नो असंखेज्जे भागे फुसंति, नियमा सव्वलोगं फुसंति । एवं दोण्णि वि । १२७. संगहस्स आणुपुव्वीदव्वाइं कालओ केवचिरं होति ? सव्वद्धा । एवं दोण्णि वि । १२८. संगहस्स आणुपुव्वीदव्वाणं कालतो केवचिरं अंतरं होति ? नत्थि अंतरं । एवं दोण्णि वि । १२९. संगहस्स आणुपुव्वीदव्वाइं सेसदव्वाणं कतिभागे होज्जा ? किं संखेज्जतिभागे होज्जा ? असंखेज्जतिभागे होज्जा ? संखेज्जेसुभागेषु होज्जा ? असंखेज्जेसु भागेषु होज्जा ? नो संखेज्जेसु भागेषु होज्जा नो असंखेज्जेसुभागेषु होज्जा णो संखेज्जेसु भागेषु होज्जा णो असंखेज्जेसु भागेषु होज्जा, नियमा तिभागे होज्जा । एवं दोण्णि वि । १३०. संगहस्स आणुपुव्वीदव्वाइं कयरम्मि भावे होज्जा ? नियमा सादिपारिणामिए भावे होज्जा । एवं दोण्णि वि । अप्पाबहुं नत्थि । से तं अणुगमे । से तं संगहस्स अणोवणिहिया दव्वाणुपुव्वी । से तं अणोवणिहिया दव्वाणुपुव्वी । १३१. से किं तं ओवणिहिया दव्वाणुपुव्वी ? २ तिविहा पण्णत्ता । तं जहा— पुव्वाणुपुव्वी १ पच्छाणुपुव्वी अणाणुपुव्वी ३ य । १३२. से किं तं पुव्वाणुपुव्वी ? २ धम्मत्थिकाए १ अधम्मत्थिकाए २ आगासत्थिकाए ३ जीवत्थिकाए ४ पोग्गलत्थिकाए ५ अब्बासमए ६ । से तं पुव्वाणुपुव्वी । १३३. से किं तं पच्छाणुपुव्वी ? २ अब्बासमए ६ पोग्गलत्थिकाए ५ जीवत्थिकाए ४ आगासत्थिकाए ३ अधम्मत्थिकाए २ धम्मत्थिकाए १ । से तं पच्छाणुपुव्वी । १३४. से किं तं अणाणुपुव्वी ? २ एयाए चेव एगादियाए एगुत्तरियाए छगच्छगयाए सेढीए अण्णमण्णब्भासो दुरूवूणो । से तं अणाणुपुव्वी । १३५. अहवा ओवणिहिया दव्वाणुपुव्वी तिविहा पन्नत्ता । तं जहा—पुव्वाणुपुव्वी २ पच्छाणुपुव्वी अणाणुपुव्वी ३ । १३६. से किं तं पुव्वाणुपुव्वी ? २ परमाणुपोग्गले दुपएसिए तिपएसिए जाव दसपएसिए जाव संखिज्जपएसिए असंखेज्जपएसिए अणंतपएसिए । से तं पुव्वाणुपुव्वी । १३७. से किं तं पच्छाणुपुव्वी ? २ अणंतपएसिए असंखिज्जपएसिए संखिज्जपएसिए जाव दसपएसिए जाव तिपएसिए दुपएसिए परमाणुपोग्गले । से तं पच्छाणुपुव्वी । १३८. से किं तं अणाणुपुव्वी ? २ एयाए चेव एगाइयाए एगुत्तरियाए अणंतगच्छगयाए सेढीए अन्नमन्नब्भासो दुरूवूणो । से तं अणाणुपुव्वी । से तं ओवणिहिया दव्वाणुपुव्वी । से तं जाणगव्वइरित्ता दव्वाणुपुव्वी । से तं नोआगमओ दव्वाणुपुव्वी । से तं दव्वाणुपुव्वी । १३९. से किं तं खेत्ताणुपुव्वी ? २ दुविहा पण्णत्ता । तं जहा—ओवणिहिया य अणोवणिहिया य । १४०. तत्थ णं जा सा ओवणिहिया सा ठप्पा । १४१. तत्थ णं जा सा अणोवणिहिया सा दुविहा पन्नत्ता । तं जहा—णेगम-ववहाराणं १ संगहस्स य २ । १४२. से किं तं णेगम-ववहाराणं अणोवणिहिया खेत्ताणुपुव्वी ? २ पंचविहा पण्णत्ता । तं जहा—अट्टपयपरूवणया १ भंगसमुक्कित्तणया २ भंगोवदंसणया ३ समोयारे ४ अणुगमे ५ । १४३. से किं तं णेगम-ववहाराणं अट्टपयपरूवणया ? २ तिपएसोगाढे आणुपुव्वी जाव दसपएसोगाढे आणुपुव्वी जाव संखिज्जपएसोगाढे आणुपुव्वी असंखेज्जपएसोगाढे आणुपुव्वी, एगपएसोगाढे अणाणुपुव्वी, दुपएसोगाढे अवत्तव्वए, तिपएसोगाढा आणुपुव्वीओ जाव दसपएसोगाढा आणुपुव्वीओ जाव संखेज्जपएसोगाढा आणुपुव्वीओ, अससंखेज्जापएसोगाढा आणुपुव्वीओ एगपएसोगाढा अणाणुपुव्वीओ, दुपएसोगाढा अवत्तव्वगाइं । से तं णेगम-ववहाराणं अट्टपयपरूवणया । १४४. एयाए णं णेगम-ववहाराणं अट्टपयपरूवणयाए किं पओयणं ? एयाए णं णेगम-ववहाराणं अट्टपयपरूवणयाए णेगम-ववहाराणं भंगसमुक्कित्तणया कीरति । १४५. से किं तं णेगम-ववहाराणं भंगसमुक्कित्तणया ? २ अत्थि आणुपुव्वी १ अत्थि अणाणुपुव्वी २ अत्थि अवत्तव्वए ३ । एवं दव्वाणुपुव्विगमेणं खेत्ताणुपुव्वीए वि ते चेव छव्वीसं

भंगा भाणियव्वा, जाव से तं णेगम-ववहाराणं भंगसमुक्कित्तणया । १४६. एयाए णं णेगम-ववहाराणं भंगसमुक्कित्तणया किं पओयणं ? एयाए णं णेगम-ववहाराणं भंगसमुक्कित्तणयाए णेगम-ववहाराणं भंगोवदंसणा कज्जति । १४७. से किं तं णेगम-ववहाराणं भंगोवदंसणया ? २ तिपएसोगाढे आणुपुव्वी एगपएसोगाढे अणाणुपुव्वी दुपएसोगाढं अवत्तव्वयाइं, अहवा तिपएसोगाढे य एगपएसोगाढे य आणुपुव्वी य अणाणुपुव्वी य, एवं तहा चेव दव्वाणुपुव्विगमेणं छव्वीसं भंगा भाणियव्वा जाव से तं णेगम-ववहाराणं भंगोवदंसणया । १४८. [१] से किं तं समोयारे ? २ णेगम-ववहाराणं आणुपुव्वीदव्वाइं कहिं समोयरंति ? किं आणुपुव्वीदव्वेहिं समोयरंति ? अणाणुपुव्वीदव्वेहिं समोयरंति ? अवत्तव्वयदव्वेहिं समोयरंति ? आणुपुव्वीदव्वाइं आणुपुव्वीदव्वेहिं समोयरंति, नो अणाणुपुव्वीदव्वेहिं समोयरंति नो अवत्तव्वयदव्वेहिं समोयरंति । २ एवं तिण्णि वि सट्ठाणे समोयरंति त्ति भाणियव्वं । से तं समोयारे । १४९. से किं तं अणुगमे ? २ णवविहे पण्णत्ते । तं जहा- संतपयपरूवणया १ दव्वपमाणं २ च खेत्त ३ फुसणा ४ य । कालो ५ य अंतरं ६ भाग ७ भाव ८ अप्पाबहुं ९ चेव ॥१०॥ १५०. से किं तं संतपयपरूवणया ? णेगम-ववहाराणं खेत्ताणु-पुव्वीदव्वाइं किं अत्थि णत्थि ? णियमा अत्थि । एवं दोण्णि वि । १५१. णेगम-ववहाराणं आणुपुव्वीदव्वाइं किं संखेज्जाइं असंखेज्जाइं अणंताइं ? नो संखेज्जाइं नो अणंताइं, नियमा असंखेज्जाइं । एवं दोण्णि वि । १५२. [१] णेगम-ववहाराणं खेत्ताणुपुव्वीदव्वाइं लोगस्स कतिभागे होज्जा ? किं संखिज्जइभागे वा होज्जा ? असंखेज्जइभागे वा होज्जा ? जाव सव्वलोए वा होज्जा ? एगदव्वं पडुच्च लोगस्स संखेज्जइभागे वा होज्जा असंखेज्जइभागे वा होज्जा संखेज्जेसु वा भागेसु होज्जा असंखेज्जेसु वा भागेसु होज्जा देसूणे वा लोए होज्जा, णाणादव्वाइं पडुच्च णियमा सव्वलोए होज्जा । [२] अणाणुपुव्वीदव्वाणं पुच्छा, एगं दव्वं पडुच्च नो संखिज्जतिभागे होज्जा असंखिज्जतिभागे होज्जा नो संखेज्जेसु० नो असंखेज्जेसु० नो सव्वलोए होज्जा, नाणादव्वाइं पडुच्च नियमा सव्वलोए होज्जा । [३] एवं अवत्तव्वगदव्वाणि वि भाणियव्वाणि । १५३. [१] णेगम-ववहाराणं आणुपुव्वीदव्वाइं लोगस्स किं संखेज्जइभागं फुसंति ? असंखेज्जति० ? जाव सव्वलोगं फुसंति ? एगं दव्वं पडुच्च संखेज्जतिभागं वा फुसंति असंखेज्जतिभागं वा संखेज्जे वा भागे असंखेज्जे वा भागे देसूणं वा लोणं फुसंति, णाणादव्वाइं पडुच्च णियमा सव्वलोगं फुसंति । [२] अणाणुपुव्वीदव्वाइं अवत्तव्वयदव्वाणि य जहा खेत्तं, नवरं फुसणा भाणियव्वा । १५४. णेगम-ववहाराणं आणुपुव्वीदव्वाइं कालतो केवचिरं होति ? एगदव्वं पडुच्च जहन्नेणं एगं समयं उक्कोसेणं असंखेज्जं कालं, णाणादव्वाइं पडुच्च सव्वद्धा । एवं दोण्णि वि । १५५. णेगम-ववहाराणं आणुपुव्वीदव्वाणमंतरं कालतो केवचिरं होति ? तिण्णि वि एगं दव्वं पडुच्च जहण्णेणं एगं समयं उक्कोसेणं असंखेज्जं कालं, णाणादव्वाइं पडुच्च णत्थि अंतरं । १५६. णेगम-ववहाराणं आणुपुव्वीदव्वाइं सेसदव्वाणं कतिभागे होज्जा ? तिण्णि वि जहा दव्वाणुपुव्वीए । १५७. णेगम-ववहाराणं आणुपुव्वीदव्वाइं कयरम्मि भावे होज्जा ? तिन्नि वि णियमा सादिपारिणामिए भावे होज्जा । १५८. [१] एएसि णं भंते ! णेगम-ववहाराणं आणुपुव्वीदव्वाणं अणाणुपुव्वीदव्वाणं अवत्तव्वयदव्वाण य दव्वट्टयाए पएसट्टयाए दव्वट्ट-पएसट्टयाए य कयरे कयरेहिंते अप्पा वा बहुया वा तुल्ला वा विसेसाहिया वा ? गोयमा ! सव्वत्थोवाइं णेगम-ववहाराणं अवत्तव्वयदव्वाइं दव्वट्टयाए, अणाणुपुव्वीदव्वाइं दव्वट्टयाए विसेसाहियाइं, आणुपुव्वीदव्वाइं दव्वट्टयाए असंखेज्जगुणाइं । [२] पएसट्टयाए सव्वत्थोवाइं णेगम-ववहाराणं अणाणुपुव्वीदव्वाइं अपएसट्टयाए, अवत्तव्वयदव्वाइं पएसट्टयाए विसेसाहियाइं, आणुपुव्विदव्वाइं पएसट्टयाए असंखेज्जगुणाइं । [३] दव्वट्ट-पएसट्टयाए सव्वत्थोवाइं णेगम-ववहाराणं अवत्तव्वयदव्वाइं दव्वट्टयाए, अणाणुपुव्विदव्वाइं दव्वट्टयाए अपएसट्टयाए विसेसाहियाइं, अवत्तव्वयदव्वाइं पएसट्टयाए विसेसाहियाइं, आणुपुव्विदव्वाइं दव्वट्टयाए असंखेज्जगुणाइं, ताइं चेव पएसट्टयाए असंखेज्जगुणाइं । से तं अणुगमे । से तं णेगम-ववहाराणं अणोवणिहिया खेत्ताणुपुव्वी । १५९. से किं तं संगहस्स अणोवणिहिया खेत्ताणुपुव्वी ? जहेव दव्वाणुपुव्वी तहेव खेत्ताणुपुव्वी णेयव्वा । से तं संगहस्स अणोवणिहिया खेत्ताणुपुव्वी । से तं अणोवणिहिया खेत्ताणुपुव्वी । १६०. से किं तं ओवणिहिया खेत्ताणुपुव्वी ? २ तिविहा पण्णत्ता ? तं जहा-पुव्वाणुपुव्वी १ पच्छाणुपुव्वी २ अणाणुपुव्वी ३ । १६१. से किं तं पुव्वाणुपुव्वी ? २ अहोलोए १ तिरियलोए २ उड्डलोए ३ । से तं पुव्वाणुपुव्वी । १६२. से किं तं पच्छाणुपुव्वी ? २ उड्डलोए ३ तिरियलोए २ अहोलोए १ । से तं पच्छाणुपुव्वी । १६३. से किं तं अणाणुपुव्वी ? २ एयाए चेव एगादियाए

एगुत्तरियाए तिगच्छगयाए सेढीए अन्नमन्नभासो दुरूवूणो । से तं अणाणुपुव्वी । १६४. अहोलोयखेत्ताणुपुव्वी तिविहा पणत्ता । तं जहा-पुव्वाणुपुव्वी १ पच्छाणुपुव्वी २ अणाणुपुव्वी ३ । १६५. से किं तं पुव्वाणुपुव्वी ? २ रयणप्पभा १ सक्करप्पभा २ वालुयप्पभा ३ पंकप्पभा ४ धूमप्पभा ५ तमप्पभा ६ तमतमप्पभा ७ । से तं पुव्वाणुपुव्वी । १६६. से किं तं पच्छाणुपुव्वी ? २ तमातमा ७ जाव रयणप्पभा १ । से तं पच्छाणुपुव्वी । १६७. से किं तं अणाणुपुव्वी ? २ एयाए चेव एगादियाए एगुत्तरियाए सत्तगच्छगयाए सेढीए अण्णमण्णभासो दुरूवूणो । से तं अणाणुपुव्वी । १६८. तिरियलोयखेत्ताणुपुव्वी तिविहा पणत्ता । तं जहा-पुव्वाणु-पुव्वी १ पच्छाणुपुव्वी २ अणाणुपुव्वी ३ । १६९. से किं तं पुव्वाणुपुव्वी ? २ जंबुद्दीवे लवणे धायइ-कालोय-पुक्खरे वरुणे । खीर-घय-खोय-नंदी-अरुणवरे कुंडले रुयगे ॥११॥ जंबुद्दीवाओ खलु निरंतरा, सेसया असंखइमा । भुयगवर-कुसवरा वि य कोंचवराऽऽभरणमाइया ॥१२॥ आभरण-वत्थ-गंधे उप्पल-तिलये य पउम-निहि-रयणे । वासहर-दह-णदीओ विजया वक्खार-कप्पिंदा ॥१३॥ कुरु-मंदर-आवासा कूडा नक्खत्त-चंद-सूरा य । देवे नागे जक्खे भूये य सयंभुरमणे य ॥१४॥ से तं पुव्वाणुपुव्वी । १७०. से किं तं पच्छाणुपुव्वी ? २ सयंभुरमणे य भूए य जाव जंबुद्दीवे । से तं पच्छाणुपुव्वी । १७१. से किं तं अणाणुपुव्वी ? २ एयाए चेव एगादियाए एगुत्तरियाए असंखेज्जगच्छगयाए सेढीए अण्णमण्णभासो दुरूवूणो । से तं अणाणुपुव्वी । १७२. उहोलोगखेत्ताणुपुव्वी तिविहा पणत्ता । तं जहा-पुव्वाणुपुव्वी १ पच्छाणुपुव्वी २ अणाणुपुव्वी ३ । १७३. से किं तं पुव्वाणुपुव्वी ? २ सोहम्मे १ ईसाणे २ सणंकुमारे ३ माहिंदि ४ बंभलोए ५ लंतए ६ महासुक्के ७ सहस्सारे ८ आणते ९ पाणते १० आरणे ११ अच्चुते १२ गेवेज्जविमाणा १३ अणुत्तरविमाणा १४ ईसिपभभारा १५ । से तं पुव्वाणुपुव्वी । १७४. से किं तं पच्छाणुपुव्वी ? २ ईसिपभभारा १५ जाव सोहम्मे १ । से तं पच्छाणुपुव्वी । १७५. से किं तं अणाणुपुव्वी ? २ एयाए चेव एगादिगाए एगुत्तरियाए पण्णरसगच्छगयाए सेढीए अण्णमण्णभासो दुरूवूणो । से तं अणाणुपुव्वी । १७६. अहवा ओवणिहिया खेत्ताणुपुव्वी तिविहा पणत्ता । तं जहा-पुव्वाणुपुव्वी १ पच्छाणुपुव्वी २ अणाणुपुव्वी ३ । १७७. से किं तं पुव्वाणुपुव्वी ? २ एगपएसोगाढे दुपएसोगाढे जाव दसपएसोगाढे जाव असंखेज्जपएसोगाढे । से तं पुव्वाणुपुव्वी । १७८. से किं तं पच्छाणुपुव्वी ? २ असंखेज्जपएसोगाढे जाव एगपएसोगाढे । से तं पच्छाणुपुव्वी । १७९. से किं तं अणाणुपुव्वी ? २ एयाए चेव एगादियाए एगुत्तरियाए असंखेज्जगच्छगयाए सेढीए अन्नमन्नभासो दुरूवूणो । से तं अणाणुपुव्वी । से तं ओवणिहिया खेत्ताणुपुव्वी । से तं खेत्ताणुपुव्वी । १८०. से किं तं कालाणुपुव्वी ? २ दुविहा पणत्ता । तं जहा-ओवणिहिया य १ अणोवणिहिया य २ । १८१. तत्थ णं जा सा ओवणिहिया सा ठप्पा । १८२. तत्थ णं जा सा अणोवणिहिया सा दुविहा पणत्ता । तं जहा-णेगम-ववहाराणं १ संगहस्स य २ । १८३. से किं तं णेगम-ववहाराणं अणोवणिहिया कालाणुपुव्वी ? २ पंचविहा पणत्ता । तं जहा-अट्टपयपरूवणया १ भंगसमुक्कित्तणया २ भंगोवदंसणया ३ समोतारे ४ अणुगमे ५ । १८४. से किं तं णेगम-ववहाराणं अट्टपदपरूवणया ? २ तिसमयट्ठिईए आणुपुव्वी जाव दससमयट्ठिईए आणुपुव्वी संखेज्जसमयट्ठिईए आणुपुव्वी असंखेज्जसमयट्ठिईए आणुपुव्वी एगसमयट्ठिईए अणाणुपुव्वी दुसमयट्ठिईए अवत्तव्वए, तिसमयट्ठिईयाओ आणुपुव्वीओ जाव संखेज्जसमयट्ठिईयाओ आणुपुव्वीओ असंखेज्जसमयट्ठिईयाओ आणुपुव्वीओ एगसमयट्ठिईयाओ अणाणुपुव्वीओ दुसमयट्ठिईयाइं अवत्तव्वयाइं । से तं णेगम-ववहाराणं अट्टपयपरूवणया । १८५. एयाए णं णेगम-ववहाराणं अट्टपयपरूवणयाए जाव भंगसमुक्कित्तणया कज्जति । १८६. से किं तं णेगम-ववहाराणं भंगसमुक्कित्तणया ? २ अत्थि आणुपुव्वी अत्थि अणाणुपुव्वी अत्थि अवत्तव्वए, एवं दव्वाणुपुव्विगमेणं कालाणुपुव्वीए वि ते चेव छव्वीसं भंगा भाणियव्वा जाव से तं णेगम-ववहाराणं भंगसमुक्कित्तणया । १८७. एयाए णं णेगम-ववहाराणं जाव किं पओयणं ? एयाए णं णेगम० जाव भंगोवदंसणया कज्जति । १८८. से किं तं णेगम-ववहाराणं भंगोवदंसणया ? २ तिसमयट्ठिईए आणुपुव्वी एगसमयट्ठिईए अणाणुपुव्वी दुसमयट्ठिईए अवत्तव्वए, तिसमयट्ठिईयाओ आणुपुव्वीओ एगसमयट्ठिईयाओ अणाणुपुव्वीओ दुसमयट्ठिईयाइं अवत्तव्वयाइं । एवं दव्वाणुगमेणं ते चेव छव्वीसं भंगा भाणियव्वा, जाव से तं णेगम-ववहाराणं भंगोवदंसणया । १८९. से किं तं समोयारे ? २ णेगम-ववहाराणं आणुपुव्विदव्वाइं कहिं समोयरंति ? जाव तिण्णि वि सट्ठणो २ समोयरंति त्ति भाणियव्व । से तं

समोयारे । १९०. से किं तं अणुगमे ? २ णवविहे पण्णत्ते । तं जहा- संतपयपरूवणया १ जाव अप्पाबहुं चेव ९ ॥१५॥ १९१. णेगम-ववहाराणं आणुपुव्विदव्वाइं किं अत्थि णत्थि ? नियमा तिण्णि वि अत्थि । १९२. णेगम-ववहाराणं आणुपुव्विदव्वाइं किं संखेज्जाइं असंखेज्जाइं अणंताइं ? तिण्णि वि नो संखेज्जाइं असंखेज्जाइं नो अणंताइं । १९३. णेगम-ववहाराणं आणुपुव्विदव्वाइं लोगस्स किं संखेज्जइभागे होज्जा ? ० पुच्छा, एगदव्वं पडुच्च लोगस्स संखेज्जतिभागे वा होज्जा जाव असंखेज्जेसु वा भागेषु होज्जा देसूणे वा लोए होज्जा, नाणादव्वाइं पडुच्च नियमा सव्वलोए होज्जा । एवं अणाणुपुव्वि-अवत्तव्वयदव्वाणि भाणियव्वाणि जहा णेगम-ववहाराणं खेत्ताणुपुव्वीए । १९४. एवं फुसणा कालाणुपुव्वीए वि तहा चेव भाणितव्वा । १९५. [१] णेगम-ववहाराणं आणुपुव्विदव्वाइं कालतो केवचिरं होंति ? एगं दव्वं पडुच्च जहण्णेणं तिण्णि समयया उक्कोसेणं असंखेज्जं कालं, नाणादव्वाइं पडुच्च सव्वद्धा । [२] णेगम-ववहाराणं अणाणुपुव्विदव्वाइं कालओ केवचिरं होंति ? एगदव्वं पडुच्च अजहण्णमणुक्कोसेणं एक्कं समयं, नाणादव्वाइं पडुच्च सव्वद्धा । [३] णेगम-ववहाराणं अवत्तव्वयदव्वाइं कालतो केवचिरं होंति ? एगं दव्वं पडुच्च अजहण्णमणुक्कोसेणं दो समयया, नाणादव्वाइं पडुच्च सव्वद्धा । १९६. [१] णेगम-ववहाराणं आणुपुव्विदव्वाणमंतरं कालतो केवचिरं होति ? एगदव्वं पडुच्च जहण्णेणं एगं समयं उक्कोसेणं दो समयया, नाणादव्वाइं पडुच्च नत्थि अंतरं । [२] णेगम-ववहाराणं अणाणुपुव्विदव्वाणं अंतरं कालतो केवचिरं होति ? एगदव्वं पडुच्च जहण्णेणं दो समयया उक्कोसेणं असंखेज्जं कालं, नाणादव्वाइं पडुच्च णत्थि अंतरं । [३] णेगम-ववहाराणं अवत्तव्वगदव्वाणं पुच्छा, एगदव्वं पडुच्च जहण्णेणं एगं समयं उक्कोसेणं असंखेज्जं कालं, नाणादव्वाइं पडुच्च णत्थि अंतरं । १९७. णेगम-ववहाराणं आणुपुव्विदव्वाइं सेसदव्वाणं कइभागे होज्जा ? पुच्छा, जहेव खेत्ताणुपुव्वीए । १९८. भावो वि तहेव । अप्पाबहुं पि तहेव नेयव्वं जाव से तं अणुगमे । से तं णेगम-ववहाराणं अणोवणिहिया कालाणुपुव्वी । १९९. से किं तं संगहस्स अणोवणिहिया कालाणुपुव्वी ? २ पंचविहा पण्णत्ता । तं जहा-अट्टपयपरूवणया १ भंगसमुक्कित्तणया २ भंगोवदंसणया ३ समोतारे ४ अणुगमे ५ । २००. से किं तं संगहस्स अट्टपयपरूवणया ? २ एयाइं पंच वि दाराइं जहा खेत्ताणुपुव्वीए संगहस्स तहा कालाणुपुव्वीए वि भाणियव्वाणि, णवरं ठितीअभिलावो जाव से तं संगहस्स अणोवणिहिया कालाणुपुव्वी । से तं अणोवणिहिया कालाणुपुव्वी । २०१. [१] से किं तं ओवणिहिया कालाणुपुव्वी ? २ तिविहा पण्णत्ता । तं जहा-पुव्वाणुपुव्वी १ पच्छाणुपुव्वी २ अणाणुपुव्वी ३ । [२] से किं तं पुव्वाणुपुव्वी ? २ एगसमयठितीए दुसमयठितीए तिसमयठितीए जाव दससमयठितीए जाव संखेज्जसमयठितीए असंखेज्जसमयठितीए । से तं पुव्वाणुपुव्वी । [३] से किं तं पच्छाणुपुव्वी ? २ असंखेज्जसमयठितीए जाव एक्कसमयठितीए । से तं पच्छाणुपुव्वी । [४] से किं तं अणाणुपुव्वी ? २ एयाए चेव एगादियाए एगुत्तरियाए असंखेज्जगच्छगयाए सेढीए अण्णमण्णभ्भासो दुरूवूणो । से तं अणाणुपुव्वी । २०२. [१] अहवा ओवणिहिया कालाणुपुव्वी तिविहा पण्णत्ता । तं जहा-पुव्वाणुपुव्वी १ पच्छाणुपुव्वी २ अणाणुपुव्वी ३ । [२] से किं तं पुव्वाणुपुव्वी ? २ समए आवलिया आणापाणू थोवे लवेमुहुत्ते दिवसे अहोरत्ते पक्खे मासे उदू अयणे संवच्छरे जुगे वाससते वाससहस्से वाससतसहस्से पुव्वंगे पुव्वे तुडियंगे तुडिए अडडंगे अडडे अवंगे अववे हूहुयंगे हूहुए उप्पलंगे उप्पले पउमंगे पउमे णलिंगे णलिणे अत्थनिरंगे अत्थनिरं अउयंगे अउए नउयंगे नउए पउयंगे पउए चूलियंगे चूलिए सीसपहेलियंगे सीसपहेलिया पलिओवमे सागरोवमे ओसप्पिणी उरस्सप्पिणी पोग्गलपरियट्टे तीतद्धा अणागतद्धा सव्वद्धा । से तं पुव्वाणुपुव्वी । [३] से किं तं पच्छाणुपुव्वी ? २ सव्वद्धा अणागतद्धा जाव समए । से तं पच्छाणुपुव्वी । [४] से किं तं अणाणुपुव्वी ? २ एयाए चेव एगादियाए एगुत्तरियाए अणंतगच्छगयाए सेढीए अण्णमण्णभ्भासो दुरूवूणो । से तं अणाणुपुव्वी । से तं ओवणिहिया कालाणुपुव्वी । से तं कालाणुपुव्वी । २०३. [१] से किं तं उक्कित्तणाणुपुव्वी ? २ तिविहा पण्णत्ता । तं जहा-पुव्वाणुपुव्वी १ पच्छाणुपुव्वी २ अणाणुपुव्वी ३ । [२] से किं तं पुव्वाणुपुव्वी ? २ उसमे १ अजिए २ संभवे ३ अभिणंदणे ४ सुमती ५ पउमप्पभे ६ सुपासे ७ चंदप्पहे ८ सुविही ९ सीतले १० सेज्जंसे ११ वासुपुज्जे १२ विमले १३ अणंतती १४ धम्मे १५ संती १६ कुंथू १७ अरे १८ मल्ली १९ मुणिसुव्वए २० २१ अरिडुणेमी २२ पासे २३ वद्धमाणे २४ । से तं पुव्वाणुपुव्वी । [३] से किं तं पच्छाणुपुव्वी ? २ वद्धमाणे २४ पासे २३ जाव उसभे १ । से तं पच्छाणुपुव्वी । [४] से किं तं

अणाणुपुव्वी ? २ एयाए चेव एगादियाए एगत्तरियाए चउवीसगच्छगयाए सेठीए अण्णमण्णब्भासो दुरूवूणो । से तं अणाणुपुव्वी । से तं उक्कित्तणाणुपुव्वी । २०४. [१] से किं तं गणणाणुपुव्वी ? २ तिविहा पण्णत्ता । तं जहा—पुव्वाणुपुव्वी १ पच्छाणुपुव्वी २ अणाणुपुव्वी ३ । [२] से किं तं पुव्वाणुपुव्वी ? २ एक्को दस सयं सहस्सं दससहस्साइं सयसहस्सं दससयसहस्साइं कोठी दस कोडीओ कोडीसयं दसकोडिसयाइं । से तं पुव्वाणुपुव्वी । [३] से किं तं पच्छाणुपुव्वी ? २ दसकोडिसयाइं जाव एक्को । से तं पच्छाणुपुव्वी । [४] से किं तं अणाणुपुव्वी ? २ एयाए चेव एगादियाए एगुत्तरियाए दसकोडियसयगच्छगयाए सेठीए अन्नमन्नब्भासो दुरूवूणो । से तं अणाणुपुव्वी । से तं गणणाणुपुव्वी । २०५. [१] से किं तं संठाणाणुपुव्वी ? २ तिविहा पण्णत्ता । तं जहा—पुव्वाणुपुव्वी १ पच्छाणुपुव्वी २ अणाणुपुव्वी ३ । [२] से किं तं पुव्वाणुपुव्वी ? २ समचउरंसे १ ण्णगोहमंडले २ सादी ३ खुज्जे ४ वामणे ५ हुंडे ६ । से तं पुव्वाणुपुव्वी । [३] से किं तं पच्छाणुपुव्वी ? २ हुंडे ६ जाव समचउरंसे १ । से तं पच्छाणुपुव्वी । [४] से किं तं अणाणुपुव्वी ? २ एयाए चेव एगादियाए एगुत्तरियाए छगच्छगयाए सेठीए अन्नमन्नब्भासो दुरूवूणो । से तं अणाणुपुव्वी । से तं संठाणाणुपुव्वी । २०६. [१] से किं तं सामायाराणुपुव्वी ? २ तिविहा पण्णत्ता । तं जहा—पुव्वाणुपुव्वी १ पच्छाणुपुव्वी २ अणाणुपुव्वी ३ । [२] से किं तं पुव्वाणुपुव्वी ? इच्छा १ मिच्छा २ तहक्कारो ३ आवसिया ४ य निसीहिया ५ । आपुच्छणा ६ य पडिपुच्छा ७ छंदणा ८ य निमंतणा ९ । उपसंपया य काले १० सामायारी भवे दसविहा उ ॥१६॥ से तं पुव्वाणुपुव्वी । [३] से किं तं अणाणुपुव्वी ? २ उवसंपया १० जाव इच्छा १ । से तं पच्छाणुपुव्वी । [४] से किं तं अणाणुपुव्वी ? २ एयाए चेव एगादियाए एगुत्तरियाए दसगच्छगयाए सेठीए अन्नमन्नब्भासो दुरूवूणो । से तं अणाणुपुव्वी । से तं सामायाराणुपुव्वी । २०७. [१] से किं तं भावाणुपुव्वी ? २ तिविहा पण्णत्ता । तं जहा—पुव्वाणुपुव्वी १ पच्छाणुपुव्वी २ अणाणुपुव्वी ३ । [२] से किं तं पुव्वाणुपुव्वी ? २ उदइए १ उवसमिए २ खतिए ३ खओवसमिए ४ पारिणामिए ५ सन्निवातिए ६ । से तं पुव्वाणुपुव्वी । [३] से किं तं पच्छाणुपुव्वी ? २ सन्निवातिए ६ जाव उदइए १ । से तं पच्छाणुपुव्वी । [४] से किं तं अणाणुपुव्वी ? २ एयाए चेव एगादियाए एगत्तरियाए छगच्छगयाए सेठीए अन्नमन्नब्भासो दुरूवूणो । से तं अणाणुपुव्वी । से तं भावाणुपुव्वी । से तं आणुपुव्वि त्ति पदं समत्तं । [सुत्ताइं २०८-३१२. उवक्कमाणुओगदारे नामदारं] २०८. से किं तं णामे ? णामे दसविहे पण्णत्ते । तं जहा—एगणामे १ दुणामे २ तिणामे ३ चउणामे ४ पंचणामे ५ छणामे ६ सत्तणामे ७ अट्टणामे ८ णवणामे ९ दसणामे १० । २०९. से किं तं एगणामे ? २ णामाणि जाणि काणि वि दव्वाण गुणाण पज्जवाणं च । तेसिं आगमनिहसे नामं ति परूविया सण्णा । १७॥ से तं एगणामे । २१०. से किं तं दुणामे ? २ दुविहे पण्णत्ते । तं जहा—एगक्खरिए य १ अणेगक्खरिए य । २११. से किं तं एगक्खरिए ? २ अणेगविहा पण्णत्ते । तं जहा—हीः श्रीः धीः स्त्री । से तं एगक्खरिए । २१२. से किं तं अणेगक्खरिए ? २ अणेगविहे पण्णत्ते । तं जहा—कण्णा वीणा लता माला । से तं अणेगक्खरिए । २१३. अहवा दुणामे दुविहे पण्णत्ते । तं जहा-जीवनामे य १ अजीवनामे य २ । २१४. से किं तं जीवणामे २ अणेगविहे पण्णत्ते । तं जहा देवदत्तो जण्णदत्तो विण्हुदत्तो सोमदत्तो । से तं जीवणामे । २१५. से किं तं अजीवनामे ? २ अणेगविहे पण्णत्ते । तं जहा- घडो पडो कडो रहो । से तं अजीवनामे । २१६. [१] अहवा दुणामे दुविहा पण्णत्ते । तं जहा-विसेसिए य १ अविसेसिए य २ । [२] अविसेसिए दव्वे, विसेसिए जीवदव्वे य अजीवदव्वे य । [३] अविसेसिए जीवदव्वे, विसेसिए णेरइए तिरिक्खजोणिए मणुस्से देवे । [४] अविसेसिए णेरइए, विसेसिए रयणप्पभाए सक्करप्पभाए वालुयप्पभाए पंकप्पभाए धूमप्पभाए तभाए तमतमाए । अविसेसिए रयणप्पभापुढविणेइए, विसेसिए पज्जत्तए य अपज्जत्तए य । एवं जाव अविसेसिए तमतमापुढविणेइए, विसेसिए पज्जत्तए य अपज्जत्तए य । [५] अविसेसिए तिरिक्खजोणिए, विसेसिए एगिंदिए बेइंदिए तेइंदिए चउरिंदिए । [६] अविसेसिए एगिंदिए, विसेसिए पुढविकाइए आउकाइए तेउकाइए वाउकाइए वणस्सइकाइए । अविसेसिए पुढविकाइए, विसेसिए सुहुमपुढविकाइए य बादरपुढविकाइए य । अविसेसिए सुहुमपुढविकाइए, विसेसिए पज्जत्तयसुहुमपुढविकाइए य अपज्जत्तयसुहुमपुढविकाइए य । अविसेसिए बादरपुढविकाइए, विसेसिए पज्जत्तयबादरपुढविकाइए य अपज्जत्तयबादरपुढविकाइए य । एवं आउ० तेउ० वाउ० वणस्सती० य अविसेसिए विसेसिए य पज्जत्तय-अपज्जत्तय-भेदेहिं भाणियव्वा । [७] अविसेसिए बेइंदिए,

विसेसिए पज्जत्तयबेइंदिए य अपज्जत्तयबेइंदिए य । एवं तेइंदिय-चउरिंदिया वि भाणियव्वा । [८] अविसेसिए पंचेंदियतिरिक्खजोणिए, विसेसिए जलयरपंचेंदियतिरिक्खजोणिए थलयरपंचेंदियतिरिक्खजोणिए खहयरपंचेंदियतिरिक्खजोणिए य । [९] अविसेसिए जलयरपंचेंदियतिरिक्खजोणिए, विसेसिए सम्मुच्छिमजलयरपंचेंदियतिरिक्खजोणिए य गब्भवक्कंतियजलयरपंचेंदियतिरिक्खजोणिए य । अविसेसिए सम्मुच्छिमजलयरपंचेंदियतिरिक्खजोणिए, विसेसिए पज्जत्तयसम्मुच्छिमजलयरपंचेंदियतिरिक्खजोणिए य अपज्जत्तयसम्मुच्छिमजलयरपंचेंदियतिरिक्खजोणिए य । अविसेसिए गब्भवक्कंतियजलयरपंचेंदिय-तिरिक्खजोणिए, विसेसिए पज्जत्तयगब्भवक्कंतियजलयरपंचेंदियतिरिक्खजोणिए य अपज्जत्तयगब्भवक्कंतियजलयरपंचेंदियतिरिक्ख-जोणिए य । [१०] अविसेसिए थलयरपंचेंदियतिरिक्खजोणिए य । विसेसिए चउप्पयथलयरपंचेंदियतिरिक्खजोणिए य परिसप्पथलयरपंचेंदियतिरिक्खजोणिए य । अविसेसिए चउप्पयथलयरपंचेंदियतिरिक्खजोणिए विसेसिए सम्मुच्छिमचउप्पयथलयरपंचेंदियतिरिक्खजोणिए य गब्भवक्कंतियचउप्पयथलयरपंचेंदिय-तिरिक्खजोणिए य । अविसेसिए समुच्छिमचउप्पयथलयरपंचेंदियतिरिक्खजोणिए, विसेसिए पज्जत्तयसम्मुच्छिमचउप्पयथलयरपंचेंदियतिरिक्खजोणिए य अपज्जत्तयसम्मुच्छिमचउप्पयथलयरपंचेंदियतिरिक्खजोणिए य । अविसेसिए गब्भवक्कंतियचउप्पयथलयरपंचेंदियतिरिक्खजोणिए, विसेसिए पज्जत्तयगब्भवक्कंतियचउप्पय-थलयरपंचेंदियतिरिक्खजोणिए य अपज्जत्तयगब्भवक्कंतियचउप्पयथलयरपंचेंदियतिरिक्खजोणिए य । अविसेसिए परिसप्पथलयरपंचेंदियतिरिक्खजोणिए विसेसिए उरपरिसप्पथलयरपंचेंदियतिरिक्खजोणिए य भुयपरिसप्पथलयरपंचेंदियतिरिक्खजोणिए य । एवं समुच्छिमा पज्जत्ता अपजत्ता य, गब्भवक्कंतिया वि पज्जत्ता अपजत्ता य भाणियव्वा । [११] अविसेसिए खहयरपंचेंदियतिरिक्खजोणिए विसेसिए समुच्छिमखहयरपंचेंदियतिरिक्खजोणिए य गब्भवक्कंतियखहयरपंचेंदिय-तिरिक्खजोणिए य । अविसेसिए समुच्छिमखहयरपंचेंदियतिरिक्खजोणिए, विसेसिए पज्जत्तयसमुच्छिमखहयरपंचेंदियतिरिक्खजोणिए य अपज्जत्तयसमुच्छिमख-हयरपंचेंदियतिरिक्खजोणिए य । अविसेसिए गब्भवक्कंतियखहयरपंचेंदिय-तिरिक्खजोणिए, विसेसिए पज्जत्तयगब्भवक्कंतियखहयरपंचेंदियतिरिक्खजोणिए य अपज्जत्तयगब्भवक्कंतियखहयरपंचेंदियतिरिक्खजोणिए य । [१२] अविसेसिए मणुस्से, विसेसिए सम्मुच्छिममणुसे य गब्भवक्कंतियमणुस्से य । अविसेसिए सम्मुच्छिममणुसे, विसेसिए पज्जत्तयसम्मुच्छिममणुसे य अपज्जत्तयसम्मुच्छिममणुसे य । अविसेसिए गब्भवक्कंतियमणुसे, विसेसिए पज्जत्तयगब्भवक्कंतियमणुसे य अपज्जत्तयगब्भवक्कंतियमणुसे य । [१३] अविसेसिए देवे, विसेसिए भवणवासी वाणमंतरे जोइसिए वेमाणिए य । अविसेसिए भवणवासी, विसेसिए असुरकुमारे एवं नाग० सुवण्ण० विज्जु० अग्गि० दीव० उदधि० दिसा० वात० थणियकुमारे । सव्वेसिं पि अविसेसिय-विसेसिय-पज्जत्तय-अपज्जत्तयभेया भाणियव्वा । [१४] अविसेसिये वाणमंतरे, विसेसिए पिसाए भूते जक्खे रक्खसे किण्णरे किंपुरिसे महोरगे गंधव्वे । एतेसिं पि अविसेसिय-विसेसिय-पज्जत्तय-अपज्जत्तयभेदा भाणियव्वा । [१५] अविसेसिए जोइसिए, विसेसिए चंदे सूरे गहे नक्खत्ते तारारूवे । एतेसिं पि अविसेसिय-विसेसिय-पज्जत्तय-अपज्जत्तयभेया भाणियव्वा । [१६] अविसेसिए वेमाणिए, विसेसिए कप्पोवगे य कप्पातीतए य । अविसेसिए कप्पोवए, विसेसिए सोहम्मए ईसाणए सणंकुमारए माहिंदए बंभलोगए लंतयए महासुक्कए सहस्सारए आणयए पाणयए आरणए अच्चुतए । एतेसिं पि अविसेसिय-विसेसिय-पज्जत्तय-अपज्जत्तयभेदा भाणियव्वा । [१७] अविसेसिए कप्पातीतए, विसेसिए गेवेज्जए य अणुत्तरोववाइए य । अविसेसिए गेवेज्जए, विसेसिए हेट्ठिमगेवेज्जए मज्झिमगेवेज्जए उवरिमगेवेज्जए । अविसेसिए हेट्ठिमगेवेज्जए, विसेसिए हेट्ठिमहेट्ठिमगेवेज्जए हेट्ठिममज्झिमगेवेज्जए हेट्ठिमउवरिमगेवेज्जए । अविसेसिए मज्झिमगेवेज्जए, विसेसिए मज्झिमहेट्ठिमगेवेज्जए मज्झिममज्झिमगेवेज्जए मज्झिमउवरिमगेवेज्जए । अविसेसिए उवरिमगेवेज्जए, विसेसिए उवरिमहेट्ठिमगेवेज्जए उवरिममज्झिमगेवेज्जए उवरिमउवरिमगेवेज्जए । एतेसिं पि सव्वेसिं अविसेसिय-विसेसिय-पज्जत्तय-अपज्जत्तयभेदा भाणियव्वा । [१८] अविसेसिए अणुत्तरोववाइए, विसेसिए विजयए वेजयंतए जयंतए अपराजियए सव्वट्ठिसिद्धए । एतेसिं पि सव्वेसिं अविसेसिय-विसेसिय-पज्जत्तय-अपज्जत्तयभेदा भाणियव्वा । [१९] अविसेसिए अजीवदव्वे, विसेसिए धम्मत्थिकाए अधम्मत्थिकाए आगासत्थिकाए पोग्गलत्थिकाए अब्बसमए

य । अविसेसिए पोग्गलत्थिकाए, विसेसिए परमाणुपोग्गले दुपएसिए जाव अणंतपएसिए । से तं दुनामे । २१७. से किं तं तिनामे ? २ तिविहे पण्णत्ते । तं जहा-दव्वणामे १ गुणणामे २ पज्जवणामे य ३ । २१८. से किं तं दव्वणामे ? २ छव्विहे पण्णत्ते । तं जहा-धम्मत्थिकाए १ अधम्मत्थिकाए २ आगासत्थिकाए ३ जीवत्थिकाए ४ पोग्गलत्थिकाए ५ अब्धसमए ६ अ । से तं दव्वणामे । २१९. से किं तं गुणणामे ? २ पंचविहे पण्णत्ते । तं जहा-वण्णणामे १ गंधणामे २ रसणामे ३ फासणामे ४ संठाणणामे ५ । २२०. से किं तं वण्णणामे ? पंचविहे पण्णत्ते । तं जहा-कालवण्णणामे १ नीलवण्णणामे २ लोहियवण्णणामे ३ हालिद्ववण्णणामे ४ सुक्किलवण्णणामे ५ । से तं वण्णणामे । २२१. से किं तं गंधणामे ? २ दुविहे पण्णत्ते । तं जहा-सुरभिगंधणामे य १ दुरभिगंधणामे य २ । से तं गंधणामे । २२२. से किं तं रसणामे ? २ पंचविहे पण्णत्ते । तं जहा-तित्तरसणामे १ कडुयरसणामे २ कसायरसणामे ३ अंबिलरसणामे ४ महुररसणामे य ५ । से तं रसणामे । २२३. से किं तं फासणामे ? २ अट्टविहे पण्णत्ते । तं जहा-कक्खडफासणामे १ मउयफासणामे २ गरुयफासणामे ३ लहुयफासणामे ४ सीतफासणामे ५ उसिणफासणामे ६ णिद्धफासणामे ७ लुक्खफासणामे ८ । से तं फासणामे । २२४. से किं तं संठाणणामे ? २ पंचविहे पण्णत्ते । तं जहा-परिमंडलसंठाणणामे १ वट्टसंठाणणामे २ तंससंठाणणामे ३ चउरंससंठाणणामे ४ आयातसंठाणणामे ५ । से तं संठाणणामे । से तं गुणणामे । २२५. से किं तं पज्जवणामे ? २ अणेगविहे पण्णत्ते । तं जहा-एगगुणकालए दुगुणकालए जाव अणंतगुणकालए, एगगुणनीलए दुगुणनीलए जाव अणंतगुणनीलए, एवं लोहिय-हालिद्व-सुक्किला वि भाणियव्वा । एगगुणसुरभिगंधे दुगुणसुरभिगंधे जाव अणंतगुणसुरभिगंधे, एवं दुरभिगंधो वि भाणियव्वो । एगगुणतित्ते दुगुणतित्ते जाव अणंतगुणतित्ते, एवं कडुय-कसाय-अंबिल-महुरा वि भाणियव्वा । एगगुणकक्खडे दुगुणकक्खडे जाव अणंतगुणकक्खडे, एवं मउय-गरुय-लहुय-सीत-उसिण-णिद्ध-लुक्खा वि भाणियव्वा । से तं पज्जवणामे । २२६. तं पुण्णामं तिविहं इत्थी १ पुरिसं २ णपुंसं ३ चेव । एएसिं तिहं पि य अंतिम्मि परूवणं वोच्छं ॥१८॥ तत्थ पुरिसस्स अंता आ ई ऊ ओ य होंति चत्तारि । ते चेव इत्थियाए हवंति ओकारपरिहीणा ॥१९॥ अंति य इति य उंति य अंता उ णपुंसगस्स बोद्धव्वा । एतेसिं तिहं पि य वोच्छामि निदंसणे एत्तो ॥२०॥ आकारंतो राया ईकारंतो गिरी य सिहरी य । ऊकारंतो विण्हू दुमो ओअंताओ पुरिसाणं ॥२१॥ आकारंता माला ईकारंता सिरी य लच्छी य । ऊकारंता जंबू वहु य अंता उ इत्थीणं ॥२२॥ अंकारंतं धन्नं इंकारंतं नपुंसकं अच्छिं । उंकारंतं पीलुं महुं च अंता णपुसाणं ॥२३॥ से तं तिणामे । २२७. से किं तं चतुणामे ? २ चउव्विहे पण्णत्ते । तं जहा-आगमेणं १ लोवेणं २ पयईए ३ विगारेणं ४ । २२८. से किं तं आगमेणं ? २ पद्धानि पयांसि कुण्डानि । से तं आगमेणं । २२९. से किं तं लोवेणं ? २ ते अत्र तेऽत्र, पटो अत्र पटोऽत्र, घटो अत्र घटोऽत्र, रथो अत्र रथोऽत्र । से तं लोवेणं । २३०. से किं तं पगतीए ? अग्गी एतौ, पटू इमौ, शाले एते, माले इमे । से तं पगतीए । २३१. से किं तं विकारेणं ? २ दण्डस्य अग्रं दण्डाग्रम्, सा आगता साऽऽगता, दधि इदं दधीदम्, नदी ईहते नदीहते, मधु उदकं मधूदकम्, बहु ऊहते बहूहते । से तं विकारेणं । से तं चउणामे । २३२. से किं तं पंचणामे ? २ पंचविहे पण्णत्ते । तं जहा-नामिकं १ नैपातिकं २ आख्यातिकं ३ औपसर्गिकं ४ मिश्रं ५ च । अश्व इति नामिकम्, खल्विति नैपातिकम्, धावतीत्याख्यातिकम् परि इत्यौपसर्गिकम्, संयत इति मिश्रम् । से तं पंचणामे । २३३. से किं तं छणामे ? २ छव्विहे पण्णत्ते । तं जहा-उदइए १ उवसमिए २ खइए ३ खओवसमिए ४ पारिणामिए ५ सन्निवातिए ६ । २३४. से किं तं उदइए ? २ दुविहे पण्णत्ते । तं जहा-उदए य १ उदयनिप्फण्णे य २ । २३५. से किं तं उदए ? २ अट्टण्हं कम्मपगडीणं उदएणं । से तं उदए । २३६. से किं तं उदयनिप्फण्णे ? २ दुविहे पण्णत्ते । तं जहा-जीवोदयनिप्फण्णे य १ अजीवोदयनिप्फण्णे य २ । २३७. से किं तं जीवोदयनिप्फण्णे ? २ अणेगविहे पण्णत्ते । तं जहा-णेरइए तिरिक्खजोणिए मणुस्से देवे, पुढविकाइए जाव वणस्सइकाइए तसकाइए, कोहकसायी जाव लोहकसायी, इत्थीवेदए पुरिसवेदए णपुंसगवेदए, कण्हलेसे एवं नील० काउ० तेउ० पम्ह० सुक्कलेसे, मिच्छादिट्ठी अविरए अण्णाणी आहारए छउमत्थे सजोगी संसारत्थे असिद्धे । से तं जीवोदयनिप्फण्णे । २३८. से किं तं अजीवोदयनिप्फण्णे ? २ चोद्वसविहे पण्णत्ते । तं जहा-ओरालियं वा सरीरं १ ओरालियसरीरपयोगपरिणामियं वा दव्वं २ वेउव्वियं वा सरीरं ३ वेउव्वियसरीरपयोगपरिणामियं वा दव्वं ४ एवं आहारं सरीरं ६ तेयं सरीरं ८ कम्मं सरीरं

च भाणियव्वं १०, पयोगपरिणामिए वण्णे ११ गंधे १२ रसे १३ फासे १४ । से तं अजीवोदयनिप्फण्णे । से तं उदयनिप्फण्णे । से तं उदए । २३९. से किं तं उवसमिए ? २ दुविहे पण्णत्ते । तं जहा-उवसमे य १ उवसमनिप्फण्णे य २ । २४०. से किं तं उवसमे ? २ मोहणिज्जस्स कम्मस्स उवसमेणं । से तं उवसमे । २४१. से किं तं उवसमनिप्फण्णे ? २ अणेगविहे पण्णत्ते । तं जहा-उवसंतकोहे जाव उवसंतलोभे उवसंतपेज्जे उवसंतदोसे उवसंतदंसणमोहणिज्जे उवसंतचरित्तमोहणिज्जे उवसंतमोहणिज्जे उवसमिया सम्मत्तलद्धी उवसमिया चरित्तलद्धी उवसंतकसायछउमत्थवीतरागे । से तं उवसमनिप्फण्णे । से तं उवसमिए । २४२. से किं तं खइए ? २ दुविहे पण्णत्ते । तं जहा-खए य १ खयनिप्फण्णे य २ । २४३. से किं तं खए ? २ अट्टण्हं कम्मपगडीणं खएणं । से तं खए । २४४. से किं तं खयनिप्फण्णे ? २ अणेगविहे पण्णत्ते । तं जहा-उप्पण्णणाण-दंसणधरे अरहा जिणे केवली खीणआभिणिबोहियणाणावरणे खीणसुयणाणावरणे खीणओहिणाणावरणे खीणमणपज्जवणाणावरणे खीणकेवलणाणावरणे अणावरणे णिरावरणे खीणावरणे णाणावरणिज्जकम्मविप्पमुक्के, केवलदंसी सव्वदंसी खीणनिद्धे खीणनिद्धानिद्धे खीणपयले खीणपयत्तापयले खीणथीणगिद्धे खीणचक्खुदंसणावरणे खीणअचक्खुदंसणावरणे खीणओहिदंसणावरणे खीणकेवलदंसणावरणे अणावरणे निरावरणे खीणावरणे दरिसणावरणिज्जकम्मविप्पमुक्के, खीणसायवेयणिज्जे खीणअसायवेयणिज्जे अवेयणे निव्वेयणे खीणवेयणे सुभाऽसुभवेयणिज्जकम्मविप्पमुक्के, खीणकोहे जाव खीणलोभे खीणपेज्जे खीणदोसे खीणदेसणमोहणिज्जे खीणचरित्तमोहणिज्जे अमोहे निम्मोहे खीणमोहे मोहणिज्जकम्मविप्पमुक्के, खीणणेरइयाउए खीणतिरिक्खजोणियाउत्रए खीणमणुस्साउए खीणदेवाउए अणाउए निराउए खीणउए आउयकम्मविप्पमुक्के, गति-जाति-सरीरंगोवंग-बंधण-संघात-संघतण-अणेगबोदिवंदंसंघायविप्पमुक्के खीणसुभनामे खीणासुभनामे अणामे निण्णामे खीणनामे सुभाऽसुभनामकम्मविप्पमुक्के, खीणउच्चागोए खीणणीयागोए अगोए निगोए खीणगोए सुभाऽसुभगोत्तकम्मविप्पमुक्के, खीणदाणंतरराए खीणलाभंतरराए खीणभोगंतरराए खीणवभोगंतरराए खीणविरियंतरराए अणंतरराए णिरंतरराए खीणंतरराए अंतराइयकम्मविप्पमुक्के, सिद्धे बुद्धे मुत्ते परिणिव्वुए अंतगडे सव्वदुक्खप्पहीणे । से तं खयनिप्फण्णे । से तं खइए । २४५. से किं तं खओवसमिए ? २ दुविहे पण्णत्ते । तं जहा-खओवसमे य १ खओवसमनिप्फण्णे य २ । २४६. से किं तं खओवसमे ? २ चउण्हं घाइकम्माणं खओवसमेणं । तं जहा-नाणावरणिज्जस्स १ दंसणावरणिज्जस्स २ मोहणिज्जस्स ३ अंतराइयस्स ४ । से तं खओवसमे । २४७. से किं तं खओवसमनिप्फण्णे ? २ अणेगविहे पण्णत्ते । तं जहा-खओवसमिया आभिणिबोहियणाणलद्धी जाव खओवसमिया मणपज्जवणाणलद्धी, खओवसमिया मतिअण्णाणलद्धी खओवसमिया सुयअण्णाणलद्धी खओवसमिया विभंगणाणलद्धी, खओवसमिया चक्खुदंसणलद्धी एवमचक्खुदंसणलद्धी ओहिदंसणलद्धी, एवं सम्मदंसणलद्धी मिच्छादंसणलद्धी सम्मामिच्छादंसणलद्धी, खओवसमिया सामाइयचरिइलद्धी एवं छेदोवट्ठावणलद्धी परिहारविसुद्धियलद्धी सुहुमसंपराइयलद्धी एवं चरित्ताचरित्तलद्धी, खओवसमिया दाणलद्धी एवं लाभ० भोग० उवभोग० खओवसमिया वीरियलद्धी एवं पंडियवीरियलद्धी बालवीरियलद्धी बालपंडियवीरियलद्धी, खओवसमिया सोइंदियलद्धी जाव खओवसमिया फासिंदियलद्धी, खओवसमिए आयारधरे एवं सूयगडधरे ठाणधरे समवायधरे विवाहपण्णत्तिधरे एवं नायाधम्मकहा० उवासगदसा० अंतगडदसा० अणुत्तरोववाइयदसा० पण्हावागरण० खओवसमिए विवागसुयधरे खओवसमिए दिट्ठिवायधरे, खओवसमिए णवपुव्वी जाव चोद्दसपुव्वी, खओवसमिए गणी खओवसमिए वायए । से तं खओवसमनिप्फण्णे । से तं खओवसमिए । २४८. से किं तं पारिणामिए ? २ दुविहे पण्णत्ते । तंजहा-सादिपारिणामिए य १ अणादिपारिणामिए य २ । २४९. से किं तं सादिपारिणामिए ? २ अणेगविहे पण्णत्ते । तं जहा- जुण्णसुरा जुण्णगुलो जुण्णघयं जुण्णतंदुला चेष । अब्भा य अब्भरुक्खा संझा गंधव्वणगरा य ॥२४॥ उक्कावाया दिसादाघा गज्जियं विज्जू णिग्घाया जूवया जक्खालित्ता धूमिया महिया रयुग्घाओ चंदोवरागा सूरुवरागा चंदपरिवेसा सूरपरिवेसा पडिचंदया पडिसूरया इंदधणू उदगमच्छा कविहसिया अमोहा वासा वासधरा गामा णगरा घरा पव्वता पायाला भवणा निरया रयणप्पभा सक्करप्पभा वालुयप्पभा पंकप्पभा धूमप्पभा तमा तमतमा सोहम्मि ईसाणे जाव आणए पाणए आरणे अच्चुए गेवेज्ज अणुत्तरोववाइया ईसीपब्भारा परमाणुपोग्गले दुपदेसिए जाव अणंतपदेसिए । से तं सादिपारिणामिए । २५०. से किं तं

अणादिपारिणामिए ? २ धम्मत्थिकाए अधम्मत्थिकाए आगासत्थिकाए जीवत्थिकाए पोग्गलत्थिकाए अब्बसमए लोए अलोए भवसिद्धिया अभवसिद्धिया । से तं अणादिपारिणामिए । से तं पारिणामिए । २५१. से किं तं सण्णिवाइए ? २एतेसिं चैव उदइय-उवसमिय-खइय-खओवसमिय-पारिणामियाणं भावाणं दुयसंजोएणं तियसंजोएणं चउक्कसंजोएणं पंचगसंजोएणं जे निप्पज्जंति सव्वे से सन्निवाइए नामे । तत्थ णं दस दुगसंजोगा, दस तिगसंजोगा, पंच चउक्कसंजोगा, एक्के पंचगसंजोगे । २५२. तत्थ णं जे ते दस दुगसंजोगा ते णं इमे-अत्थे णामे उदइए उवसमनिप्पण्णे १ अत्थि णामे उदइए खयनिप्पण्णे २ अत्थि णामे उदइए खओवसमनिप्पण्णे ३ अत्थि णामे उदइए पारिणामियनिप्पण्णे ४ अत्थि णामे उवसमिए खयनिप्पण्णे ५ अत्थि णामे उवसमिए खओवसमनिप्पण्णे ६ अत्थि णामे उवसमिए पारिणामियनिप्पण्णे ७ अत्थि णामे खइए खओवसमनिप्पण्णे ८ अत्थि णामे खइए पारिणामियनिप्पण्णे ९ अत्थि णामे खयोवसमिए पारिणामियनिप्पण्णे १० । २५३. कतरे से नामे उदइए उवसमनिप्पण्णे ? उदए त्ति मणूसे उवसंता कसाया, एस णं से णामे उदइए उवसमनिप्पण्णे १ । कतरे से नामे उदइए खयनिप्पण्णे ? उदए त्ति मणूसे खतियं सम्मत्तं, एस णं से नामे उदइए खयनिप्पण्णे २ । कतरे से णामे उदइए खयोवसमनिप्पण्णे ? उदए त्ति मणूसे खयोवसमियाइं इंदियाइं, एस णं से णामे उदइए खयोवसमनिप्पण्णे ३ । कतरे से णामे उदइए पारिणामियनिप्पण्णे ? उदए त्ति मणूसे पारिणामिए जीवे, एस णं से णामे उदइए पारिणामियनिप्पण्णे ४ । कतरे से णामे उवसमिए खयनिप्पण्णे ? उवसंता कसाया खइयं सम्मत्तं, एस णं से णामे उवसमिए खयनिप्पण्णे ५ । कतरे से णामे उवसमिए खओवसमनिप्पण्णे ? उवसंता कसाया खओवसमियाइं इंदियाइं, एस णं से णामे उवसमिए खओवसमनिप्पण्णे ६ । कतरे से णामे उवसमिए पारिणामियनिप्पण्णे ? उवसंता कसाया पारिणामिए जीवे, एस णं से णामे उवसमिए पारिणामियनिप्पण्णे ७ । कतरे से णामे खइए खओवसमियनिप्पण्णे ? खइयं सम्मत्तं खयोवसमियाइं इंदियाइं, एस णं से णामे खइए खयोवसमनिप्पण्णे ८ । कतरे से णामे खइए पारिणामियनिप्पण्णे ? खइयं सम्मत्तं पारिणामिए जीवे, एस णं से णामे खइए पारिणामियनिप्पण्णे ९ । कतरे से णामे खयोवसमिए पारिणामियनिप्पण्णे ? खयोवसमियाइं इंदियाइं पारिणामिए जीवे, एस णं से णामे खयोवसमिए पारिणामियनिप्पण्णे १० । २५४. तत्थ णं जे ते दस तिगसंजोगा ते णं इमे-अत्थि णामे उदइए उवसमिए खयनिप्पण्णे १, अत्थि णामे उदइए उवसमिए खओवसमनिप्पण्णे २, अत्थि णामे उदइए उवसमिए पारिणामियनिप्पण्णे ३, अत्थि णामे उदइए खइए खओवसमनिप्पण्णे ४, अत्थि णामे उदयिए खइए पारिणामियनिप्पण्णे ५, अत्थि णामे उदइए खयोवसमिए पारिणामियनिप्पण्णे ६, अत्थि णामे उवसमिए खइए खओवसमनिप्पण्णे ७, अत्थि णामे उवसमिए खइए पारिणामियनिप्पण्णे ८, अत्थि णामे उवसमिए खओवसमिए पारिणामियनिप्पण्णे ९, अत्थि णामे खइए खओवसमिए पारिणामियनिप्पण्णे १० । २५५. कतरे से णामे उदइए उवसमिए खयनिप्पण्णे ? उदए त्ति मणूसे उवसंता कसाया खइयं सम्मत्तं, एस णं से णामे उदइए उवसमिए खयनिप्पण्णे १ । कतरे से णामे उदइए उवसमिए खयोवसमियनिप्पण्णे ? उदए त्ति मणूसे उवसंता कसाया खयोवसमियाइं इंदियाइं, एस णं से णामे उदइए उवसमिए खओवसमनिप्पण्णे २ । कतरे से णामे उदइए उवसमिए पारिणामियनिप्पण्णे ? उदए त्ति मणूसे उवसंता कसाया पारिणामिए जीवे, एस णं से णामे उदइए उवसमिए पारिणामियनिप्पण्णे ३ । कतरे से णामे उदइए खइए खओवसमनिप्पण्णे ? उदए त्ति मणूसे खइयं सम्मत्तं खओवसमियाइं इंदियाइं, एस णं से णामे उदइए खइए खओवसमनिप्पण्णे ४ । कतरे से णामे उदइए खइए पारिणामियनिप्पण्णे ? उदए त्ति मणूसे खइयं सम्मत्तं पारिणामिए जीवे, एस णं से नामे उदइए खइए पारिणामियनिप्पण्णे ५ । कतरे से णामे उदइए खओवसमिए पारिणामियनिप्पण्णे ? उदए त्ति मणूसे खयोवसमियाइं इंदियाइं पारिणामिए जवि, एस णं से णामे उदइए खओवसमिए पारिणामियनिप्पण्णे ६ । कतरे से णामे उवसमिए खइए खओवसमनिप्पण्णे ? उवसंता कसाया खइयं सम्मत्तं खओवसमियाइं इंदियाइं, एस णं से णामे उवसमिए खइए खओवसमनिप्पण्णे ७ । कतरे से णामे उवसमिए खइए पारिणामियनिप्पण्णे ? उवसंता कसाया खइयं सम्मत्तं पारिणामिए जीवे, एस णं से णामे उवसमिए खइए पारिणामियनिप्पण्णे ८ । कतरे से णामे उवसमिए खओवसमिए पारिणामियनिप्पण्णे ? उवसंता कसाया खओवसमियाइं इंदियाइं पारिणामिए जीवे, एस णं से णामे उवसमिए खओवसमिए पारिणामियनिप्पण्णे ९ । कतरे से णामे खइए खओवसमिए पारिणामियनिप्पण्णे ? खइयं सम्मत्तं खओवसमियाइं

इंदियाइं पारणामिए जीवे, एस णं से णामे खइए खयोवसमिए पारिणामियनिप्पन्ने १० । २५६. तत्थ णं जे ते पंच चउक्कसंयोगा ते णं इमे-अत्थि णामे उदइए उवसमिए खइए खओवसमनिप्पन्ने १ अत्थि णामे उदइए उवसमिए खइए पारिणामियनिप्पन्ने २ अत्थि णामे उदइए उवसमिए खयोवसमिए पारिणामियनिप्पन्ने ३ अत्थि णामे उदइए खइए खओवसमिए पारिणामियनिप्पन्ने ४ अत्थि णामे उवसमिए खइए खओवसमिए पारिणामियनिप्पन्ने ५ । २५७. कतरे से णामे उदइए उवसमिए खइए खओवसमनिप्पन्ने ? उदए त्ति मणूसे उवसंता कसाया खइयं सम्मत्तं खओवसमियाइं इंदियाइं, एस णं से णामे उदइए उवसमिए खइए खओवसमनिप्पन्ने १ । कतरे से नामे उदइए उवसमिए खइए पारिणामियनिप्पन्ने ? उदए त्ति मणूसे उवसंता कसाया खइयं सम्मत्तं पारिणामिए जीवे, एस णं से णामे उदइए उवसमिए खओवसमिए पारिणामियनिप्पन्ने ३ । कतरे से णामे उदइए खइए खओवसमिए पारिणामियनिप्पन्ने ? उदए त्ति मणूसे खइयं सम्मत्तं खओवसमिए इंदियाइं पारिणामिए जीवे, एस णं से नामे उदइए खइए खओवसमिए पारिणामियनिप्पन्ने ४ । कतरे से नामे उवसमिए खइए खओवसमियाइं इंदियाइं पारिणामिए जीवे, एस णं से नामे उवसमिए खइए खओवसमिए पारिणामियनिप्पन्ने ५ । २५८. तत्थ णं जे से एक्के पंचकसंजोगे से णं इमे-अत्थि नामे उदइए उवसमिए खइए खओवसमिए पारिणामियनिप्पन्ने १ । २५९. कतरे से नामे उदइए उवसमिए खइए खओवसमिए पारिणामियनिप्पन्ने ? उदए त्ति मणूसे उवसंता कसाया खइयं सम्मत्तं खओवसमियाइं इंदियाइं पारिणामिए जीवे, एस णं से णामे उदइए उवसमिए खइए खओवसमिए पारिणामियनिप्पन्ने । से तं सत्तिवाइए । से तं छण्णामे । २६०. [१]. से किं तं सत्तनामे ? २ सत्त सरा पण्णत्ता । तं जहा— सज्जे १ रिसभे २ गंधारे ३ मज्झिमे ४ पंचमे सरे ५ । धेवए ६ चेव णेसाए ७ सरा सत्त वियाहिया ॥२५॥ [२] एएसि णं सत्तण्हं सराणं सत्त सरट्ठाणा पण्णत्ता । तं जहा— सज्जं च अग्गजीहाए १ उरेण रिसहं सरं २ । कंठुग्गतेण गंधारं ३ मज्झजीहाए मज्झिमं ४ ॥२६॥ नासाए पंचमं बूया ५ दंतोद्वेण य धेवतं ६ । भमुहक्खेवेण णेसायं ७ सरट्ठाणा वियाहिया ॥२७॥ [३] सत्त सरा जीवणिसिया पण्णत्ता । तं जहा— सज्जं खइ मयूरो १ कुक्कुडो रिसभं सरं २ । हंसो खइ गंधारं ३ मज्झिमं तु गवेलगा ४ ॥२८॥ अह कुसुमसंभवे काले कोइला पंचमं सरं ५ । छट्ठं च सारसा कुंचा ६ णेसायं सत्तमं गओ ७ ॥२९॥ [४] सत्त सरा अजीवणिसिया पण्णत्ता । तं जहा— सज्जं रवइ मुयंगो १ गोमुही रिसहं सर २ । संखो रवइ गंधारं ३ मज्झिमं पुण झल्लरी ४ ॥३०॥ चउचलणपतिट्ठाणा गोहिया पंचमं सरं ५ । आडंबरो धेवइयं ६ महाभेरी य सत्तमं ७ ॥३१॥ [५] एएसि णं सत्तण्हं सराणं सत्त सरलक्खणा पण्णत्ता । तं जहा— सज्जेण लहइ वित्तिं कयं च न विणस्सई । गावो पुत्ता य मित्ता य नारीणं होति वल्लहो १ ॥३२॥ रिसहेणं तु एसज्जं सेणावच्चं धणाणि य । वत्थ गंधमलंकारं इत्थीओ सयणाणि य २ ॥३३॥ गंधारे गीतजुत्तिण्णा वज्जवित्ती कलाहिया । हवंति कइणो पण्णा जे अण्णे सत्थपारगा ३ ॥३४॥ मज्झिमसरमंता उ हवंति सुहजीविणो । खायती पियती देती मज्झिमस्सरमस्सिओ ४ ॥३५॥ पंचमस्सरमंता उ हवंती पुहवीपती । सूरा संगहकत्तारो अणेणरणायगा ५ ॥३६॥ धेवयसरमंता उ हवंति कलहप्पिया । साउणिया वग्गुरिया सोयरिया मच्छबंधा य ६ ॥३७॥ चडाला मुट्ठिया मेता, जे यऽण्णे पावकारिणो । गोघातगा य चोरा य नेसातं सरमस्सिता ७ ॥३८॥ [६] एतेसि णं सत्तण्हं सराणं तयो गामा पण्णत्ता । तं जहा— सज्जग्गामे १ मज्झिमग्गामे २ गंधारग्गामे ३ । [७] सज्जग्गामस्स णं सत्त मुच्छणाओ पण्णत्ताओ । तं जहा— मंगी कोरव्वीया हरी य रयणी य सारकंता य । छट्ठी य सारसी नाम सुद्धसज्जा य सत्तमा ॥३९॥ [८] मज्झिमग्गामस्स णं सत्त मुच्छणाओ पण्णत्ताओ । तं जहा उत्तरमंदा रयणी उत्तरा उत्तरायसा(ता) । अस्सोकंता य सोवीरा अभीरू भवति सत्तमा ॥४०॥ [९] गंधारग्गामस्स णं सत्त मुच्छणाओ पण्णत्ताओ । तं जहा नंदी य खुड्ढिमा पूरिमा य चउथी य सुद्धगंधारा । उत्तरगंधारा वि य पंचमिया हवइ मुच्छा उ ॥४१॥ सुद्धत्तरमायामा सा छट्ठा नियमसो उ णायव्वा । अहउत्तरायता कोडिमा य सा सत्तमी मुच्छा ॥४२॥ [१०] सत्त स्सरा कतो संभवति ? गीयस्स का हवति जोणी ? कतिसमया ऊसासा ? कति वा गीयस्स आगारा ? ॥४३॥ सत्त सरा नाभीओ संभवति, गीतं च रुन्नजोणीयं । पायसमा उस्सासा, तिण्णि य गीयस्स आगारा ॥४४॥ आदिमउ आरभंता, समुव्वहंता य मज्झगारम्मि । अवसाणे य झवेता, तिन्नि वि गीयस्स आगारा ॥४५॥ [११] छ दोसे अट्ठ गुणे तिण्णि य वित्ताणि दोण्णि भण्णित्तीओ । जो णाही सो गाहिति सुसिक्खितो रंगमज्झम्मि ॥४६॥ भीयं दुयं

दुयमुप्पिच्छं उत्तालं च कमसो मुणयव्वं । काकस्सरमणुनासं छ द्दोसा होंति गीयस्स ॥४७॥ पुण्णं रत्तं च अलंकियं च वत्तं तहेवमविघुट्ठं । महुरं समं सुललियं अट्ट गुणा होंति गीयस्स ॥४८॥ उर-कंठ-सिरविसुद्धं च गिज्जते मउय-रिभियपदबद्धं । समताल पडुक्खेवं सत्तस्सरसीभरं गीयं ॥४९॥ अक्खरसमं पयसमं तालसमं लयसमं गहसमं च । निस्ससिउस्ससियसमं संचारसमं झरा सत्त ॥५०॥ निद्दोसं सारवंतं च हेउजुत्तमलंकियं । उवणीयं सोवयारं च मियं महुरमेव य ॥५१॥ समं अब्बसमं चेव सव्वत्थ विसमं च जं । तिण्णि वित्तप्पयाराइं चउत्थं नोवलब्भइ ॥५२॥ सक्कया पायया चेव भणिईओ होंति दुण्णि उ । सरमंडलम्मि गिज्जंते पसत्था इसिभासिया ॥५३॥ [१२] केसी गायति महुरं ? केसी गायति खरं च रुक्खं च ? । केसी गायति चउरं ? केसी य विलंबियं ? दुत्तं केसी ? विस्सरं पुण केरिसी ? ॥५४॥ पंचपदी सामा गायति महुरं, काली गायति खरं च रुक्खं च । गोरी गायति चउरं, काणा य विलंबियं, दुत्तं अंधा, विस्सरं पुण पिंगला ॥५५॥ पंचपदी सत्त स्सरा तयो गामा मुच्छणा एक्कवीसतिं । ताणा एगूणपण्णासं सम्मत्तं सरमंडलं ॥५६॥ से तं सत्तनामे । २६१. से किं तं अट्टनामे ? २ अट्टविहा वयणविभत्ती पण्णत्ता । तं जहा- निद्दोसे पढमा होति १ बितिया उवदेसणे २ । तइया करणम्मि कया ३ चउत्थी संपयावणे ४ ॥५७॥ पंचमी य अपायाणे ५ छट्ठी सस्सामिवायणे ६ । सत्तमी सण्णिधाणत्थे ७ अट्टमाऽऽमंतणी भवे ८ ॥५८॥ तत्थ पढमा विभत्ती निद्दोसे सो इमो अहं व त्ति १ । रितिया पुण उवदेसे भण कुणसु इमं व तं व त्ति २ ॥५९॥ ततिया करणम्मि कया भाणियं व कयं व तेण व मए वा ३ । हंदि णमो साहाए हवति चउत्थी पयाणम्मि ४ ॥६०॥ अवणय गिण्ह य एत्तो इतो त्ति वा पंचमी अपायाणे ५ । छट्ठी तस्स इमस्स व गयस्स वा सामिसंबंधे ६ ॥६१॥ हवति पुण सत्तमी तं इमम्मि आधार काल भावे य ७ । आमंतणी भवे अट्टमी उ जह हे जुवाण ! त्ति ८ ॥६२॥ से तं अट्टनामे । २६२ [१] . से किं तं नवनामे ? २ णव कव्वरसा पण्णत्ता । तं जहा- वीरो १ सिंगारो २ अब्भुओ य ३ रोद्दो य ४ होइ बोधव्वो । वेलणओ ५ बीभच्छो ६ हासो ७ कलुणो ८ पसंतो य ९ ॥६३॥ [२] तत्थ परिच्चायम्मि य १ तव-चरणे २ सत्तुजणविणासे य ३ । अणणुसय-धिति-परक्कमचिण्हो वीरो रसो होइ ॥६४॥ वीरो रसो जहा- सो णाम महावीरो जो रज्जं पयहिऊण पव्वइओ । काम-क्कोहमहासत्तुपक्खनिग्घायणं कुणइ ॥६५॥ [३] सिंगारो नाम रसो रतिसंजोगाभिला-ससंजणणो । मंडण-विलास-बिब्बोय-हास-लीला-रमणलिंगो ॥६६॥ सिंगारो रसो जहा- महुरं विलासललियं हिययुम्मादणकरं जुवाणाणं । सामा सद्दुदामं दाएती मेहलादामं ॥६७॥ [४] विम्हयकरो अप्पुवो व भूयपुवो व जो रसो होइ । सो हास-विसायुप्पत्तिलक्खणो अब्भुतो नाम ॥६८॥ अब्भुओ रसो जहा- अब्भुयतरमिह एत्तो अन्नं किं अत्थि जीवलोगम्मि । जं जिणवयणेणऽत्था तिकालजुत्ता वि णज्जंति ? ॥६९॥ [५] भयजणणरूव-सद्धंधकारचिंता-कहासमुप्पन्नो । सम्मोह-संभम-विसाय-मरणलिंगो रसो रोद्दो ॥७०॥ रोद्दो रसो जहा- भिउडीविडंबियमुहा ! संदट्टो ! इय रुहिरमोकिण्ण ! । हणासि पसुं असुरणिभा ! भीमरसिय ! अतिरोद्द ! रोद्दोऽसि ॥७१॥ [६] विणयोवयार-गुज्झ-गुरुदारमेरावतिक्रमुप्पण्णो । वेलणओ नाम रसो लज्जा-संकाकरणलिंगो ॥७२॥ वेलणओ रसो जहा- किं लोइयकरणीओ लज्जणियतरं ति लज्जिया होमो । वारिज्जम्मि गुरुजणो परिवंदइ जं वहुपोत्तिं ॥७३॥ [७] असुय-कुणव-दुद्धंसणसंजोगभ्भासगंधनिप्फण्णो । निव्वेयऽविहिंसालक्खणो रसो होइ बीभत्सो ॥७४॥ बीभत्सो रसो जहा- असुइमलभरियनिज्झर समावदुग्गंधि सव्वकालं पि । धण्णा उ सरीरकलिं बहुमलकलुसं विमुंचंति ॥७५॥ [८] रूय-वय-वेस-भासाविवरियविलंबणासमुप्पन्नो । हासो मणप्पहासो पकासलिंगो रसो होति ॥७६॥ हासो रसो जहा- पासुत्तमसीमंडीयपडिबुद्धं देयरं पलोयंती । ही ! जह थणभरकंपणपणमियमज्झा हसति सामा ॥७७॥ [९] पियविप्पयोग-बंध-वह-वाहि-विणवाय-संभमुप्पन्नो । सोचिय-विलविय-पव्वाय-रुन्नलिंगो रसो कलुणो ॥७८॥ कलुणो रसो जहा- पज्झातकिलामियं आहागयप्पुयच्छियं बहुसो । तस्स वियोगे पुत्तय ! दुब्बलयं ते मुहं जायं ॥७९॥ [१०] निद्दोसमणसमाहाणसंभवो जो पसंतभावेणं । अविकारलक्खणो सो रसो पसंतो त्ति णायव्वो ॥८०॥ पसंतो रसो जहा- सभ्भावनिव्विकारं उवसंत-पसंत-सोमदिट्ठीयं । ही ! जह मुणिणो सोहति मुहकमलं पीवरसिरीयं ॥८१॥ एए णव कव्वरसा बत्तीसादोसविहिसमुप्पण्णा । गाहाहिं मुणेयव्वा, हवंति सुद्धा व मीसा वा ॥८२॥ से तं नवनामे । २६३. से किं तं दसनामे ? दसविहे पण्णत्ते तं जहा - गोण्णे १ णो गोण्णे २ आयाणपदेणं ३ पडिपक्खपदेणं ४ पाहणयाए ५ अणादियसिद्धंतेणं

६ नामेणं ७ अवयवेणं ८ संजोगेणं ९ पमाणेणं १० । २६४. से किं तं गोण्णे ? २ खमतीति खमणो, तपतीति तपणो, जलतीति जलणो, पवतीति पवणो । से तं गोण्णे । २६५. से किं तं नोगोण्णे ? २ अकुंतो सकुंतो, अमुग्गो समुग्गो, अमुद्धो समुद्धो, अलालं पलालं, अकुलिया सकुलिया, नो पलं असतीति पलासो, अमातिवाहए मातिवाहए, अबीयवावए बीयवावए, नो इंदं गोवयतीति इंदगोवए । से तं नोगोण्णे । २६६. से किं तं आयाणपदेणं ? २ आवंती चातुरंगिज्जं असंखयं जण्णइज्जं पुरिसइज्जं एलइज्जं वीरियं धम्मो मग्गो समोसरणं ओहत्तद्विज्जं गंथे जमईयं । से तं आयाणपदेणं । २६७. से किं तं पडिपक्खपदेणं ? २ णवेषु गामा-ऽऽगर-णगर-खेड-कव्वड-मडंब-दोणमुह-पट्टणाऽऽसम-संवाह-सन्निवेशेषु निविस्समाणेषु असिवा सिवा, अग्गी सीयलो, विसं महुरं, कल्लालघरेसु अंबिलं साउयं, जे लत्तए से अलत्तए, जे लाउए से अलाउए, जे सुंभए से कुसुंभए, आलवंते विवलीयभासए । से तं पडिपक्खपदेणं । २६८. से किं तं पाहण्णयाए ? २ असोगवणे सत्तवण्णवणे चंपकवणे चूयवणे नागवणे पुन्नागवणे उच्छुवणे दक्खवणे सालवणे । से तं पाहण्णयाए । २६९. से किं तं अणादियसिद्धंतेणं ? २ धम्मत्थिकाए अधम्मत्थिकाए आगासत्थिकाए जीवत्थिकाए पोग्गलत्थिकाए अब्बासमए । से तं अणादियसिद्धंतेणं । २७०. से किं तं नामेणं ? २ पिउपियामहस्स नामेणं उन्नामियए । से तं नामेणं । २७१. से किं तं अवयवेणं ? २ सिंगी सिही विसाणी दाढी पक्खी खुरी णही वाली । दुपय चउप्पय बहुपय णंगूली केसरी ककुही ॥८३॥ परियरबंधेण भडं जाणेज्जा, महिलियं निवसणेणं । सित्थेण दोणपागं, कविं च एगाइ गाहाए ॥८४॥ से तं अवयवेणं । २७२. से किं तं संजोगेणं ? संजोगे चउव्विहे पण्णत्ते । तं जहा- दव्वसंजोगे १ खेत्तसंजोगे २ कालसंजोगे ३ भावसंजोगे ४ । २७३. से किं तं दव्वसंजोगे ? २ तिविहे पण्णत्ते । तं जहा-सचित्ते १ अचित्ते २ मीसए ३ । २७४. से किं तं सचित्ते ? २ गोहिं गोमिए, महिसीहिं माहिसिए, ऊरणीहिं ऊरणिए, उट्टीहिं उट्टवाले । से तं सचित्ते । २७५. से किं तं अचित्ते ? २ छत्तेण छत्ती, दंडेण दंडी, पडेण पडी, घडेण घडी, कडेण कडी । से तं अचित्ते । २७६. से किं तं मीसए ? २ हलेणं हालिए, सकडेणं साकडिए, रहेणं रहिए, नावाए नाविए । से तं मीसए । से तं दव्वसंजोगे । २७७. से किं तं खेत्तसंजोगे ? २ भारहे एरवए हेमवए एरण्णवए हरिवस्सए रम्मयवस्सए पुव्वविदेहए अवरविदेहए, देवकुरुए उत्तरकुरुए अहवा मागहए मालवए सोरट्टए मरहट्टए कोंकणए कोसलए । से तं खेत्तसंजोगे । २७८. से किं तं कालसंजोगे ? २ सुसमसुसमए सुसमए सुसमदूसमए दूसमसुसमए दूसमए दूसमदूसमए, अहवा पाउसए वासारत्तए सरदए हेमंतए वसंतए गिम्हए । से तं कालसंजोगे । २७९. से किं तं भावसंजोगे ? २ दुविहे पण्णत्ते । तं जहा-पसत्थे य १ अपसत्थे य २ । २८०. से किं तं पसत्थे ? २ नाणेणं नाणी, दंसणेणं दंसणी, चरित्तेणं चरित्ती । से तं पसत्थे । २८१. से किं तं अपसत्थे ? २ कोहेणं कोही, माणेणं माणी, मायाए मायी, लोभेणं लोभी । से तं अपसत्थे । से तं भावसंजोगे । से तं संजोगेणं । २८२. से किं तं पमाणेणं ? २ चउव्वि पण्णत्ते । तं जहा-णामप्पमाणे १ ठवणप्पमाणे २ दव्वप्पमाणे ३ भावप्पमाणे ४ । २८३. से किं तं नामप्पमाणे ? २ जस्स णं जीवस्स वा अजीवस्स वा जीवाण वा अजीवाण वा तदुभयस्स वा तदुभयाण वा पमाणे त्ति णामं कज्जति । से तं णामप्पमाणे । २८४. से किं तं ठवणप्पमाणे ? २ सत्तविहे पण्णत्ते । तं जहा- णक्खत्त-देवय-कुले पासंड-गणे य जीवियाहेउं । आभिप्पाउयणामे ठवणानामं तु सत्तविहं ॥८५॥ २८५. से किं तं नक्खत्तणामे ? २ कत्तियाहिं जाए कत्तिए कत्तिदिण्णे कत्तिधम्मे कत्तिसम्मे कत्तिदेवे कत्तिदासे कत्तिसेणे कत्तिरक्खिए । रोहिणीहिं जाए रोहिणिए रोहिणिदिन्ने रोहिणिधम्मे रोहिणिसम्मे रोहिणिदेवे रोहिणिदासे रोहिणिसेणे रोहिणिरक्खिए । एवं सव्वणक्खत्तेसु णामा भाणियव्वा । एत्थ संगहणिगाहाओ— कत्तिय १ रोहिणि २ मिगसिर ३ अद्दा ४ य पुणव्वसू ५ य पुस्से ६ य । तत्तो य अस्सिलेसा ७ मघाओ ८ दो फग्गुणीओ य ९-१० ॥८६॥ हत्थो ११ चित्ता १२ सादी १३ [य] विसाहा १४ तह य होइ अणुराहा १५ । जेट्ठा १६ मूलो १७ पुव्वसाढा १८ तह उत्तरा १९ चेव ॥८७॥ अभिई २० सवण २१ धणिट्ठा २२ सतिभिसदा २३ दो य होंति भद्दवया २४-२५ । रेवति २६ अस्सिणि २७ भरणी २८ एसा नक्खत्तपरिवाडी ॥८८॥ से तं नक्खत्तणामे । २८६. से किं तं देवयणामे ? २ अग्गिदेवयाहिं जाते अग्गिए अग्गिदिण्णे अग्गिधम्मे अग्गिसम्मे अग्गिदेवे अग्गिदासे अग्गिसेणे अग्गिरक्खिए । एवं पि सव्वनक्खत्तदेवतणामा भाणियव्वा । एत्थं पि य संगहणिगाहाओ, तं जहा- अग्गि १ पयावइ २ सोमे ३ रुद्दे ४ अदिती ५ बहस्सई ६ सप्पे ७ । पिति ८ भग ९ अज्जम १० सविया ११ तट्ठा

१२ वायू १३ य इंदगी १४ ॥८९॥ मित्तो १५ इंदो १६ णिरिती १७ आऊ १८ विस्सो १९ य बंभ २० विण्हू य २१ । वसु २२ वरुण २३ अय २४ विवद्धी २५ पूसे २६ आसे २७ जमे २८ चेव ॥९०॥ से तं देवयणामे । २८७. से किं तं कुलनामे ? २ उग्गे भोगे राइणणे खत्तिए इक्खागे णाते कोरव्वे । से तं कुलनामे । २८८. से किं तं पासंडनामे ? २ समणए पंडरंगए भिक्खू कावालियए तावसए परिव्वायगे । से तं पासंडनामे । २८९. से किं तं गणनामे ? २ मल्ले मल्लदिन्ने मल्लधम्ममे मल्लसम्ममे मल्लदेवे मल्लदासे मल्लसेणे मल्लरक्खिए । से तं गणनामे । २९०. से किं तं जीवियाहेउं ? २ अवकरए उक्कुरुडए उज्जियए कज्जवए सुप्पए । से तं जीवियाहेउं । २९१. से किं तं आभिप्पाउयनामे ? २ अंबए निंबए बबूलए पलासए सिणए पिलुयए करीरए । से तं आभिप्पाउयनामे । से तं ठवणप्पमाणे । २९२. से किं तं दव्वप्पमाणे ? २ छव्विहे पणत्ते । तं जहा-धम्मत्थिकाए जाव अब्बासमए । से तं दव्वप्पमाणे । २९३. से किं तं भावप्पमाणे ? २ चउव्विहे पणत्ते । तं जहा-सामासिए १ तद्धितए २ धातुए ३ निरुत्तिए ४ । २९४. से किं तं सामासिए ? २ सत्त समासा भवंति । तं जहा-दंदे १ य बहुव्वीही २ कम्मधारए ३ दिग्गु ४ य । तप्पुरिस ५ अव्वइभावे ६ एक्कसेसे ७ य सत्तमे ॥९१॥ २९५. से किं तं दंदे समासे ? २ दन्ताश्च ओष्ठौ च दन्तोष्ठम्, स्तनौ च उदरं च स्तनोदरम्, वस्त्रं च पात्रं च वस्त्रपात्रम्, अश्वश्च महिश्च अश्वमहिषम्, अहिश्च नकुलश्च अहिनकुलम् । से तं दंदे समासे । २९६. से किं तं बहुव्वीहिसमासे ? २ फुल्ला जम्मि गिरिम्मि कुडय-कलंबा सो इमो गिरी फुल्लियकुडय-कलंबो । से तं बहुव्वीहिसमासे । २९७. से किं तं कम्मधारयसमासे ? २ धवलो वसहो धवलवसहो, किण्हो मिगो किण्हमिगो, सेतो पटो सेतपटो, रत्तो पटो रत्तपटो । से तं कम्मधारयसमासे । २९८. से किं तं दिगुसमासे ? २ तिण्णि कडुगा तिकडुगं, तिण्णि महुराणि तिमहुरं, तिण्णि गुणा तिगुणं, तिण्णि पुरा तपुरं, तिण्णि सरा तिसरं, तिण्णि पुक्खरा तपुक्खरं, तिण्णि बिंदुवा तिबिंदुयं, तिण्णि पहा तिपहं, पंच णदीओ पंचणदं, सत्त गया सत्तगयं, नव तुरगा नवतुरगं, दस गामा दसगामं, दस पुरा दसपुरं । से तं दिगुसमासे । २९९. से किं तं तप्पुरिसे समासे ? २ तित्थे कागो तित्थकागो, वणे हत्थी वणहत्थी, वणे वराहो वणवराहो, वणे महिसो वणमहिसो, वणे मयूरो वणमयूरो । से तं तप्पुरिसे समासे । ३००. से किं तं अव्वइभावे समासे ? २ अणुगामं अणुणदीयं अणुफरिहं अणुचरियं । से तं अव्वइभावे समासे । ३०१. से किं तं एगसेसे समासे ? २ जहा एगो पुरिसो तहा बहवे पुरिसा जहा बहवे पुरिसा तहा एगो पुरिसो, जहा एगो करिसावणो तहा बहवे करिसावणा जहा बहवे करिसावणा तहा एगो करिसावणो, जहा एगो साली तहा बहवे सालिणो जहा बहवे सालिणो तहा एगो साली । से तं एगसेसे समासे । से तं सामासिए । ३०२. से किं तं तद्धियए ? २ कम्म १ सिप्प २ सिलोए ३ संजोग ४ समीवओ ५ य संजूहे ६ । इस्सरियाउव्वचेण ८ य तद्धितणामं तु अट्ठविहं ॥९२॥ ३०३. से किं तं कम्मणामे ? दीस्सिए सोत्तिए कप्पासिए सुत्तवेतालिए भंडवेतालिए कोलालिए, णरदावणिए । से तं कम्मनामे । ३०४. से किं तं सिप्पनामे ? २ वत्थिए तंतिए तुण्णाए तंतुवाए पट्टकारे देअहे वरुडे भुंजकारे कट्टकारे छत्तकारे वज्झकारे पोत्थकारे चित्तकारे दंतकारे लेप्पकारे कोट्टिमकारे । से तं सिप्पनामे । ३०५. से किं तं सिलोयनामे ? २ समणे माहणे सच्चतिही । से तं सिलोयनामे । ३०६. से किं तं संजोगनामे ? २ रण्णो ससुरए, रण्णो सालए, रण्णो सड्डुए, रण्णो जामाउए, रत्तो भगिणीवती । से तं संजोगनामे । ३०७. से किं तं समीवनामे ? २ गिरिस्स समीवे णगरं गिरिणगरं, विदिसाए समीवे णगरं वेदिसं, वेत्ताए समीवे णगरं वेत्तायडं, तगराए समीवे णगरं तगरायडं । से तं समीवनामे । ३०८. से किं तं संजूहनामे ? २ तरंगवतिकारे मलयवतिकारे अत्ताणुसट्टिकारे बिंदुकारे । से तं संजूहनामे । ३०९. से किं तं ईसरियनामे ? २ राईसरे तलवरे माडंबिए कोडुंबिए इब्भे सेट्टी सत्थवाहे सेणवई । से तं ईसरियनामे । ३१०. से किं तं अवच्चनामे ? २ तित्थयरमाया चक्कवट्टिमाया बलदेवमाया वासुदेवमाया रायमाया गणिमाया वायगमाया । से तं अवच्चनामे । से तं तद्धिते । ३११. से किं तं धाउए ? २ भू सत्तायां परस्मैभाषा, एध वृद्धौ, स्पर्द्ध संहर्षे, गाधृ प्रतिष्ठा-लिप्सयोग्रन्थे च, बाधृ लोडने । से तं धाउए । ३१२. से किं तं निरुत्तिए ? २ मद्यां शेते महिशः, भ्रमति च रौति च भ्रमरः, मुहुर्मुहुर्लसंति मुसलं, कचिरिव लम्बते त्थच्च करोति कपित्थं, चिदिति करोति खल्लं च भवति चिक्खल्लं, ऊर्ध्वकर्णः उलूकः,

खस्य माला मेखला । से तं निरुतिए । से तं भावप्पमाणे । से तं पमाणनामे । से तं दसनामे । से तं नामे । ॥ नामे त्ति पयं सम्मत्तां । [सुत्ताइं ३१३-५२०. पमाणदारां] ३१३. से किं तं पमाणे ? २ चउव्विहे पण्णत्ते । तं जहा—दव्वप्पमाणे १ खेत्तप्पमाणे २ कालप्पमाणे ३ भावप्पमाणे ४ । ३१४. से किं तं दव्वपमाणे ? २ दुविहे पण्णत्ते । तं जहा—पदेस-निप्फण्णे य १ विभागनिप्फण्णे य २ । ३१५. से किं तं पदेसनिप्फण्णे ।? २ परमाणुपोग्गले दुपएसिए जाव अणंतपदेसिए । से तं पदेसनिप्फण्णे । ३१६. से किं तं विभागनिप्फण्णे ? २ पंचविहे पण्णत्ते । तं जहा—माणे १ उम्माणे २ ओमाणे ३ गणिमे ४ पडिमाणे ५ । ३१७. से किं तं माणे ? २ दुविहे पण्णत्ते । तं जहा—धन्नामाणप्पमाणे य १ रसमाणप्पमाणे य २ । ३१८. से किं तं धण्णमाणप्पमाणे ? २ दो असतीओ पसती, दो पसतीओ सेतिया, चत्तारि सोतियाओ कुलओ, चत्तारि कुलया पत्थो चत्तारि पत्थया आढयं चत्तारि आढयाइं दोणो, सट्ठिं आढयाइं जहन्नए कुंभे, असीतिआढयाइं मज्झिमए कुंभे, आढयसतं उक्कोसए कुंभे, अट्टआढयसतिए वाहे । ३१९. एणं धण्णमाणप्पमाणेणं किं पओयणं ? एतेणं धण्णमाणप्पमाणेणं मुत्तोली-मुरव-इह्वर-अलिंद-अपवारिसंसियाणं धण्णाणं धण्णमाणप्पमाणनिव्वित्तिलक्खणं भवति । से तं धण्णमाणप्पमाणे । ३२०. से किं तं रसमाणप्पमाणे ? २ धण्णमाणप्पमाणाओ चउभागविवह्विए अब्भितरसिहाजुत्ते रसमाणप्पमाणे विहिज्जति । तं जहा—चउसट्ठिया ४, बत्तीसिया ८, सोलसिया १६, अट्टभाइया ३२, चउभाइया ६४, अब्दमाणी १२८, माणी २५६ । दो चउसट्ठियाओ बत्तीसिया, दो बत्तीसियाओ सोलसिया, दो सोलसियाओ अट्टभातिया, दो अट्टभाइयाओ चउभाइया, दो चउभाइयाओ अब्दमाणी, सो अब्दमाणीओ माणी । ३२१. एतेणं रसमाणप्पमाणेणं किं पओयणं ? एणं रसमाणप्पमाणेणं वारग-घडग-करग-किक्किरि-दइय-करोडि-कुंडियसंसियाणं रसाणं रसमाणप्पमाणनिव्वित्तिलक्खणं भवइ । से तं रसमाणप्पमाणे । से तं माणे । ३२२. से किं तं उम्माणे ? २ जण्णं उम्मिणिज्जइ । तं जहा—अब्दकरिसो करिसो अब्दपलं पलं अब्दतुला अब्दभारो भारो । दो अब्दकरिसा करिसो, दोकरिसा अब्दपलं, दो अब्दपलाइं पलं, पंचुत्तरपलसतिया तुला, दस तुलाओ अब्दभारो, वीसं तुलाओ भारो । ३२३. एणं उम्माणपमाणेणं किं पओयणं ? एतेणं उम्माणपमाणेणं पत्त-अगलु-तगर-चोयय-कुंकुम खंड-गुल-मच्छंडियादीणं दव्वाणं उम्माणपमाणनिव्वित्तिलक्खणं भवति । से तं उम्माणपमाणे । ३२४. से किं तं ओमाणे ? २ जण्णं ओमिणिज्जति । तं जहा—हत्थेण वा दंडेण वा धणुएण वा जुगेण वा णालियाए वा अक्खेण वा मुसलेण वा । दंडं धणू जुगं णालिया य अक्ख मुसलं च चउहत्थं । दसनालियं च रज्जुं वियाण ओमाणसण्णाए ॥९३॥ वत्थुम्मि हत्थमिज्जं खित्ते दंडं धणुं च पंथम्मि । खायं च नालियाए वियाण ओमाणसण्णाए ॥९४॥ ३२५. एतेणं ओमाणपमाणेणं किं पओयणं ? एतेणं ओमाणप्पमाणेणं खाय-चिय-करगचित-कड-पड-भित्ति-परिक्खेवसंसियाणं दव्वाणं ओमाणप्पमाणनिव्वित्तिलक्खणं भवति । से तं ओमाणे । ३२६. से किं तं गणिमे ? २ जण्णं गणिज्जति । तं जहा—एक्को दसगं सतं सहस्सं दससहस्साइं सतसहस्सं दससतसहस्साइं कोडी । ३२७. एतेणं गणिमप्पमाणेणं किं पओयणं ? एतेणं गणिमप्पमाणेणं भित्तग-भित्ति-भत्त-वेयण-आय-व्वयनिव्विसंसियाणं दव्वाणं गणिमप्पमाणनिव्वित्तिलक्खणं भवति । से तं गणिमे । ३२८. से किं तं पडिमाणे ? २ जण्णं पडिमिणिज्जइ । तं जहा—गुंजा कागणी निप्फावो कम्ममासओ मंडलओ सुवण्णो । पंच गुंजाओ कम्ममासओ, कागण्यपेक्षया चत्तारि कागणीओ कम्ममासओ । तिणि निप्फावा कम्ममासओ, एवं चउक्को कम्ममासओ । बारस कम्ममासया मंडलओ, एवं अडयालीसाए कागणीए मंडलओ । सोलस कम्ममासया सुवण्णो, एवं चउसट्ठीए कागणीए सुवण्णो । ३२९. एतेणं पडिमाणप्पमाणेणं किं पओयणं ? एतेणं पडिमाणप्पमाणेणं सुवण्ण-रजत-मणि-मोत्तिय-संख-सिल-प्पवालादीणं दव्वाणं पडिमाणप्पमाणनिव्वित्तिलक्खणं भवति । से तं पडिमाणे । से तं विभागनिप्फण्णे । से तं दव्वपमाणे । ३३०. से किं तं खेत्तप्पमाणे ? २ दुविहे पण्णत्ते । तं जहा—पदेसणिप्फण्णे य १ विभागणिप्फण्णे य २ । ३३१. से किं तं पदेसणिप्फण्णे ? २ एगपदेसोगाढे दुपदेसोगाढे जाव संखेज्जपदेसोगाढे असंखिज्जपदेसोगाढे । से तं पएसणिप्फण्णे । ३३२. से किं तं विभागणिप्फण्णे । २ अंगुल विहत्थि रयणी कुच्छी धणु गाउयं च बोधव्वं । जोयणसेढी पयरं लोगमलोगे वि य तहेव ॥९५॥

३३३. से किं तं अंगुले ? २ तिविहे पण्णत्ते । तं जहा—आयंगुले १ उस्सेहंगुले २ पमाणंगुले ३ । ३३४. से किं तं आयंगुले ? २ जे णं जया मणुस्सा भवंति तेसि णं तथा अप्पणो अंगुलेणं दुवालस अंगुलाइं मुहं, नवमुहाइं पुरिसे पमाणजुत्ते भवति, दोणिए पुरिसे माणजुत्ते भवति, अब्धभारं तुलमाणे पुरिसे उम्माणजुत्ते भवति । माणुम्माण-पमाणे जुत्ता लक्खण-वंजण-गुणेहिं उव्वेया । उत्तमकुलप्पसूया उत्तमपुरिसा मुणेयव्वा ॥९६॥ होंति पुण अहियपुरिसा अट्टसतं अंगुलाण उव्विद्धा । छण्णउति अहमपुरिसा चउरुत्तर मज्झिमिल्ला उ ॥९७॥ हीणा वा अहिया वा जे खलु सर-सत्त-सारपरिहीणा । ते उत्तमपुरिसाणं अवसा पेसत्तणमुवेति ॥९८॥ ३३५. एतेणं अंगुलपमाणेणं छ अंगुलाइं पादो, दो पाया विहत्थी, दो विहत्थीओ रयणी, दो रयणीओ कुच्छी, दो कुच्छीओ दंडं धणू जुगे नालिया अक्खमुसले, दो धणुसहस्साइं गाउयं, चत्तारि गाउयाइं जोयणं । ३३६. एएणं आयंगुलप्पमाणेणं किं पओयणं ? एतेणं आयंगुलप्पमाणेण जे णं जया मणुस्सा भवंति तेसिं तथा अप्पणो अंगुलेणं अगड-दह-नदी-तलाग-वापी-पुक्खरणि-दीहिया-गुंजालियाओ सरा सरपंतियाओ सरसरपंतियाओ बिलपंतियाओ आरामुज्जाण-काणण-वण-वणसंड-वणराईओ देवकुल-सभा-पवा-थूम-खाइय-परिहाओ पागारा-ऽट्टालग-चरिय-दार-गोपुर-तोरण-पासाद-घर-सरण-लेण-आवण-सिंघाडग-तिय-चउक्क-चच्चर-चउमुह-महापह-पहा सगड-रह-जाण-जुग्ग-गिल्लि-थिल्लि-सीय-संदमाणिय-लोही-लोहकडाह-कडुच्छुय-आसण-सतण-खंभ-भंड-मत्तोवगर-णमादीणि अज्जकालिगाइं च जोयणाइं मविज्जंति । ३३७. से समासओ तिविहे पण्णत्ते । तं जहा-सूतिअंगुले १ पयरंगुले घणंगुले ३ । अंगुलायता एगपदेसिया सेढी सूइअंगुले १ सूयी सूयीए गुणिया पयरंगुले २ पयरं सूईए गुणितं घणंगुले ३ । ३३८. एतेसि णं भंते ! सूतिअंगुल-पयरंगुल-घणंगुलाण य कतरे कतरेहिंतो अप्पे वा बहुए वा तुल्ले वा विसेसाहिए वा ? सव्वत्थोवे सूतिअंगुले, पतरंगुले असंखेज्जगुणे, घणंगुले असंखेज्जगुणे । से तं आयंगुले । ३३९. से किं तं उस्सेहंगुले ? २ अणेगविहे पण्णत्ते । तं जहा परमाणू तसरेणू रहरेणू अग्गयं च वालस्स । लिक्खा जूया य जवो अट्टगुणविवद्धिया कमसो ॥९९॥ ३४०. से किं तं परमाणू ? २ दुविहे पण्णत्ते । तं जहा-सुहुमे य १ वावहारिए य २ । ३४१. तत्थ णं जे से सुहुमे से ठप्पे । ३४२. से किं तं वावहारिए ? २ अणंताणं सुहुमपरमाणुपोग्गलाणं समुदयसमितिसमाकमेणं से एगे वावहारिए परमाणुपोग्गले निप्पज्जति । ३४३. [१] से णं भंते ! असिधारं वा खुरधारं वा ओगाहेज्जा ? हंता ओगाहेज्जा । से णं तत्थ छिज्जेज्ज वा भिज्जेज्ज वा ? नो इणट्टे समट्टे, नो खलु तत्थ सत्थं कमति । [२] से णं भंते ! अगणिकायस्स मज्झंमज्झेणं वीतीवदेज्जा ? हंता वीतीवदेज्जा । से णं तत्थ डहेज्जा ? नो तिणट्टे समट्टे, णो खलु तत्थ सत्थं कमति । [३] से णं भंते ! पुक्खलसंवट्टयस्स महामेहस्स मज्झंमज्झेणं वीतीवदेज्जा ? हंता वीतीवदेज्जा । से णं तत्थ उदउल्ले सिया ? नो तिणट्टे समट्टे, णो खलु तत्थ सत्थं कमति । [४] से णं भंते ! गंगाए महाणईए पडिसोयं हव्वमागच्छेज्जा ? हंता हव्वमागच्छेज्जा । से णं तत्थ विणिघायमावज्जेज्जा ? नो तिणट्टे समट्टे, णो खलु तत्थ सत्थं कमति । [५] से णं भंते ! उदगावत्तं वा उदगबिंदुं वा ओगाहेज्जा ? हंता ओगाहेज्जा । से णं तत्थ कुच्छेज्ज वा परियावज्जेज्ज वा ? णो इणमट्टे समट्टे, नो खलु तत्थ सत्थं कमति । सत्थेण सुतिकखेण वि छेतुं भेतुं व जं किर न सक्का । तं परमाणू सिद्धा वयंति आदी पमाणानं ॥१००॥ ३४४. अणंताणं वावहारियपरमाणुपोग्गलाणं समुदयसमितिसमागमेणं सा एगा उस्सण्हसण्हिया ति वा सण्हसण्हिया ति वा उट्टरेणू ति वा तसरेणू ति वा रहरेणू ति वा । अट्ट उस्सण्हसण्हियाओ सा एगा सण्हसण्हिया । अट्ट सण्हसण्हियाओ सा एगा उट्टरेणू । अट्ट उट्टरेणूओ सा एगा तसरेणू । अट्टतसरेणूओ सा एगा रहरेणू । अट्ट रहरेणूओ देवकुरु-उत्तर-कुरुयाणं मणुयाणं से एगे वालग्गे । अट्ट देवकुरु-उत्तरकुरुयाणं मणुयाणं वालग्गा हरिवास-रम्मगवासाणं मणुयाणं से एगे वालग्गे । अट्ट हरिवस्सरम्मयवासाणं मणुस्साणं वालग्गा, हेमवय-हेरण्णवयवासाणं मणुस्साणं से एगे वालग्गे । अट्ट हेमवय-हेरण्णवयवासाणं मणुस्साणं वालग्गा पुव्वविदेहअवरविदेहाणं मणुस्साणं से एगे वालग्गे । अट्ट पुव्वविदेह-अवरविदेहाणं मणुसाणं वालग्गा भरहेरवयाणं मणुस्साणं से एगे वालग्गे । अट्ट भरहेरवयाणं मणुसाणं वालग्गा सा एगा लिक्खा । अट्ट लिक्खाओ सा एगा जूया । अट्ट जूयातो से एगे जवमज्झे । अट्ट जवमज्झे से एगे उस्सेहंगुले । ३४५. एएणं अंगुलपमाणेणं छ अंगुलाइं पादो, बारस अंगुलाइं विहत्थी, चउवीसं अंगुलाइं रयणी, अडयालीसं अंगुलाइं कुच्छी, छन्नउती अंगुलाइं से एगे दंडे इ वा धणू इ वा जुगे इ वा नालिया

इ वा अक्खे इ वा मुसले इ वा, एणं धणुप्पमाणेणं दो धणुसहस्साइं गाउयं, चत्तारि गाउयाइं जोयणं । ३४६. एणं उस्सेहंगुलेणं किं पओयणं ? एणं उस्सेहंगुलेणं णेरइयतिरिक्खजोणिय-मणूस-देवाणं सरीरोगाहणाओ मविज्जंति । ३४७. [१] णेरइयाणं भंते ! केमहालिया सरीरोगाहणा पन्नत्ता ? गोतमा ! दुविहा पणत्ता । तं जहा-भवधारणिज्जा य १ उत्तरवेउव्विया य २ । तत्थ णं जा सा भवधारणिज्जा सा जहण्णेणं अंगुलस्स असंखेज्जतिभागं, उक्कोसेणं पंच धणूसयाइं । तत्थ णं जा सा उत्तरवेउव्विया सा जहण्णेणं अंगुलस्स संखेज्जइभागं, उक्कोसेणं धणुसहस्सं । [२] रयणप्पभापुढवीए णेरइयाणं भंते ! केमहालिया सरीरोगाहणा पन्नत्ता ? गोयमा ! दुविहा पणत्ता । तं जहा-भवधारणिज्जा य १ उत्तरवेउव्विया य २ । तत्थ णं जा सा भवधारणिज्जा सा जहन्नेणं अंगुलस्स असंखेज्जइभागं, उक्कोसेणं सत्त धणूइं तिण्णि रयणीओ छच्च अंगुलाइं । तत्थ णं जा सा उत्तरवेउव्विया सा जहन्नेणं अंगुलस्स संखेज्जइभागं उक्कोसेणं पण्णरस धणूइं अह्वाइज्जाओ रयणीओ य । [३] सक्करप्पभापुढविणेरइयाणं भंते ! केमहालिया सरीरोगाहणा पणत्ता ? गो० ! दुविहा पणत्ता । तं जहा-भवधारणिज्जा य १ उत्तरवेउव्विया य २ । तत्थ णं जा सा भवधारणिज्जा सा जहन्नेणं अंगुलस्स असंखेज्जतिभागं, उक्कोसेणं पण्णरस धणूइं अह्वाइज्जाओ रयणीओ य । तत्थ णं जा सा उत्तरवेउव्विया सा जहन्नेणं अंगुलस्स संखेज्जइभागं, उक्कोसेणं एक्कतीसं धणूइं रयणी य । [४] वालुयपभापुढवीए णेरइयाणं भंते ! केमहालिया सरीरोगाहणा पं० ? गो० ! दुविहा पणत्ता, तं जहा-भवधारणिज्जा य १ उत्तरवेउव्विया य २ । तत्थ णं जा सा भवधारणिज्जा सा जहन्नेणं अंगुलस्स असंखेज्जतिभागं, उक्कोसेणं एक्कतीसं धणूइं रयणी य । तत्थ णं जा सा उत्तरवेउव्विया सा जहन्नेणं अंगुलस्स संखेज्जतिभागं, उक्कोसेणं बासट्ठिं धणूइं दो रयणीओ य । [५] एवं सव्वासिं पुढवीणं पुच्छा भाणियव्वा-पंकप्पभाए भवधारणिज्जा जहन्नेणं अंगुलस्स असंखेज्जतिभागं उक्कोसेणं बासट्ठिं धणूइं दो रयणीओ य, उत्तरवेउव्विया जहन्नेणं अंगुलस्स संखेज्जइभागं उक्कोसेणं पणुवीसं धणुसयं । धूमप्पभाए भवधारणिज्जा जहन्नेणं अंगुलस्स असंखेज्जइभागं उक्कोसेणं पणुवीसं धणुसयं, उत्तरवेउव्विया जहण्णेणं अंगुलस्स संखेज्जइभागं उक्कोसेणं अह्वाइज्जाइं धणूसयाइं । तमाए भवधारणिज्जा जहन्नेणं अंगुलस्स असंखेज्जतिभागं उक्कोसेणं अह्वाइज्जाइं धणूसयाइं, उत्तरवेउव्विया जहण्णेणं अंगुलस्स संखेज्जइभागं उक्कोसेणं पंच धणुसयाइं । [६] तमतमापुढविनेरइयाणं भंते ! केमहालिया सरीरोगाहणा पन्नत्ता ? गोयमा ! दुविहा पन्नत्ता । तं जहा-भवधारणिज्जा य १ उत्तरवेउव्विया य २ । तत्थ णं जा सा भवधारणिज्जा सा जहण्णेणं अंगुलस्स असंखेज्जइभागं, उक्कोसेणं पंच धणूसयाइं । तत्थ णं जा सा उत्तरवेउव्विया सा जहन्नेणं अंगुलस्स संखेज्जइभागं, उक्कोसेणं धणुसहस्सं । ३४८. [१] असुरकुमाराणं भंते ! केमहालिया सरीरोगाहणा पणत्ता ? गोतमा ! दुविहा पणत्ता । तं०-भवधारणिज्जा य १ उत्तरवेउव्विया य २ । तत्थ णं जा सा भवधारणिज्जा सा जहन्नेणं अंगुलस्स असंखेज्जइभागं, उक्कोसेणं सत्त रयणीओ । तत्थ णं जा सा उत्तरवेउव्विया सा जहन्नेणं अंगुलस्स संखेज्जइभागं उक्कोसेणं जोयणसत्तसहस्सं । [२] एवं असुरकुमारगमेणं जाव थणितकुमाराणं ताव भाणियव्वं । ३४९. [१] पुढविकाइयाणं भंते ! केमहालिया सरीरोगाहणा पन्नत्ता ? गोयमा ! जहन्नेणं अंगुलस्स असंखेज्जतिभागं, उक्कोसेण वि अंगुलस्स असंखेज्जति भागं । एवं सुहुमाणं ओहियाणं अपज्जत्तयाणं पज्जत्तयाणं बादराणं ओहियाणं अपज्जत्तयाणं पज्जत्तयाणं च भाणियव्वं । एवं जाव बादरवाउक्काइयाणं अपज्जत्तयाणं पज्जत्तयाणं भाणियव्वं । [२] वणस्सइकाइयाणं भंते ! केमहालिया सरीरोगाहणा पन्नत्ता ? गो० जहन्नेणं अंगुलस्स असंखेज्जइभागं, उक्कोसेणं सातिरेणं जोयणसहस्सं । सुहुमवणस्सइकाइयाणं ओहियाणं १ अपज्जत्तयाणं २ पज्जत्तयाणं ३ तिण्ह वि जहन्नेणं अंगुलस्स असंखेज्जतिभागं, उक्कोसेणं वि अंगुलस्स असंखेज्जतिभागं । बादरवणस्सतिकाइयाणं जहन्नेणं अंगुलस्स असंखेज्जतिभागं, उक्कोसेणं सातिरेणं जोयणसहस्सं; अपज्जत्तयाणं जहन्नेणं अंगुलस्स असंखेज्जइभागं, उक्कोसेण वि अंगुलस्स असंखेज्जइभागं; पज्जत्तयाणं जहन्नेणं अंगुलस्स असंखेज्जइभागं, उक्कोसेणं सातिरेणं जोयणसहस्सं । ३५०. [१] एवं बेइंदियाईणं पुच्छा भाणियव्वा-बेइंदियाणं पुच्छा, गो० ! जहन्नेणं अंगुलस्स असंखेज्जतिभागं, उक्कोसेणं बारस जोयणाइं; अपज्जत्तयाणं जहन्नेणं अंगुलस्स असंखेज्जइभागं, उक्कोसेण वि अंगुलस्स असंखेज्जइभागं; पज्जत्तयाणं ज० अंगुलस्स संखेज्जइभागं, उक्कोसेणं बारस जोयणाइं । [२] तेइंदियाणं पुच्छा, गो० ! जहन्नेणं अंगुलस्स असंखेज्जतिभागं, उक्कोसेणं तिण्णि गाउयाइं;

अपज्जत्तयाणं जहन्नेणं अंगुलस्स असंखेज्जतिभागं उक्कोसेण वि अंगुलस्स असंखेज्जइभागं; पज्जत्तयाणं जहन्नेणं अंगुलस्स संखेज्जतिभागं, उक्कोसेणं तिण्णि गाउयाइं । [३] चउरिंदियाणं पुच्छा, गो० ! जहन्नेणं अंगुलस्स असंखेज्जतिभागं, उक्कोसेणं चत्तारि गाउयाइं; अपज्जत्तयाणं जहन्नेणं उक्कोसेणं वि अंगुलस्स असंखेज्जइभागं; पज्जत्तयाणं पुच्छा, जहन्नेणं अंगुलस्स संखेज्जइभागं, उक्कोसेणं चत्तारि गाउयाइं । ३५१. [१] पंचेंदियतिरिक्खजोणियाणं पुच्छा, गोअमा ! जहन्नेणं अंगुलस्स असंखेज्जइभागं, उक्कोसेणं जोयणसहस्सं । [२] जलयरपंचेंदियतिरिक्खजोणियाणं पुच्छा, गोयमा ! एवं चेव । सम्मुच्छिमजलयरपंचेंदियाणं एवं चेव । अपज्जत्तगसम्मुच्छिमजलयरपंचेंदियाणं पुच्छा, जहन्नेणं अंगुलस्स असंखेज्जतिभागं, उक्कोसेण वि अंगुलस्स असं० । पज्जत्तयसम्मुच्छिमजलयरपंचेंदियाणं पुच्छा, जहन्नेणं अंगु० संखे०, उक्कोसेणं जोयणसहस्सं । गब्भवक्कंतियजलयरपंचेंदियाणं पुच्छा, गो० ! जहन्नेणं अंगुलस्स असंखेज्जइभागं, उक्कोसेणं जोयणसहस्सं । अपज्जत्तयाणं पुच्छा, गो० ! जह० अंगु० असं०, उक्कोसेणं अंगु० असं० । पज्जत्तयाणं पुच्छा, गोयमा ! जहन्नेणं अंगु० संखे०, उक्कोसेणं जोयणसहस्सं । [३] चउप्पयथलयरारणं पुच्छा, गो० ! जह० अंगुलस्स असं०, उक्कोसेणं छ गाउयाइं । सम्मुच्छिमचउप्पयथलयरारणं पुच्छा, गो० ! जह० अंगु० असं०, उक्को० गाउयपहुत्तं० । अपज्जत्तगसम्मुच्छिमचउप्पयथलयरारणं पुच्चा गो० जह० अंगु० असं० उक्को० अंगु० असं० पज्जत्तगसम्मुच्छिमचउप्पयथलयरारणं पुच्छा, गो० ! जहन्नेणं अंगु० संखे०, उक्को० गाउअपुहत्तं । गब्भवक्कंतियचउप्पयथलयरारणं पुच्छा, गोयमा ! जह० अंगु० असं०, उक्को० छ गाउयाइं । अपज्जत्तयगब्भवक्कंतियचउप्पयथलयरारणं पुच्छा, गो० ! जह० अंगु० असं०, उक्कोसेणं अंगु० असं०; पज्जत्तयाणं जहन्नेणं अंगु० संखे०, उक्कोसेणं छ गाउयाइं । उरपरिसप्पथलयरारणं पुच्छा, गो० ! जहन्नेणं अंगु० असं०, उक्कोसेणं जोयणसहस्सं । सम्मुच्छिमउरपरिसप्पथलयरारणं पुच्छा, गो० ! जहन्नेणं अंगु० असंखे०, उक्कोसेणं जोयणपुहत्तं; अपज्जत्तयाणं जह० अंगु० असं०, उक्कोसेणं अंगुल० असं०; पज्जत्तयाणं जह० अंगु० संखे०, उक्कोसेणं जोयणपुहत्तं । गब्भवक्कंतियउरपरिसप्पथलयरारणं जह० अंगु० असं०, उक्कोसेणं जोयणसहस्सं; अपज्जत्तयाणं जह० अंगु० असं०, उक्कोसेणं अंगु० असं०; पज्जत्तयाणं जह० अंगु० संखे०, उक्कोसेणं जोयणसहस्सं । भुयपरिसप्पथलयरारणं पुच्छा, गो० ! जह० अंगु० असंखे०, उक्कोसेणं गाउयपुहत्तं । सम्मुच्छिमभुय० जाव जह० अंगु० असं०, उक्को० धणुपुहत्तं । अपज्जत्तगसम्मुच्छिमभुय० जाव पुच्छा, गो० ! जह० अंगु० असं०, उक्को० अंगु० असं० । पज्जत्तयाणं जह० अंगु० संखे०, उक्कोसेणं धणुपुहत्तं । गब्भवक्कंतियभुय० जाव पुच्छा, गो० ! जह० अंगु० असं०, उक्कोसेणं गाउयपुहत्तं; अपज्जत्तयाणं जह० अंगु० असं०, उक्कोसेणं अंगु० असं०; पज्जत्तयगब्भवक्कंतिय० जाव पुच्छा, गो० ! जह० अंगु० संखे०, उक्को० गाउयपुहत्तं । [४] खहयरपंचेंदियतिरिक्खजोणियाणं०, गो० ! जह० अंगु० असं०, उक्को० धणुपुहत्तं । सम्मुच्छिमखहयरारणं जहा भुयपरिसप्पसम्मुच्छिमाणं तिसु वि गभेसु तहा भाणियव्वं । गब्भवक्कंतियाणं जह० अंगु० असं०, उक्कोसेणं धणुपुहत्तं; अपज्जत्तयाणं जहन्नेणं अंगु० असं०, उक्को० अंगु० असं०; पज्जत्तयाणं जह० अंगु० संखे०, उक्को० धणुपुहत्तं । [५] एत्थं संगहणिगाहाओ भवन्ति । तं जहा-जोयणसहस्स गाउयपुहत्त ततो य जोयणपुहत्तं । दोणहं तु धणुपुहत्तं सम्मुच्छिम होइ उच्चत्तं ॥१०१॥ जोयणसहस्स छग्गाउयाइं ततो य जोयणसहस्सं । गाउयपुहत्त भुयगे पक्खीसु भवे धणुपुहत्तं ॥१०२॥ ३५२. [१] मणुस्साणं भन्ते ! केमहालिया सरीरोगाहणा पन्नत्ता ? गोयमा ! जहन्नेणं अंगुलस्स असंखेज्जइभागं, उक्कोसेणं तिन्नि गाउयाइं । [२] सम्मुच्छिममणुस्साणं जाव गोयमा ! जहन्नेणं अंगु० असं०, उक्को० अंगु० असं० । [३] गब्भवक्कंतियमणुस्साणं जाव गोयमा ! जह० अंगु० असं०, उक्कोसेणं तिन्नि गाउयाइं । अपज्जत्तगग्भवक्कंतियमणुस्साणं पुच्छा, गो० ! जह० अंगु० असं०, उक्कोसेणं वि० अंगु० असं० पज्जत्तयग० पुच्चा, गो० ! जह० अंगु० संखे० उक्कोसेणं तिन्नि गाउआइं । ३५३. वाणमंतरारणं भवधारणिज्जा उत्तरवेउव्विआ य जहा असुरकुमारारणं तहा भाणियव्वं । ३५४. जहा वाणमंतरारणं तहा जोतिसियाणं । ३५५. [१] सोहम्मयदेवाणं भन्ते ! केमहालिया सरीरोगाहणा पन्नत्ता ? गोयमा ! दुविहा प० । तं-भवधारणिज्जा य उत्तरवेउव्विया य । तत्थ णं जा सा भवधारणिज्जा सा जहन्नेणं अंगुलस्स असंखेज्जइभागं, उक्कोसेणं सत्त रयणीओ । तत्थ णं जा सा उत्तरवेउव्विया सा जहन्नेणं अंगुलस्स संखेज्जइभागं, उक्कोसेणं

जोयणसतसहस्सं । [२] जहा सोहम्मं तहा ईसाणे कप्पे वि भाणियव्वं । [३] जहा सोहम्मयदेवाणं पुच्छा तहा सेसकप्पाणं देवाणं पुच्छा भाणियव्वा जाव अच्चुयकप्पो-सणंकुमारे भवधारणिज्जाजह० अंगु० असं०, उक्कोसेणं छ रयणीओ; उत्तरवेउव्विया जहा सोहम्मं । जहा सणंकुमारे तहा माहिदे । बंभलोग-लंतएसु भवधारणिज्जा जह० अंगुल० असं०, उक्को० पंच रयणीओ; उत्तरवेउव्विया जहा सोहम्मं । महासुक्क-सहस्सारेसु भवधारणिज्जा जहन्नेणं अंगु० असं०, उक्कोसेणं चत्तारि रयणीओ; उत्तरवेउव्विया जहा सोहम्मं । आणत-पाणत-आरण-अच्चुतेसु चउसु वि भवधारणिज्जा जह० अंगु० असं०, उक्कोसेणं तिण्णि रयणीओ; उत्तरवेउव्विया जहा सोहम्मं । [४] गेवेज्जयदेवाणं भंते ! केमहालिया सरीरोगाहणा पन्नत्ता ? गो० ! गेवेज्जदेवाणं एगे भवधारणिज्जे सरीरए, से जहन्नेणं अंगुलस्स असंखेज्जतिभागं, उक्कोसेणं दो रयणीओ । [५] अणुत्तरोववाइयदेवाणं भंते ! केमहालिया सरीरगाहणा पन्नत्ता ? गोयमा ! अणुत्तरोववाइयदेवाणं एगे भवधारणिज्जे सरीरए, से जहन्नेणं अंगुलस्स असंखेज्जतिभागं, उक्कोसेणं एक्का रयणी । ३५६. से समासमो तिविहे पण्णत्ते । तं जहा-सूईअंगुले पयरंगुले घणंगुले । अंगुलायता एगपदेसिया सेढी सूईअंगुले, सूई सूईए गुणिया पयरंगुले, पयरं सूईए गुणियं घणंगुले । ३५७. एएसि णं सूचीअंगुल-पयरंगुल-घणंगुलाणं कतरे कतरेहिंतो अप्पे वा बहुए वा तुल्ले वा विससाहिए वा ? सव्वत्थोवे सूईअंगुले, पयरंगुले असंखेज्जगुणे, घणंगुले असंखेज्जगुणे । से तं उस्सेहंगुले । ३५८. से किं तं पमाणंगुले ? [२] एगमेगस्स णं रण्णो चाउरंतचक्कवट्टिस्स अट्ट सोवणिए कागणिरयते छत्तले दुवालसंसिए अट्टकणिए अह्गिरणिसंठाणसंठिए पण्णत्ते, तस्स णं एगमेगा कोडी उस्सेहंगुलविकखंभा, तं समणस्स भगवओ महावीरस्स अब्दंगुलं, तं सहस्सगुणं पमाणंगुलं भवति । ३५९. एतेणं अंगुलप्पमाणेणं छ अंगुलाइं पादो, दो पाया-दुवालस अंगुलाइं विहत्थी, दो विहत्थीओ रयणी, दो रयणीओ कुच्छी, दो कुच्छीओ धणू, दो धणुसहस्साइं गाउयं, चत्तारि गाउयाइं जोयणं । ३६०. एतेणं पमाणंगुलेणं किं पओयणं ? एएणं पमाणंगुलेणं पुढवीणं कंडाणं पायालाणं भवणाणं भवणपत्थडाणं निरयाणं निरयावलियाणं निरयपत्थडाणं कप्पाणं विमाणाणं विमाणावलियाणं विमाणपत्थडाणं टंकाणं कूडाणं सेलाणं सिहरीणं पब्भाराणं विजयाणं वक्खाराणं वासाणं वासहराणं वासहरपव्वयाणं वेलाणं वेइयाणं दाराणं तोरणाणं दीवाणं समुद्दाणं आयाम-विकखंभ-उच्चत्तोव्वेह-परिकखेवा मविज्जंति । ३६१. से समासओ तिविहे पण्णत्ते । तं जहा-सेढीअंगुले पयरंगुले घणंगुले । असंखेज्जाओ जोयणकोडाकोडीओ सेढी, सेढी सेढीए गुणिया पतरं, पतरं सेढीए गुणितं लोगो, संखेज्जएणं लोगो गुणितो संखेज्जा लोगो, असंखेज्जएणं लोगो गुणियो असंखेज्जा लोगो । ३६२. एतेसि णं सेढीअंगुल-पयरंगुल-घणंगुलाणं कतरे कतरेहिंतो अप्पे वा बहुए वा तुल्ले वा विससाहिए वा ? सव्वत्थोवे सेढीअंगुले, पयरंगुले असंखेज्जगुणे, घणंगुले असंखेज्जगुणे । से तं पमाणंगुले । से तं विभागनिप्पण्णे । से तं खेत्तप्पमाणे । ३६३. से किं तं कालप्पमाणे ? २ दुविहे पण्णत्ते । तं जहा-पदेसनिप्पण्णे य विभागनिप्पण्णे य । ३६४. से किं तं पदेसनिप्पण्णे ? २ एगसमयट्टितीए दुसमयट्टितीए तिसमयट्टितीए जाव असंखेज्जसमयट्टिईए । से तं पदेसनिप्पण्णे । ३६५. से किं तं विभागनिप्पण्णे ? २ समयाऽऽवलिय-मुहुत्तादिवस-अहोरत्त-पक्ख-मासा य । संवच्छर-जुग-पलिया सागर-ओसप्पि-परिअट्टा ॥१०३॥ ३६६. से किं तं समए ? समयस्स णं परूवणं करिस्सामि-से जहाणामए तुण्णागदारए सिया तरुणे बलगं जुगवं जुवाणे अप्पातंके थिरग्गहत्थे दढपाणि-पाय-पास-पिट्ठंतरोरुपरिणते तलजमलजुयल-परिघणिमबाहू चम्मेट्टग-दुहण-मुट्टियसमाहयनिचियगत्तकाये लंघण-पवण-जइणवायामसमत्थे उरस्सबलसमण्णागए छेए दक्खे पत्तट्टे कुसले मेहावी निउणे निउणसिप्पोवगए एणं महतिं पडसाडियं वा पट्टसाडियं वा गहाय सयराहं हत्थमेत्तं ओसारेज्जा । तत्थ चोयए पण्णवयं एवं वयासी-जेणं कालेणं तेणं तुण्णागदारएणं तीसे पडसाडियाए वा पट्टसाडियाए वा सयराहं हत्थमेत्ते ओसारिए से समए भवइ ? नो इणमट्टे समट्टे । कम्हा ? जम्हा संखेज्जाणं तंतूणं समुदयसमितिसमागमेणं पडसाडिया निप्पज्जइ, उवरिल्लम्मि तंतुम्मि अच्छिण्णे हेट्टिले तंतू ण छिज्जइ, अण्णम्मि काले उवरिल्ले तंतू छिज्जइ अण्णम्मि काले हिट्टिल्ले तंतू छिज्जति, तम्हा से समए न भवति । एवं वयंत पण्णवगं चोयए एवं वयासि-जेणं कालेणं तेणं तुण्णागदाराणं तीसे पडसाडियाए वा पट्टसाडियाए वा उवरिल्ले तंतू छिण्णे से समए ? ण भवति । कम्हा ? जम्हा संखेज्जाणं पम्हाणं समुदयसमितिसमागमेणं एगे तंतू निप्फज्जइ, उवरिल्ले पम्हम्मि

अच्छिण्णे हेद्विले पम्हे न छिज्जति, अण्णम्मि काले उवरिल्ले पम्हे छिज्जति अण्णम्मि काले हेद्विल्ले पम्हे छिज्जति, तम्हा से समए ण भवति । एवं वदंतं पण्णवगं चोयए एवं वदासि-जेण कालेणं तेणं तुण्णागदाराएणं तस्स तंतुस्स उवरिल्ले पम्हे छिण्णे से समए ? ण भवति । कम्हा ? जम्हा अणंतानं संघाताणं समुदयसमितिसमागमेणंएगे पम्हे णिप्फज्जइ, उवरिल्ले संघाते अविसंघातिए हेद्विले संघाते ण विसंघाडिज्जति, अण्णम्मि काले उवरिल्ले संघाए विसंघातिज्जइ अण्णम्मि काले हेद्विल्ले संघए विसंघादिज्जइ, तम्हा से समए ण भवति । एत्तो वि णं सुहुमताराए समए पण्णत्ते समणाउसो ! । ३६७. असंखेज्जाणं समयाणं समुदयसमितिसमागमेणं सा एगा आवलिय ति पवुच्चइ । संखेज्जाओ आवलियाओ ऊसासो । संखेज्जाओ आवलियाओ नीसासो । हट्टस्स अणवगल्लस्स निरुवकिट्टस्स जंतुणो । एगे ऊसास-नीसासे एस पाणु ति वुच्चति ॥१०४॥ सत्त पाणूणि से थोवे, सत्त थोवाणि से लवे । लवाणं सत्तहत्तरिए एस मुहुत्ते वियाहिए ॥१०५॥ तिण्णि सहस्सा सत्त य सयाणि तेहत्तरिं च उस्सासा । एस मुहुत्तो भणिओ सवेहिं अणंतनाणीहिं ॥१०६॥ एतेणं मुहुत्तपमाणेणं तीसं मुहुत्ता अहोरत्ते, पण्णरस अहोरत्ता पक्खो, दो पक्खा मासो, दो मासा उऊ, तिण्णि उऊ अयणं, दो अयणाइं संवच्छरे, पंचसंवच्छरिए जुगे, वीसं जुगाइं वाससयं, दस वाससताइं वाससहस्सं, सयं वाससहस्साणं वाससतसहस्सं, चउरासीई वाससयसहस्साइं से एगे पुव्वंगे, चउरासीतिं पुव्वंगसतसहस्साइं से एगे पुव्वे, चउरासीइं पुव्वसयसहस्साइं से एगे तुडियंगे, चउरासीइं तुडियंगसयसहस्साइं से एगे तुडिए, चउरासीइं तुडियसयसहस्साइं से एगे अडडंगे, चउरासीइं अडडंगसयसहस्साइं से एगे अडडे, चउरासीइं अडडसयसहस्साइं से एगे अवंगे, चउरासीइं अवंगसयसहस्साइं से एगे अववे, चउरासीतिं अववसतसहस्साइं से एगे हूहुयंगे, चउरासीइं हूहुयंगसतसहस्साइं से एगे हूहुए, एवं उप्पलंगे उप्पले पउमंगे पउमे नल्लिणंगे नल्लिणे अत्थनिउरंगे अत्थनिउरे अउयंगे अउए णउयंगे णउए पउयंगे पउए चूलियंगे चूलिया, चउरासीतिं चूलियासतसहस्साइं से एगे सीसपहेलियंगे, चउरासीतिं सीसपहेलियंगसतसहस्साइं सा एगा सीसपहेलिया । एताव ताव गणिए, एयावए चव गणियस्स विसए, अतो परं ओवमिए । ३६८. से किं तं ओवमिए ? २ दुविहा पण्णत्ते । तं जहा-पलिओवमे य सागरोवमे य । ३६९. से किं तं पलिओवमे ? २ तिविहे पण्णत्ते । तं जहा-उद्धारपलिओवमे य अद्धापलिओवमे य खेत्तपलिओवमे य । ३७०. से किं तं उद्धारपलिओवमे ? २ दुविहे पण्णत्ते । तं जहा-सुहुमे य वावहारिए य । ३७१. तत्थ णं जे से सुहुमे से ठप्पे । ३७२. तत्थ णं जे से वावहारिए से जहानामए पल्ले सिया-जोयणं आयाम-विक्रवंभेणं जोयणं उहं उच्चत्तेणं, तं तिगुणं सविसेसं परिरएणं; से णं एगाहिय-बेहिय-तेहिय जाव उक्कोसेणं सत्तरत्तपरूढाणं सम्मट्टे सन्निचिते भरिए वालग्गकोडीणं । ते णं वालग्गा नो अग्गी डहेज्जा, नो वाऊ हरेज्जा, नो कुच्छेज्जा, नो पल्लिविद्धंसिज्जा, णो पूइत्ताए हव्वमागच्छेज्जा । तओ णं समए समए एगमेगं वालग्गं अवाहाय जावतिएणं कालेणं से पल्ले खीणे नीरए निल्लवे णिट्ठिते भवति, से तं वावहारिए उद्धारपलिओवमे । एएसि पल्लाणं कोडाकोडी हवेज्ज दसगुणिता । तं वावहारियस्स उद्धारसागरोवमस्स एगस्स भवे परीमाणं ॥१०७॥ ३७३. एतेहिं वावहारियउद्धारपलिओवम-सागरोवमेहिं किं पओयणं ? एतेहिं वावहारियउद्धारपलिओवम-सागरोवमेहिं णत्थि किंचि पओयणं, केवलं तु पण्णवणा पण्णविज्जति । से तं वावहारिए उद्धारपलिओवमे । ३७४. से किं तं सुहुमे उद्धारपलिओवमे ? २ से जहानामए पल्ले सिया-जोयणं आयाम-विक्रवंभेणं, जोयणं उहं उच्चत्तेणं, तं तिगुणं सविसेसं परिक्रवेणं; से णं पल्ले एगाहिय-बेहिय-तेहिय० उक्कोसेणं सत्तरत्तपरूढाणं सम्मट्टे सन्निचिते भरिते वालग्गकोडीणं । तत्थ णं एगमेगे वालग्गे असंखेज्जाइं खंडइं कज्जति । ते णं वालग्गा दिट्ठीओगाहणौ असंखेज्जतिभागमेत्ता सुहुमस्स पणगजीवस्स सरीरोगाहणाओ असंखेज्जगुणा । ते णं वालग्गा णो अग्गी डहेज्जा, णो वाऊ हरेज्जा, णो कुच्छेज्जा, णो पल्लिविद्धंसिज्जा, णो पूइत्ताए हव्वमागच्छेज्जा । तओ णं समए समए एगमेगं वालग्गं अवाहाय जावतितेणं कालेणं से पल्ले खीणे नीरए निल्लवे णिट्ठिए भवति, से तं सुहुमे उद्धारपलिओवमे । एतेसिं पल्लाणं कोडाकोडी हवेज्ज दसगुणिया । तं सुहुमस्स उद्धारसागरोवमस्स उ एगस्स भवे परीमाणं ॥१०८॥ ३७५. एहं सुहुमेहिं उद्धारपलिओवम-सागरोवमेहिं किं पओयणं ? एतेहिं सुहुमेहिं उद्धारपलिओवम-सागरोवमेहिं दीव-समुद्दाणं उद्धारे घेप्पति । ३७६. केवतिया णं भंते ! दीव-समुद्दा उद्धारेणं पन्नत्ता ? गो० ! जावइया णं अह्हाइज्जाणं उद्धारसमया उद्धारसागरोपमाणं

एवतिया णं दीव-समुद्दा उद्धारेणं पण्णत्ता । से तं सुहुमे उद्धारपलिओवमे । से तं उद्धारपलिओवमे । ३७७. से किं तं अद्धापलिओवमे ? २ दुविहे पण्णत्ते । तं जहा— सुहुमे य वावहारि ए य । ३७८. तत्थ णं जे से सुहुमे से ठप्पे । ३७९. तत्थ णं जे से वावहारि से जहानामए पल्ले सिया जोयणं आयाम-विकखंभेणं, जोयणं उद्धं उच्छत्तेणं, तं तिगुणं सविसेसं परिकखेवेणं ; से णं पल्ले एगाहिय-बेहिय-तेहिया जाव भरिये वालग्गकोडीणं । ते णं वालग्गा नो अग्गी डहेज्जा, नो वाऊ हरेज्जा, नो कुच्छेज्जा, नो पल्लिविद्धंसेज्जा, नो पूइत्ताए हव्वमागच्छेज्जा । ततो णं वाससते वाससते गते एगमेगं वालग्गं अवहाय जावइएणं कालेणं से पल्ले खीणे नीट्टिए भवति, से तं वावहारिए अद्धापलिओवमे । एएसिं पल्लाणं कोडाकोडी हविज्ज दसगुणिया । तं वावहारियस्स अद्धासागरोवमस्स एगस्स भवे परीमाणं ॥१-९॥ ३८०. एएहिं वावहारिएहिं अद्धापलिओवम-सागरोवमेहिं किं पओयणं ? एएहिं जाव नत्थि किंचि प्पओयणं, केवलं तु पण्णवणा पण्णविज्जति । से तं वावहारिए अद्धापलिओवमे । ३८१. से किं तं सुहुमे अद्धापलिओवमे ? २ से जहानामते पल्ले सियाजोयणं आयाम-विकखंभेणं, जोयणं उद्धं उच्छत्तेणं, तं तिगुणं सविसेसं परिकखेवेणं; से णं पल्ले एगाहिय-बेहिय-तेहिय जाव भरिए वालग्गकोडीणं । तत्थ णं एगमेगे वालग्गे असंखेज्जाइं खंडाइं कज्जति । ते णं वालग्गा दिट्ठीओगाहणाओ असंखेज्जतिभागमेत्ता सुहुमस्स पण्णजीवस्स सरीरोगाहणाओ असंखेज्जगुणा । ते णं वालग्गा णो अग्गी डहेज्जा, नो वाऊ हरेज्जा, नो कुच्छेज्जा, नो पल्लिविद्धंसेज्जा, नो पूइत्ताए हव्वमागच्छेज्जा । ततो णं वाससते गते एगमेगं वालग्गं अवहाय जावइएणं कालेणं से पल्ले खीणे नीरए निल्लेवे निट्टिए भवति । से तं सुहुमे अद्धापलिओवमे । एएसिं पल्लाणं कोडाकोडी हवेज्ज दसगुणिया । तं सुहुमस्स अद्धासागरोवमस्स एगस्स भवे परीमाणं ॥११०॥ ३८२. एएहिं सुहुमेहिं अद्धापलिओवम-सागरोवमेहिं किं पओयणं ? एतेहिं सुहुमेहिं अद्धापलिओवम-सागरोवमेहिं णेरतिय-तिरियजोणिय-मणूस-देवाणं आउयाइं मविज्जंति । ३८३. [१] णेरइयाणं भंते ! केवतियं कालं ठिती पण्णत्ता ? गो० ! जहन्नेणं दसवाससहस्साइं उक्कोसेणं तेत्तीसं सागरोवमाइं । [२] रयणप्पभापुढविणेइयाणं भंते ! केवतिकालं ठिती पं० ? गो० ! जहन्नेणं दसवाससहस्साइं उक्कोसेणं एक्कं सागरोवमं, अपज्जत्तगरयणप्पभापुढविणेइयाणं भंते ! केवतिकालं ठिती पं० ? गो० ! जहन्नेणं अंतोमुहुत्तं उक्को० अंतो०, पज्जत्तग जाव जह० दसवाससहस्साइं अंतोमुहुत्तूणाइं, उक्कोसेणं सागरोवमं अंतोमुहुत्तूणं । [३] सक्करपभापुढविणेइयाणं भंते ! केवतिकालं ठिती पं० ? गो० ! जहन्नेणं सागरोवमं उक्कोसेणं तिण्णि सागरोवमाइं । [४] एवं सेसपहासु वि पुच्छा भाणियव्वा-वालुयपभापुढविणेइयाणं जह० तिण्णि सागरोवमाइं, उक्कोसेणं सत्त सागरोवमाइं । पंकपभापुढविनेइयाणं जह० सत्त सागरोवमाइं, उक्कोसेणं दस सागरोवमाइं । धूमप्पभापुढविनेइयाणं जह० दस सागरोवमाइं, उक्कोसेणं सत्तरस सागरोवमाइं । तमपुढविनेइयाणं भंते ! केवतिकालं ठिती पन्नत्ता ? गो० ! जहन्नेणं सत्तरस सागरोवमाइं, उक्कोसेणं बावीसं सागरोवमाइं । तमत्तापुढविनेइयाणं भंते ! केवतिकालं ठिती पन्नत्ता ? गो० ! जहन्नेणं बावीसं सागरोवमाइं, उक्कोसेणं तेत्तीसं सागरोवमाइं । ३८४. [१] असुरकुमाराणं भंते ! देवाणं केवतिकालं ठिती पं० ? गो० ! जहन्नेणं दस वाससहस्साइं, उक्कोसेणं सातिरेगं सागरोवमं । असुरकुमारीणं भंते ! देवीणं केवतिकालं ठिती पं० ? गो० ! जहन्नेणं दसवाससहस्साइं, उक्कोसेणं अद्धपंचमाइं पलिओवमाइं । [२] नागकुमाराणं जाव गो० ! जहन्नेणं दस वाससहस्साइं, उक्कोसेणं देसूणाइं दोण्णि पलिओवमाइं । नागकुमारीणं जाव गो० ! जहन्नेणं दस वाससहस्साइं, उक्कोसेणं देसूणं पलिओवमं । [३] एवं जहा णागकुमाराणं देवाणं देवीण य तथा जाव थणियकुमाराणं देवाणं देवीण य भाणियव्वं । ३८५. [१] पुढवीकाइयाणं भंते ! केवतिकालं ठिती पन्नत्ता ? गो० ! जहन्नेणं अंतोमुहुत्तं उक्कोसेणं बावीसं वाससहस्सा । सुहुमपुढविकाइयाणं ओहियाणं अपज्जत्तयाणं पज्जत्तयाण य तिण्ह वि पुच्छा, गो० ! जहं० अंतोमुहुत्तं उक्कोसेण वि अंतोमुहुत्तं । बादरपुढविकाइयाणं पुच्छा, गो० ! जहन्नेणं अंतोमुहुत्तं उक्कोसेणं बावीसं वाससहस्साइं, अपज्जत्तयबादरपुढविकाइयाणं पुच्छा, गो० ! जहण्णेण वि अंतोमुहुत्तं उक्कोसेण वि अंतोमुहुत्तं, पज्जत्तयबादरपुढविकाइयाणं जाव गो० ! जहं० अंतोमुहुत्तं उक्कोसेणं बावीसं वाससहस्साइं अंतोमुहुत्तूणाइं । [२] एवं सेसकाइयाणं पि पुच्छावयणं भाणियव्वं-आउकाइयाणं जाव गो० ! जहं० अंतोमुहुत्तं उक्कोसेणं सत्त वाससहस्साइं । सुहुमआउकाइयाणं ओहियाणं अपज्जत्तयाणं पज्जत्तयाणं तिण्ह वि जहण्णेण वि अंतोमुहुत्तं

लयरपंचेंदियतिरिक्खजोणियाणं जाव गो० जहं० अंतो० उक्को० पुव्वकोडी अंतोमुहुत्तूणा । भुयपरिसप्पथलयर० जाव गो० ! जहं० अंतो० उक्कोसेणं पुव्वकोडी । सम्मुच्छिमभुयपरिसप्प० जाव गो० ! जहं० अंतो० उक्कोसेणं बायालीसं वाससहस्साइं, अपज्जत्तयसम्मच्छिमभुयपरिसप्पथलयरपंचेंदियतिरिक्खजोणियाणं जाव गो० ! जहं० अंतो० उक्को० अंतो०, पज्जत्तयसम्मच्छिमभुयपरिसप्पथलयरपंचेंदिय० जाव गो० ! जहं० अंतो० उक्को० बायालीसं वाससहस्साइं अंतोमुहुत्तूणाइं; गब्भवक्कंतियभुयपरिसप्पथलयरपंचेंदियाणं जाव गो० ! जहं० अंतो० उक्को० पुव्वकोडी, अपज्जत्तयगब्भवक्कंतियभुयपरिसप्पथलयर० जाव गो० ! जहं० अंतो० उक्को० अंतोमुहुत्तं, पज्जत्तयगब्भवक्कंतियभुयपरिसप्पथलयर० जाव गो० ! जहं० अंतो० उक्कोसेणं पुव्वकोडी अंतोमुहुत्तूणा । [४] खहयरपंचेंदियतिरिक्खजोणियाणं भंते ! केवतिकालं ठिती पन्नत्ता ? गो० ! जहं० अंतो० उक्को० पलिओवमस्स असंखेज्जइभागं । समुच्छिमखहयर० जाव गो० ! जहं० अंतो० उक्को० बावत्तरिं वाससहस्साइं, अपज्जत्तयसम्मच्छिमखहयर० जाव गो० ! जहं० अंतो० उक्कोसेणं अंतो०, पज्जत्तगसम्मच्छिमखहयर० जाव गो० ! जहं० अंतो० उक्कोसेणं बावत्तरिं वाससहस्साइं अंतोमुहुत्तूणाइं; गब्भवक्कंतियखहयरपंचेंदियतिरिक्ख० जाव गो० ! जहं० अंतो० उक्को० पलिओवमस्स असंखेज्जइभागं, अपज्जत्तयगब्भवक्कंतियखहयर० जाव गो० ! जहं० अंतोमुहुत्तं उक्कोसेणं अंतोमुहुत्तं, पज्जत्तयगब्भवक्कंतियखहयरपंचेंदियतिरिक्ख० जाव गो० ! जहं० अंतो० उक्कोसेणं पलिओवमस्स असंखेज्जइभागं अंतोमुहुत्तूणं । [५] एत्थ एतेसिं संगहणिगाहाओ भवंति । तं जहा- सम्मुच्छ पुव्वकोडी, चउरासीतिं भवे सहस्साइं । तेवण्णा बायला, बावत्तरिमेव पक्खीणं ॥१११॥ गब्भम्मि पुव्वकोडी, तिण्णि य पलिओवमाइं परमाउं । उर-भुयग पुव्वकोडी, पलिउवमासंखभागो य ॥११२॥ ३८८. [१] मणुस्साणं भंते ! केवइकालं ठिई पं० ? गो० ! जहन्नेणं अंतोमुहुत्तं उक्कोसेणं तिण्णि पलिओवमाइं । [२] सम्मुच्छिममणुस्साणं जाव गो० ! जहं० अंतो० उक्को० अंतो० । [३] गब्भवक्कंतियमणुस्साणं जाव जहन्नेणं अंतोमुहुत्तं उक्कोसेणं तिण्णि पलिओवमाइं । अपज्जत्तयगब्भवक्कंतियमणुस्साणं जाव गो० ! जहं० अंतो० उक्कोसेणं अंतो०, पज्जत्तयगब्भवक्कंतियमणुस्साणं जाव गो० ! जहन्नेणं अंतोमुहुत्तं उक्कोसेणं तिण्णि पलिओवमाइं अंतोमुहुत्तूणाइं । ३८९. वाणमंतराणं भंते ! देवाणं केवतिकालं ठिती पण्णत्ता ? गो० ! जहन्नेणं दस वाससहस्साइं उक्कोसेणं पलिओवमं । वाणमंतरीणं भंते ! देवीणं केवतिकालं ठिती पण्णत्ता ? गो० ! जहन्नेणं दस वाससहस्साइं उक्कोसेणं अब्धपलिओवमं । ३९०. [१] जोतिसियाणं भंते ! देवाणं जाव गो० ! जहं० सातिरेगं अट्टभागपलिओवमं उक्कोसेणं पलिओवमं वाससतसहस्समब्भहियं । जोइसीणं भंते ! देवीणं जाव गो० ! जहं० अट्टभागपलिओवमं उक्कोसेणं अब्धपलिओवमं पण्णासाए वाससहस्सेहिं अब्भहियं । [२] चंदविमाणं भंते ! देवाणं जाव जहन्नेणं चउभागपलिओवमं उक्कोसेणं पलिओवमं वाससतसहस्साहियं । चंदविमाणं भंते ! देवीणं जाव जहन्नेणं चउभागपलिओवमं उक्को० अब्धपलिओवमं पण्णासाए वाससहस्सेहिं अब्भहियं । [३] सूरविमाणं भंते ! देवाणं जाव जहं० चउभागपलिओवमं उक्को० पलिओवमं वाससहस्साहियं । सूरविमाणं भंते ! देवीणं जाव जहं० चउभागपलिओवमं उक्को० अब्धपलिओवमं पंचहिं वाससएहिं अधियं । [४] गहविमाणं भंते ! देवाणं जाव जहन्नेणं चउभागपलिओवमं उक्को० पलिओवमं । गहविमाणं भंते ! देवीणं जाव जहं० चउभागपलिओवमं उक्कोसेणं अब्धपलिओवमं । [५] णक्खत्तविमाणं भंते ! देवाणं जाव गो० ! जहं० चउभागपलिओवमं उक्को० अब्धपलिओवमं । णक्खत्तविमाणं भंते ! देवीणं जाव गो० ! जहन्नेणं चउभागपलिओवमं उक्को० सातिरेगं चउभागपलिओवमं । [६] ताराविमाणं भंते ! देवाणं जाव गो० ! जहं० सातिरेगं अट्टभागपलिओवमं उक्को० चउभागपलिओवमं । ताराविमाणं भंते ! देवीणं जाव गो० ! जहन्नेणं अट्टभागपलिओवमं उक्को० सातिरेगं अट्टभागपलिओवमं । ३९१. [१] वेमाणियाणं भंते ! देवाणं जाव गो० ! जहण्णेणं पलिओवमं उक्कोसेणं तेत्तीसं सागरोवमाइं । वेमाणीणं भंते ! देवीणं जाव गो० ! जहं० पलिओवमं उक्को० पणपणं पलिओवमाइं । [२] सोहम्मं पं भंते ! कप्पे देवाणं केवतिकालं ठिती पं० ? गो० ! जहं० पलिओवमं उक्कोसेणं दोन्नि सागरोवमाइं । सोहम्मं पं भंते ! कप्पे देवीणं जाव गो० ! जहन्नेणं पलिओवमं उक्कोसेणं सत्त पलिओवमाइं । सोहम्मं पं भंते ! कप्पे अपरिग्गहियाणं देवीणं जाव गो० ! जहं० पलिओवमं उक्कोसेणं पन्नासं पलिओवमाइं । [३] ईसाणे पं भंते ! कप्पे देवाणं केवतिकालं ठिती पन्नत्ता ?

गो० ! जहन्नेणं सातिरेगं पलिओवमं उक्को० सातिरेगाइं दो सागरोवमाइं । ईसाणे णं भंते ! कप्पे देवीणं जाव गो० ! जह० सातिरेगं पलिओवमं उक्को० नव पलिओवमाइं । ईसाणे णं भंते ! कप्पे अपरिग्गहियाणं देवीणं जाव गो० ! जहन्नेणं साइरेगं पलिओवमं उक्कोसेणं पणपणं पलिओवमाइं । [४] सणंकुमारे णं भंते ! कप्पे देवाणं केवइकालं ठिती पन्नत्ता ? गो० ! जहं० दो सागरोवमाइं उक्कोसेणं सत्त सागरोवमाइं । [५] माहिदे णं भंते ! कप्पे देवाणं जाव गोतमा ! जहं० साइरेगाइं दो सागरोवमाइं, उक्को० साइरेगाइं सत्त सागरोवमाइं । [६] बंभलोए णं भंते ! कप्पे देवाणं जाव गोतमा ! जह० सत्त सागरोवमाइं उक्कोसेणं दस सागरोवमाइं । [७] एवं कप्पे कप्पे केवतिकालं ठिती पन्नत्ता ? गो० ! एवं भाणियव्वं—लंतए जहं० दस सागरोवमाइं उक्को० चोदस सागरोवमाइं । महासुक्के जहं० चोदस सागरोवमाइं उक्कोसेणं सत्तरस सागरोवमाइं । सहस्सारे जहं० सत्तरस सागरोवमाइं उक्कोसेणं अट्टारस सागरोवमाइं । आणए जहं० अट्टारस सागरोवमाइं उक्को० एक्कूणवीस सागरोवमाइं । पाणए जहं० एक्कूणवीसं सागरोवमाइं उक्को० वीसं सागरोवमाइं । आरणे जहं० वीसं सागरोवमाइं उक्को० एक्कवीसं सागरोवमाइं । अच्चुए जहं० एक्कवीसं सागरोवमाइं उक्कोसेणं बावीसं सागरोवमाइं । [८] हेट्टिमहेट्टिमगेवेज्जविमाणेसु णं भंते ! देवाणं केवइकालं ठिती पं० ? गो० ! जहं० बावीसं सागरोवमाइं उक्को० तेवीसं सागरोवमाइं, हेट्टिमहेट्टिमगेवेज्जविमाणेसु णं जाव गो० ! जहं० तेवीसं सागरोवमाइं उक्कोसेणं चउवीसं सागरोवमाइं, हेट्टिमहेट्टिमगेवेज्ज० जाव जहं० चउवीसं सागरोवमाइं उक्को० पणुवीसं सागरोवमाइं । मज्झिमहेट्टिमगेवेज्जविमाणेसु णं जाव गोतमा ! जहं० पणुवीसं सागरोवमाइं उक्को० उव्वीसं सागरोवमाइं, मज्झिममज्झिमगेवेज्ज० जाव जह० छव्वीसं सागरोवमाइं उक्को० सत्तावीसं सागरोवमाइं मज्झिमउवरिमगेवेज्जविमाणेसु णं जाव गोतमा ! जहं० सत्तावीसं सागरोवमाइं उक्को० अट्टावीसं सागरोवमाइं । उवरिमहेट्टिमगेवेज्ज० जाव जहं० अट्टावीसं सागरोवमाइं उक्को० एक्कूणतीसं सागरोवमाइं, उवरिममज्झिमगेवेज्ज० जाव जहं० एक्कूणतीसं सागरोवमाइं उक्को० तीसं सागरोवमाइं, उवरिमउवरिमगेवेज्ज० जाव जहं० तीसं सागरोवमाइं उक्को० एक्कतीसं सागरोवमाइं । [९] विजय-वेजयंत-जयंत-अपराजितविमाणेसु णं भंते ! देवाणं केवइकालं ठिती पणत्ता ? गो० ! जहण्णेणं एक्कतीसं सागरोवमाइं उक्कोसेणं तेतीसं सागरोवमाइं । सब्बट्टसिद्धे णं भंते ! महाविमाणे देवाणं केवइकालं ठिती पणत्ता ? गो० ! अजहण्णमणुक्कोसं तेतीसं सागरोवमाइं । से तं सुहुमे अब्बापलिओवमे । से तं अब्बापलिओवमे । ३९२. से किं तं खत्तपलिओवमे ? २ दुविहे पणत्ते । तं जहा—सुहुमे य वावहारिए य । ३९३. तत्थ णं जे से सुहुमे से ठप्पे । ३९४. तत्थ णं जे से वावहारिए से जहानामए पल्ले सिया-जोयणं आयाम-विकखंभेणं, जोयणं उड्डं उच्चत्तेणं, तं तिगुणं सविसेसं परिक्खेवेणं; से णं पल्ले एगाहिय-बेहिय-तेहिय० जाव भरिए वालग्गकोडीणं । ते णं वालग्गा णो अग्गी डहेज्जा, णो वातो हरेज्जा, जाव णो पूइत्ताए हव्वमागच्छेज्जा । जे णं तस्स पल्लस्स आगासपदेसा तेहिं वालग्गेहिं अप्फुत्ता ततो णं समए २ गते एगमेगं आगासपएसं अवहाय जावतिएणं कालेणं से पल्ले खीणे जाव निट्टिए भवइ । से तं वावहारिए खेत्तपलिओवमे । एएसिं पल्लाणं कोडाकोडी हवेज्ज दसगुणिया । तं वावहारियस्स खेत्तसागरोवमस्स एगस्स भवे परीमाणं ॥११३॥ ३९५. एएहिं वावहारिएहिं खेत्तपलिओवम-सागरोवमेहिं किं पयोयणं ? एएहिं० नत्थि किंचि प्पओयणं, केवलं तु पण्णवणा पण्णविज्झइ । से तं वावहारिए खत्तपलिओवमे । ३९६. से किं तं सुहुमे खेत्तपलिओवमे ? २ से जहाणामए पल्ले सिया-जोयणं आयाम-विकखंभेणं, जोयणं उड्डं उच्चत्तेणं, तं तिगुणं सविसेसं परिक्खेवेणं; से णं पल्ले एगाहिय-बेहिय-तेहिय० जाव उक्कोसेणं सत्तरपरूढाणं सम्मट्टे सन्निचिते भरिए वालग्गकोडीणं । तत्थ णं एगमेगे वालग्गे असंखेज्जाइं खंडाइं कज्जइ, ते णं वालग्गा दिट्ठीओगाहणाओ असंखेज्जइ भागमेत्ता सुहुमस्स त्त पणगजीवस्स सरीरोगाहणाओ असंखेज्जगुणा । ते णं वालग्गा णो अग्गी डहेज्जा, नो वातो हरेज्जा, णो कुच्छेज्जा, णो पल्लिविद्धंसेज्जा, णो पूइत्ताए हव्वमागच्छेज्जा । जे णं तस्स पल्लस्स रगरसपदासर तेहिं वालग्गेहिं अप्फुत्ता वा अणाप्फुण्णा वा तओ णं समए २ गते एगमेगं आगासपदेसं अवहाय जावइएणं कालेणं से पल्ले खीणे नीरए निल्लेवे णिट्टिए भवति । से तं सुहुमे खेत्तपलिओवमे । ३९७. तत्थ णं चोदए पण्णवगं एवं वदासी—अत्थि णं तस्स पल्लस्स आगासपेसा जे णं तेहिं वालग्गेहिं अणाप्फुण्णा ? हंता अत्थि, जहा को दिट्ठंतो ? से जहाणामते कोट्टए सिया कोहंडाणं भरिए तत्थ णं माउलुंगा पक्खित्ता ते वि माया, तत्थ णं बिल्ला पक्खित्ता ते वि माया, तत्थ णं

आमलया पक्खित्ता ते वि माया, तत्थ णं बयरा पक्खित्ता ते वि माया, तत्थ णं चणगा पक्खित्ता ते वि माया, तत्थ णं मुग्गा पक्खित्ता ते वि माया, तत्थ णं सरिसवा पक्खित्ता ते वि माता, तत्थ णं गंगावालुया पक्खित्ता सा वि माता, एवामेव एणं दिट्ठंतेणं अत्थि णं तस्स पल्लस्स आगासपएसा जे णं तेहिं वालगोहिं अणप्फुण्णा । एएसिं पल्लाणं कोडाकोडी हवेज्ज दसगुणिया । तं सुहुमस्स खेत्तसागरोवमस्स एगस्स भवे परीमाणं ॥११४॥ ३९८. एतेहिं सुहुमेहिं खेत्तपलिओवम-सागरोवमेहिं किं पओयणं ? एतेहिं सुहुमेहिं पलिओवम-सागरोवमेहिं दिट्ठिवाए दव्वाइं मविज्जंति । ३९९. कइविधा णं भंते ! दव्वा पण्णत्ता ? गो० ! दुविहा पण्णत्ता । तं जहा—जीवदव्वा य अजीवदव्वा य । ४००. अजीवदव्वा णं भंते ! कतिविहा पण्णत्ता गो० ! दुविहा पन्नत्ता । तं जहा—अरूविअजीवदव्वा य रूविअजीवदव्वा य ४०१. अरूविअजीवदव्वा णं भंते ! कतिविहा पण्णत्ता ? गो० ! दसविहा पण्णत्ता । तं जहा— धम्मत्थिकाए धम्मत्थिकायस्स देसा धम्मत्थिकायस्स पदेसा अधम्मत्थिकाए अधम्मत्थिकायस्स देसा अधम्मत्थिकायस्स पदेसा आगासत्थिकाए आगासत्थिकायस्स देसा आगासत्थिकायस्स पदेसा अब्बासमए । ४०२. रूविअजीवदव्वा णं भंते ! कतिविहा पन्नत्ता ? गो० ! चउव्विहा पण्णत्ता । तं जहा— खंधा खंधदेसा खंधदेसा परमाणुपोग्गला । ४०३. ते णं भंते ! किं संखेज्जा असंखेज्जा अणंता ? गोतमा ! नो संखेज्जा, नो असंखेज्जा, अणंता । से केणट्ठेणं भंते ! एवं वुच्चति— ते णं नो संखेप्पज्जा, नो असंखेज्जा, अणंता ? गो० ! अणंता परमाणुपोग्गला अणंता दुपएसिया खंधा जाव अणंता अणंतपदेसिया खंधा, से एतेणं अट्ठेणं गोतमा ! एवं वुच्चति—ते णं नो संखेज्जा, नो असंखेज्जा, अणंता । ४०४. जीवदव्वा णं भंते ! किं संखेज्जा असंखेज्जा अणंता ? गो० ! नो संखेज्जा, नो असंखेज्जा, अणंता । से केणट्ठेणं भंते ! एवं वुच्चइ जीवदव्वा णं नो संखेज्जा नो असंखेज्जा अणंता ? गोतमा ! असंखेज्जा णेरइया, असंखेज्जा असुरकुमारा जाव असंखेज्जा थणियकुमारा, असंखेज्जा पुढवीइकाया जाव असंखेज्जा वाउकाइया, अणंता वणस्सइकाइया, असंखेज्जा बेंदिया जाव असंखेज्जा चउरिंदिया, असंखेज्जा पंचेंदियतिरिक्खजोणिया असंखेज्जा मणूसा, असंखेज्जा वाणमंतरिया, असंखेज्जा जोइसिया, असंखेज्जा वेमाणिया, अणंता सिद्धा, से एणं अट्ठेणं गोतमा ! एवं वुच्चइ-जीवदव्वा णं नो संखेज्जा, नो असंखेज्जा, अणंता । ४०५. कति णं भंते ! सरीरा पं० ? गो० ? पंच सरीरा पण्णत्ता । तं जहा-ओरालिए वेउव्विए आहारए तेयए कम्मए । ४०६. णेरइयाणं भंते ! कति सरीरा पन्नत्ता ? गो० ! तयो सरीरा पं० । तं०-वेउव्विए तेयए कम्मए । ४०७. असुरकुमाराणं भंते ! कति सरीरा पं० ? गो० ! तओ सरीरा पण्णत्ता । तं जहा-वेउव्विए तेयए कम्मए । एवं तिण्णि २ एते चेव सरीरा जाव थणियकुमाराणं भाणियव्वा । ४०८. [१] पुढवीकाइयाणं भंते ! कति सरीरा पण्णत्ता ? गो० ! तयो सरीरा पण्णत्ता । तं जहा-ओरालिए तेयए कम्मए । [२] एवं आउ-तेउ-वणस्सइकाइयाण वि एते चेव तिण्णि सरीरा भाणियव्वा । [३] वाउकाइयाणं जाव गो० ! चत्तारि सरीरा पन्नत्ता । तं०-ओरालिए वेउव्विए तेयए कम्मए । ४०९. बेंदिय-तेंदिय-चउरिंदियाणं जहा पुढवीकाइयाणं । ४१०. पंचेंदियतिरिक्खजोणियाणं जाव गो० ! जहा वाउकाइयाणं । ४११. मणूसाणं जाव गो० ! पंच सरीरा पन्नत्ता । तं०-ओरालिए वेउव्विए आहारए तेयए कम्मए । ४१२. वाणमंतराणं जोइसियाणं वेमाणियाणं जहा नेरइयाणं, वेउव्वियतेयग-कम्मगा तिन्नि तिन्नि सरीरा भाणियव्वा । ४१३. केवतिया णं भंते ! ओरालियसरीरा पण्णत्ता गो० ! दुविहा पण्णत्ता । तं जहा-बद्धेल्लया य मुक्केल्लया य । तत्थ णं जे ते बद्धेल्लया ते णं असंखेज्जा असंखेज्जाहिं उस्सप्पिणी-ओसप्पिणीहिं अवहीरंति कालओ, खेत्ततो असंखेज्जा लोगा । तत्थ णं जे ते मुक्केल्लया ते णं अणंता अणंताहिं उस्सप्पिणी-ओसप्पिणीहिं अवहीरंति कालओ, खेत्ततो अणंता लोगा, दव्वओ अभवसिद्धिएहिं अणंतगुणा सिद्धाणं अणंतभागो । ४१४. केवतिया णं भंते ! वेउव्वियसरीरा पं० ? गोतमा ! दुविहा पण्णत्ता । तं०-बद्धेल्लया य मुक्केल्लया य । तत्थ णं जे ते बद्धेल्लया ते णं असंखेज्जा असंखेज्जाहिं उस्सप्पिणि-ओसप्पिणीहिं अवहीरंति कालओ, खेत्तओ असंखेज्जाओ सेढीओ पतरस्स असंखेज्जइभागो । तत्थ णं जे ते मुक्केल्लया ते णं अणंता अणंताहिं उस्सप्पिणि-ओसप्पिणीहिं अवहीरंति कालओ, सेसं जहा ओरालियस्स मुक्केल्लया तहा एते वि भाणियव्वा । ४१५. केवइया णं भंते ! आहारगसरीरा पं० ? गोयमा ! दुविहा पं० । तं०-बद्धेल्लया य मुक्केल्लया य । तत्थ णं जे ते बद्धेल्लया ते णं सिया अत्थि सिया नत्थि, जइ अत्थि जहण्णेणं एगो वा दो वा तिण्णि वा, उक्कोसेणं सहस्सपुहत्तं । मुक्केल्लया जहा ओरालियसरीरस्स तहा

भाणियव्वा । ४१६. केवतिया णं भंते ! तेयगसरीरा पण्णत्ता ? गोयमा ! दुविहा पं० । तं०-बद्धेल्लया य मुक्केल्लया य । तत्थ णं जे ते बद्धेल्लया ते णं अणंता अणंताहिं उस्सप्पिणि-ओसप्पिणीहिं अवहीरंति कालओ, खेत्ततो अणंता लोगा, दव्वओ सिद्धेहिं अणंतगुणा सव्वजीवाणं अणंतभागूणा । तत्थ णं जे ते मुक्केल्लया ते णं अणंता अणंताहिं उस्सप्पिणि-ओसप्पिणीहिं अवहीरंति कालतो, खेत्ततो अणंता लोगा, दव्वओ सव्वजीवेहिं अणंतगुणा जीववग्गस्स अणंतभागो । ४१७. केवइया णं भंते ! कम्मयसरीरा पन्नत्ता ? गो० ! दुविहा पण्णत्ता । तं जहा-बद्धेल्लया य मुक्केल्लया य । जहा तेयगसरीरा तहा कम्मगसरीरा वि भाणियव्वा । ४१८. [१] नेरइयाणं भंते ! केवतिया ओरालियसरीरा पन्नत्ता ? गोतमा ! दुविहा पण्णत्ता । तं०-बद्धेल्लया य मुक्केल्लया य । तत्थ णं जे ते बद्धेल्लया ते णं नत्थि । तत्थ णं जे ते मुक्केल्लया ते जहा ओहिया ओरालिया तहा भाणियव्वा । [२] नेरइयाणं भंते ! केवइया वेउव्वियसरीरा पन्नत्ता ? गो० ! दुविहा पण्णत्ता । तं जहा-बद्धेल्लया य मुक्केल्लया य । तत्थ णं जे ते बद्धेल्लया ते णं असंखेज्जा असंखेज्जाहिं उस्सप्पिणी-ओसप्पिणीहिं अवहीरंति कालओ, खेत्तओ असंखेज्जाओ सेढीओ पयरस्स असंखेज्जइभागो, तासि णं सेढीणं विक्खंभसूयी अंगुलपढमवग्गमूलं बितियवग्गमूलपडुप्पणं अहवणं अंगुलबितियवग्गमूलघणपमाणमेत्ताओ सेढीओ । तत्थ णं जे ते मुक्केल्लया ते णं जहा ओहिया ओरालियसरीरा तहा भाणियव्वा । [३] णेरइयाणं भंते ! केवइया आहारगसरीरा पण्णत्ता ? गोयमा ! दुविहा पण्णत्ता । तं जहा-बद्धेल्लया य मुक्केल्लया य । तत्थ णं जे ते बद्धेल्लया ते णं नत्थि । तत्थ णं जे ते मुक्केल्लया ते जहा ओहिया ओरालिया तहा भाणियव्वा । [४] तेयग-कम्मगसरीरा जहा एतेसिं चेव वेउव्वियसरीरा तहा भाणियव्वा । ४१९. [१] असुरकुमाराणं भंते ! केवतिया ओरालियसरीरा पन्नत्ता ? गो० ! जहा नेरइयाणं ओरालियसरीरा तहा भाणियव्वा । [२] असुरकुमाराणं भंते ! केवतिया वेउव्वियसरीरा पन्नत्ता ? गोतमा ! दुविहा पण्णत्ता तं०-बद्धेल्लया य मुक्केल्लया य । तत्थ णं जे ते बद्धेल्लया ते णं असंखेज्जा असंखेज्जाहिं उस्सप्पिणि-ओसप्पिणीहिं अवहीरंति कालतो, खेत्ततो असंखेज्जाओ सेढीओ पयरस्स असंखेज्जइभागो, तासि णं सेढीणं विक्खंभसूई अंगुलपढमवग्गमूलस्स असंखेज्जतिभागो । मुक्केल्लया जहा ओहिया ओरालियसरीरा तहा भाणियव्वा । [३] असुरकुमाराणं भंते ! केवइया आहारगसरीरा पन्नत्ता ? गो० ! दुविहा पण्णत्ता । तं जहा—बद्धेल्लया य मुक्केल्लया य । जहा एएसिं चेव ओरालियसरीरा तहा भाणियव्वा । [४] तेयग-कम्मगसरीरा जहा एतेसिं चेव वेउव्वियसरीरा तहा भाणियव्वा । [५] जहा असुरकुमाराणं तहा जाव थणियकुमाराणं ताव भाणियव्वं । ४२०. [१] पुढविकाइयाणं भंते ! केवइया ओरालियसरीरा पन्नत्ता ? गो० ! दुविहा पं० । तं०-बद्धेल्लया य मुक्केल्लया य । एवं जहा ओहिया ओरालियसरीरा तहा भाणियव्वा । पूढविकाइयाणं भंते ! केवइया वेउव्वियसरीरा पन्नत्ता ? गो० ! दुविहा पं० । तं०-बद्धेल्लया य मुक्केल्लया य । तत्थ णं जे ते बद्धेल्लया ते णं नत्थि । मुक्केल्लया जहा ओहिया ओरालियसरीरा तहा भाणियव्वा । आहारगसरीरा वि एवं चेव भाणियव्वा । तेयग-कम्मगसरीराणं जहा एएसिं चेव ओरालियसरीरा तहा भाणियव्वा । [२] जहा पुढविकाइयाणं एवं आउकाइयाणं तेउकाइयाण य सव्वसरीरा भाणियव्वा । [३] वाउकाइयाणं भंते ! केवइया ओरालियसरीरा पन्नत्ता ? गो० ! जहा पुढविकाइयाणं ओरालियसरीरा तहा भाणियव्वा । वाउकाइयाणं भंते ! केवतिया वेउव्वियसरीरा पन्नत्ता ? गो० ! दुविहा पं० । तं०-बद्धेल्लया य मुक्केल्लया य । तत्थ णं जे ते बद्धेल्लया ते णं असंखेज्जा समए २ अवहीरमाणा २ पलिओवमस्स असंखेज्जइभागमेत्तेणं कालेणं अवहीरंति नो चेव णं अवहिया सिया । मुक्केल्लया जहा ओहिया ओरालियमुक्केल्लया । आहारयसरीरा जहा पुढविकाइयाणं वेउव्वियसरीरा तहा भाणियव्वा । तेयग-कम्मयसरीरा जहा पुढविकाइयाणं तहा भाणियव्वा । [४] वणस्सइकाइयाणं ओरालिय-वेउव्विय-आहारगसरीरा जहा पुढविकाइयाणं तहा भाणियव्वा । वणस्सइकाइयाणं भंते ! केवइया तेयग-कम्मगसरीरा पण्णत्ता ? गो० ! जहा ओहिया तेयग-कम्मगसरीरा तहा वणस्सइकाइयाण वि तेयग-कम्मगसरीरा भाणियव्वा । ४२१. [१] बेइंदियाणं भंते ! केवइया ओरालियसरीरा पन्नत्ता ? गोतमा ! दुविहा पण्णत्ता । तं जहा—बद्धेल्लया य मुक्केल्लया य । तत्थ णं जे ते बद्धेल्लया ते णं असंखेजा असंखेज्जाहिं उस्सप्पिणी-ओसप्पिणीहिं अवहीरंति कालओ, खेत्ततो असंखेज्जाओ सेढीओ पयरस्स असंखेज्जइभागो, तासि णं सेढीणं विक्खंभसूयी असंखेज्जाओ जोयणकोडाकोडीओ असंखेज्जइं सेढिवग्गमूलाइं, बेइंदियाणं ओरालियसरीरेहिं

बद्धेल्लएहिं पयरं अवहीरइ असंखेज्जाहिं उस्सप्पिणि-ओसप्पिणीहिं कालओ, खेत्तओ अंगुलपयरस्स आवलियाए य असंखेज्जइभागपडिभागेणं । मुक्केल्लया जहा ओहिया ओरालियसरीरा तहा भाणियव्वा । वेउव्विय-आहारगसरीरा णं बद्धेल्लया नत्थि, मुक्केल्लया जहा ओरालियसरीरा ओहिया तहा भाणियव्वा । तेया कम्मगसरीरा जहा एतेसिं चव ओरालिय सरीरा तहा भाणियव्वा । [२] तहा बेइंदियाणं तहा तेइंदियाणं चउरिंदियाण वि भाणियव्वं । ४२२. [१] पंचेंदियतिरिक्खजोणियाण वि ओरालियसरीरा एवं चव भाणियव्वा । [२] पंचेंदियतिरिक्खजोणियाणं भंते ! केवइया वेउव्वियसरीरा पण्णत्ता ? गोयमा ! दुविहा पं० । तं० बद्धेल्लया य मुक्केल्लया य । तत्थ णं जे ते बद्धेल्लया ते णं असंखेज्जा असंखेज्जाहिं उस्सप्पिणि-ओसप्पिणीहिं अवहीरंति कालओ, खेत्तओ जाव विक्खंभसूयी अंगुलपढमपग्गमूलस्स असंखेज्जइभागो । मुक्केल्लया जहा ओहिया ओरालिया णं । आहारयसरीरा जहा बेइंदियाणं । तेयग-कम्मगसरीरा जहा ओरालिया । ४२३. [१] मणूसाणं भंते ! केवइया ओरालियसरीरा पन्नत्ता ? गो० ! दुविहा पण्णत्ता । तं जहा—बद्धेल्लया य मुक्केल्लया य । तत्थ णं जे ते बद्धेल्लया ते णं सिय संखेज्जा सिय असंखेज्जा, जहण्णपदे संखेज्जा—संखेज्जाओ कोडीओ, तिजमलपयस्स उवरिं चउजमलपयस्स हेट्ठा, अहवणं छट्ठो वग्गो पंचमवग्गपडुप्पण्णो, अहवणं छण्णउत्तिष्ठेयणगदाइरासी, उक्कोसपदे असंखेज्जा, असंखेज्जाहिं उस्सप्पिणी ओस्सप्पिणीहिं अवहीरंति कालओ, खेत्तओ उक्कोसपए रूवक्खित्तेहिं मणूसेहिं सेठी अवहीरति, असंखेज्जाहिं उस्सप्पिणी-ओसप्पिणीहिं कालओ, खेत्तओ अंगुलपढमवग्गमूलं ततियवग्गमूलपडुप्पण्णं । मुक्केल्लया जहा ओहिया ओरालिया णं । [२] मणूसाणं भंते ! केवतिया वेउव्वियसरीरा पण्णत्ता ? गो० ! दुविया पं० । तं०—बद्धेल्लया य मुक्केल्लया य । तत्थ णं जे ते बद्धेल्लया ते णं संखेज्जा समए २ अवहीरमाणा २ संखेज्जेणं कालेणं अवहीरंति, नो चव णं अवहिया सिया । मुक्केल्लया जहा ओहिया ओरालिया णं । [३] मणूसाणं भंते ! केवइया आहारयसरीरा पन्नत्ता ? गो० ! दुविहा पण्णत्ता । तं जहा—बद्धेल्लया य मुक्केल्लया य । तत्थ णं जे ते बद्धेल्लया ते णं सिय अत्थि सिय नत्थि, जइ अत्थि जहन्नेणं एक्को वा दो वा तिण्णि वा उक्कोसेणं सहस्सपुहत्तं । मुक्केल्लया जहा ओहिया ओरालिया णं । [४] तेयग-कम्मगसरीरा जहा एतेसिं चव ओहिया ओरालिया तहा भाणियव्वा । ४२४. [१] वाणमंतराणं ओरालियसरीरा जहा नेरइयाणं । [२] वाणमंतराणं भंते ! केवइया वेउव्वियसरीरा पन्नत्ता ? गो० ! दुविहा पं० । तं०—बद्धेल्लया य मुक्केल्लया य । तत्थ णं जे ते बद्धेल्लया ते णं असंखेज्जा, असंखेज्जाहिं उस्सप्पिणि-ओसप्पिणीहिं अवहीरंति कालतो, खेत्तओ असंखेज्जाओ सेठीओ पयरस्स असंखेज्जइभागो, तासि णं सेठीणं विक्खंभसूई संखेज्जजोयणसयवग्गपलिभागो पतरस्स । मुक्केल्लया जहा ओहिया ओरालिया णं । [३] आहारगसरीरा दुविहा वि जहा असुरकुमाराणं । [४] वाणमंतराणं भंते ! केवइया तेयग-कम्मगसरीरा पं० ? गो० ! जहा एएसिं चव वेउव्वियसरीरा तहा तेयग-कम्मगसरीरा वि भाणियव्वा । ४२५. [१] जोइसियाणं भंते ! केवइया ओरालियसरीरा पं० ? गो० ! जहा नेरइयाणं तहा भाणियव्वा । [२] जोइसियाणं भंते ! केवइया वेउव्वियसरीरा पण्णत्ता ? गो० ! दुविहा पं० । तं०-बद्धेल्लया य मुक्केल्लया य । तत्थ णं जे ते बद्धेल्लया जाव तासि णं सेठीणं विक्खंभसूची बेछप्पण्णंगुलसयवग्गपलिभागो पयरस्स । मुक्केल्लया जहा ओहियओरालिया णं । [३] आहारयसरीरा जहा नेरइयाणं तहा भाणियव्वा । [४] तेयग-कम्मगसरीरा जहा एएसिं चव वेउव्विया तहा भाणियव्वा । ४२६. [१] वेमाणियाणं भंते ! केवतिया ओरालियसरीरा पन्नत्ता ? गोयमा ! जहा नेरइयाणं तहा भाणियव्वा । [२] वेमाणियाणं भंते ! केवइया वेउव्वियसरीरा पण्णत्ता ? गो० ! दुविहा पं० । तं०-बद्धेल्लया य मुक्केल्लया य । तत्थ णं जे ते बद्धेल्लया ते णं असंखेज्जा, असंखेज्जाहिं उस्सप्पिणि-ओसप्पिणीहिं अवहीरंति कालओ, खेत्तओ असंखेज्जाओ सेठीओ पयरस्स असंखेज्जइभागो, तासि णं सेठीणं विक्खंभसूई अंगुलबितियवग्गमूलं ततियवग्गमूलपडुप्पण्णं, अहवणं अंगुलततियवग्गमूलघणप्पमाणमेत्ताओ सेठीओ । मुक्केल्लया जहा ओहिया ओरालिया णं । [३] आहारयसरीरा जहा नेरइयाणं । [४] तेयग-कम्मगसरीरा जहा एएसिं चव वेउव्वियसरीरा तहा भाणियव्व । से तं सुहुमे खेत्तपलिओवमे । से तं खेत्तपलिओवमे । से तं पलिओवमे । से तं विभागणिप्फण्णे । से तं कालप्पमाणे । ४२७. से किं तं भावप्पमाणे ? २ तिविहे पण्णत्ते । तं जहा- गुणप्पमाणे णयप्पमाणे संखप्पमाणे । ४२८. से किं तं गुणप्पमाणे ? २ दुविहे पण्णत्ते ।

तं जहा- जीवगुणप्पमाणे य अजीवगुणप्पमाणे य । ४२९. से किं तं अजीवगुणप्पमाणे ? २ पंचविहे पणत्ते । तं जहा- वण्णगुणप्पमाणे गंधगुणप्पमाणे रसगुणप्पमाणे फासगुणप्पमाणे संठाणगुणप्पमाणे । ४३०. से किं तं वण्णगुणप्पमाणे ? २ पंचविहे पणत्ते । तं०-कालवण्णगुणप्पमाणे जाव सुक्किल्लवण्णगुणप्पमाणे । से तं वण्णगुणप्पमाणे । ४३१. से किं तं गंधगुणप्पमाणे ? २ दुविहे पणत्ते । तं०-सुरभिगंधगुणप्पमाणे दुरभिगंधगुणप्पमाणे य । से तं गंधगुणप्पमाणे । ४३२. से किं तं रसगुणप्पमाणे ? २ पंचविहे पणत्ते । तं०-तित्तरसगुणप्पमाणे जाव महुररसगुणप्पमाणे । से तं रसगुणप्पमाणे । ४३३. से किं तं फासगुणप्पमाणे ? २ अट्टविहे पणत्ते । तं०-कक्खडफासगुणप्पमाणे जाव लुक्खफासगुणप्पमाणे । से तं फासगुणप्पमाणे । ४३४. से किं तं संठाणगुणप्पमाणे ? २ पंचविहे पणत्ते । तं०-परिमंडलसंठाणगुणप्पमाणे जाव आययसंठाणगुणप्पमाणे । से तं संठाणगुणप्पमाणे । से तं अजीवगुणप्पमाणे । ४३५. से किं तं जीवगुणप्पमाणे ? २ तिविहे पणत्ते । तं जहा- णाणगुणप्पमाणे दंसणगुणप्पमाणे चरित्तगुणप्पमाणे य । ४३६. से किं तं णाणगुणप्पमाणे ? २ चउव्विहे पणत्ते । तं०-पच्चक्खे अणुमाणे ओवम्मि आगमे । ४३७. से किं तं पच्चक्खे ? २ दुविहे पणत्ते । तं जहा-इंदियपच्चक्खे य णोइंदियपच्चक्खे य । ४३८. से किं तं इंदियपच्चक्खे ? २ पंचविहे पणत्ते । तं जहा-सोइंदियपच्चक्खे चक्खुरिंदियपच्चक्खे घाणिंदियपच्चक्खे जिभिंदियपच्चक्खे फासिंदियपच्चक्खे । से तं इंदियपच्चक्खे । ४३९. से किं तं णोइंदियपच्चक्खे ? २ तिविहे पं० । तं०-ओहिणाण-पच्चक्खे मणपज्जवणाणपज्जक्खे केवलणाणपच्चक्खे । से तं णोइंदियपच्चक्खे । से तं पच्चक्खे । ४४०. से किं तं अणुमाणे ? २ तिविहे पणत्ते । तं०—पुव्वं सेसवं दिट्ठसाहम्मवं । ४४१. से किं तं पुव्वं ? पुव्वं माता पुत्तं जहा नट्टं जुवाणं पुणरागतं । काई पच्छभिजाणेज्जा पुव्वलिंगेण केणइ ॥११५॥ तं जहा खत्तेण वा वणेण वा मसेण वा लंछणेण वा तिलएण वा । से तं पुव्वं । ४४२. से किं तं सेसवं ? २ पंचविहं पणत्तं । तं जहा-कज्जेणं कारणेणं गुणेणं अवयवेणं आसएणं । ४४३. से किं तं कज्जेणं ? २ संखं सट्ठेणं, भेरिं तालिएणं, वसभं ढंकिएणं, मोरं केकाइएणं, हयं हिंसिएणं, गयं गुलगुलाइएणं, रहं घणघणाइएणं । से तं कज्जेणं । ४४४. से किं तं कारणेणं ? २ तंतवो पडस्स कारणं ण पडो तंतुकारणं, वीरणा कडस्स कारणं ण कडो वीरणकारणं, मिप्पिंडो घडस्स कारणं ण घडो मिप्पिंडकारणं । से तं कारणेणं । ४४५. से किं तं गुणेणं ? २ सुवण्णं निकसेणं, पुप्फं गंधेणं, लवणं रसेणं, मदिरं आसायिएणं, वत्थं फासेणं । से तं गुणेणं । ४४६. से किं तं अवयवेणं ? २ महिसं सिंगेणं, कुक्कुडं सिहाए, हत्थिं विसाणेणं, वराहं दाढाए, मोरं पिंछेणं, आसं खुरेणं, वग्घं नहेणं, चमरं वालगंडेणं, दुपयं मणूसमाइ, चउपयं गवमादि, बहुपयं गोम्हियादि, सीहं केसरेणं, वसहं ककुहेणं, महिलं वलयबाहाए । परियरबंधेण भडं, जाणिज्जा महिलियं णिवसणेणं । सित्थेण दोणपागं, कइं च एक्काए गाहाए ॥११६॥ से तं अवयवेणं । ४४७. से किं तं आसएणं ? २ अग्गिं धूमेणं, सलिलं बलागाहिं, वुट्टं अब्भविकारेणं, कुलपुत्तंसीलसमायारेणं । इङ्गिताकारितैर्जेयैः क्रियाभिर्भाषितेन च । नेत्र-वक्त्रविकारैश्च गृह्यतेऽन्तर्गतं मनः ॥११७॥ से तं आसएणं । से तं सेसवं । ४४८. से किं तं दिट्ठसाहम्मवं ? २ दुविहं पणत्तं । तं जहा-सामन्नदिट्ठं च विसेसदिट्ठं च । ४४९. से किं तं सामण्णदिट्ठं ? २ जहा एगो पुरिसो तहा बहवे पुरिसा जहा बहवे पुरिसा तहा एगो पुरिसो, जहा एगो करिसावणो तहा बहवे करिसावणा जहा बहवे करिसावणा तहा एगो करिसावणो । से तं सामण्णदिट्ठं । ४५०. से किं तं विसेसदिट्ठं ? २ से जहाणामए केइ पुरिसे कंचि पुरिसं बहूणं पुरिसाणं मज्झे पुव्वदिट्ठं पच्चभिजाणेज्जा-अयं से पुरिसे, बहूणं वा करिसावणाणं मज्झे पुव्वदिट्ठं करिसावणं पच्चभिजाणिज्जा अयं से करिसावणे । तस्स समासतो तिविहं गहणं भवति । तं जहा-तीतकालगहणं पडुप्पण्णकालगहणं अणागतकालगहणं । ४५१. से किं तं तीतकालगहणं ? २ उत्तिणाणि वणाणि निप्पण्णसस्सं वा मेदिणिं पुण्णाणि य कुंड-सर-णदि-दीहिया-तलागाइं पासित्ता तेणं साहिज्जइ जहा-सुवुट्ठी आसि । से तं तीतकालगहणं । ४५२. से किं तं पडुप्पण्णकालगहणं ? २ साहुं गोयरग्गयं विच्छड्डियपउरभत्त-पाणं पासित्ता तेणं साहिज्जइ जहा-सुभिक्खे वट्टइ । से तं पडुप्पण्णकालगहणं । ४५३. से किं तं अणागतकालगहणं ? २ अब्भस्स निम्मलत्तं कसिणा य गिरी सविज्जुया मेहा । थणियं वाउब्भामो संझा रत्ता य णिद्धा य ॥११८॥ वारुणं वा माहिंदं वा अण्णयरं वा पसत्थं उप्पायं पासित्ता तेणं सहिज्जइ जहा-सुवुट्ठी भविस्सइ । से तं अणागतकालगहणं । ४५४. एएसिं चैव विवच्चासे तिविहं गहणं भवति । तं जहा-तीतकाल-

गहणं पडुप्पणकालगहणं अणागयकालगहणं । ४५५. से किं तं तीतकालगहणं ? नित्तणाइं वणाइं अनिप्फणसस्सं च मेतिणिं सुक्काणि य कुंड-सर-णदि-दह-तलागाइं पासित्ता तेणं साहिज्जति जहा—कुवुट्ठी आसी । से तं तीयकालगहणं । ४५६. से किं तं पडुप्पणकालगहणं ? २ साहुं गोयरग्गयं भिक्खं अलभमाणं पासित्ता तेणं साहिज्जइ जहा—दुभिक्खं वट्टइ । से तं पडुप्पणकालगहणं । ४५७. से किं तं अणागयकालगहणं ? २ अग्गेयं वा वायव्वं वा अण्णयरं वा अप्पसत्थं उप्पायं पासित्ता तेणं साहिज्जइ जहा-कुवुट्ठी भविस्सइ । से तं अणागतकालगहणं । से तं विसेसदिट्ठं । से तं दिट्ठसाहम्मवं । से तं अणुमाणे । ४५८. से किं तं ओवम्मे ? २ दुविहे पण्णत्ते । तं जहा-साहम्मोवणीते य वेहम्मोवणीते य । ४५९. से किं तं साहम्मोवणीए ? २ तिविहे पण्णत्ते । तं०-किंचि-साहम्मे पायसाहम्मे सव्वसाहम्मे य । ४६०. से किं तं किंचिसाहम्मे ? २ जहा मंदरो तहा सरिसवो जहा सरिसवो तहा मंदरो, जहा समुद्धो तहा गोप्पयं जहा गोप्पयं तहा समुद्धो, जहा आइच्चो तहा खज्जोतो, जहा खज्जोतो तहा आइच्चो, जहा चंदो तहा कुंदो जहा कुंदो तहा चंदो । से तं किंचिसाहम्मे । ४६१. से किं तं पायसाहम्मे ? २ जहा गो तहा गवयो, जहा गवयो तहा गो । से तं पायसाहम्मे । ४६२. से किं तं सव्वसाहम्मे ? सव्वसाहम्मे ओवम्मं णत्थि, तहा वि तेणेव तस्स ओवम्मं कीरइ, जहा-अरहंतेहिं अरहंतसरिसं कयं, एवं चक्कवट्टिणा चक्कवट्टिसरिसं कयं, बलदेवेण बलदेवसरिसं कयं, वासुदेवेण वासुदेवसरिसं कयं, साहुणा साहुसरिसं कयं । से तं सव्वसाहम्मे । से तं साहम्मोवणीए । ४६३. से किं तं वेहम्मोवणीए ? २ तिविहे पण्णत्ते । तं जहा- किंचिवेहम्मे पायवेहम्मे सव्ववेहम्मे । ४६४. से किं तं किंचिवेहम्मे ? २ जहा सामलेरो न तहा बाहुलेरो, जहा बाहुलेरो न तहा सामलेरो । से तं किंचिवेहम्मे । ४६५. से किं तं पायवेहम्मे ? २ जहा वायसो न तहा पायसो, जहा पायसो न तहा वायसो । से तं पायवेहम्मे । ४६६. से किं तं सव्ववेहम्मे ? सव्ववेहम्मे नत्थि, तहा वि तेणेव तस्स ओवम्मं कीरइ, जहा-णीएणं णीयसरिसं कयं, दासेणं दाससरिसं कयं, काकेण काकसरिसं कयं, साणेणं साणसरिसं कयं, पाणेणं पाणसरिसं कयं । से तं सव्ववेहम्मे । से तं वेहम्मोवणीए । से तं ओवम्मे । ४६७. से किं तं आगमे ? २ दुविहे पण्णत्ते । तं जहा-लोइए य लोगुत्तरिए य । ४६८. से किं तं लोइए ? २ जण्णं इमं अण्णाणिएहिं मिच्छादिट्ठीएहिं सच्छंदबुद्धिमतिविगप्पियं । तं जहा-भारहं रामायणं जाव चत्तारि य वेदा संगोवंगा । से तं लोइए आगमे । ४६९. से किं तं लोगुत्तरिए ? २ जं इमं अरहंतेहिं भगवंतेहिं उप्पण्णण-दंसणधरेहिं तीय-पच्चुप्पण-मणागयजाणएहिं तेलोक्कचहिय-महिय-पूइएहिं सव्वण्णूहिं सव्वदरिसीहिं पणीयं दुवालसंगं गणिपिडगं । तं जहा-आयारो जाव दिट्ठिवाओ । से तं लोगुत्तरिए आगमे । ४७०. अहवा आगमे तिविहे पण्णत्ते । तं जहा-सुत्तागमे य अत्थागमे य तदुभयागमे य । अहवा आगमे तिविहे पण्णत्ते । तं०-अत्तागमे अणंतरागमे परंपरागमे य । तित्थगराणं अत्थस्स अत्तागमे, गणहराणं सुत्तस्स अत्तागमे अत्थस्स अणंतरागमे, गणहरसीसाणं सुत्तस्स अणंतरागमे अत्थस्स परंपरागमे, तेण परं सुत्तस्स वि अत्थस्स वि णो अत्तागमे णो अणंतरागमे परंपरागमे । से तं लोगुत्तरिए । से तं आगमे । से तं णाणगुणप्पमाणे । ४७१. से किं तं दंसणगुणप्पमाणे ? २ चउव्विहे पण्णत्ते । तं जहा-चक्खुदंसणगुणप्पमाणे अचक्खुदंसणगुणप्पमाणे ओहिदंसणगुणप्पमाणे केवलदंसणगुणप्पमाणे य । चक्खुदंसणं चक्खुदंसणिस्स घड-पड-कड-रघादिएसु दव्वेसु, अचक्खुदंसणं अचक्खुदंसणिस्स आयभावे, ओहिदंसणं ओहिदंसणिस्स सव्वरूविदव्वेहिं न पुण सव्वपज्जवेहिं, केवलदंसणं केवलदंसणिस्स सव्वदव्वेहिं सव्वपज्जवेहि य । से तं दंसणगुणप्पमाणे । ४७२. से किं तं चरित्तगुणप्पमाणे ? २ पंचविहे पण्णत्ते । तं जहा- सामाइयचरित्तगुणप्पमाणे छेदोवट्ठावणियचरित्तगुणप्पमाणे परिहारविसुद्धियचरित्तगुणप्पमाणे सुहुमसंपरायचरित्तगुणप्पमाणे अहक्खायचरित्तगुणप्पमाणे । सामाइयचरित्तगुणप्पमाणे दुविहे पण्णत्ते । तं जहा-इत्तरिए य आवकहिए य । छेदोवट्ठावणियचरित्तगुणप्पमाणे दुविहे पण्णत्ते । तं जहा-सातियारे य निरतियारे य । परिहारविसुद्धियचरित्तगुणप्पमाणे दुविहे पण्णत्ते । तं जहा-णिव्विसमाणए य णिव्विट्ठकायिए य । सुहुमसंपरायचरित्तगुणप्पमाणे दुविहे पण्णत्ते । तं जहा-संकिलिस्समाणयं च विसुज्झमाणयं च । अहक्खायचरित्तगुणप्पमाणे दुविहे पण्णत्ते । तं जहा-पडिवाई य अपडिवाई य-छउमत्थे य केवलिए य । से तं चरित्तगुणप्पमाणे । से तं जीवगुणप्पमाणे । से तं गुणप्पमाणे । ४७३. से किं तं नयप्पमाणे ? २ तिविहे पण्णत्ते । तं जहा-पत्थयदिट्ठतेणं वसहिदिट्ठतेणं पएसदिट्ठतेणं । ४७४. से किं तं पत्थयदिट्ठतेणं ? २ से जहानामए केइ पुरिसे परसुं गहाय

अडविहृते गच्छेज्जा, तं च केइ पासित्ता वदेज्जा-कत्थ भवं गच्छसि ? अविसुद्धो नेगमो भणति—पत्थगस्स गच्छामि । तं च केइ छिंदमाणं पासित्ता वइज्जा-किं भवं छिंदसि ? विसुद्धतराओ नेगमो भणति-पत्थयं छिंदामि । तं च केइ तच्छेमाणं पासित्ता वदेज्जा-किं भवं तच्छेसि ? विसुद्धतराओ नेगमो भणति-पत्थयं तच्छेमि । तं च केइ उक्किरमाणं पासित्ता वदेज्जा-किं भवं उक्किरसि ? विसुद्धतराओ नेगमो भणति-पत्थयं उक्किरामि । तं च केइ [वि] लिहमाणं पासेत्ता वदेज्जा-किं भवं [वि] लिहसि ? विसुद्धतराओ नेगमो भणति-पत्थयं [वि] लिहामि । एवं विसुद्धतरागस्स नेगमस्स नामाउडितओ पत्थओ । एवमेव ववहारस्स वि । संगहस्स चितो मिओ मिज्जसमारूढो पत्थओ, उजुसुयस्स पत्थयो वि पत्थओ मिज्जं पि से पत्थओ, तिण्हं सद्दणयाणं पत्थयाहिगारजाणओ पत्थओ जस्स वा वसेणं पत्थओ निप्फज्जइ । से तं पत्थयदिट्ठंतेणं । ४७५. से किं तं वसहिदिट्ठंतेणं ? २ से जहानामए केइ पुरिसे कंचि पुरिसं वदिज्जा, कहिं भवं वससि ? तत्थ अविसुद्धो नेगमो भणइ-लोगे वसामि । लोगे तिविहे पणत्ते, तं जहा-उड्डलोए अधोलोए तिरियलोए, तेसु सव्वेसु भवं वससि ? विसुद्धतराओ नेगमो भणइ-तिरियलोए वसामि । तिरियलोए जंबुदीवादीया सयंभुरमणपज्जवसाणा असंखेज्जा दीव-समुद्दा पणत्ता, तेसु सव्वेसु भवं वससि ? विसुद्धतराओ नेगमो भणति—जंबुदीवे वसामि । जंबुदीवे दस खेत्ता पणत्ता, तं जहा-भरहे एरवए हेमवए एरणवए हरिवस्से रम्मगवस्से देवकुरा उत्तरकुरा पुव्वविदेहे अवरविदेहे, तेसु सव्वेसु भवं वससि ? विसुद्धतराओ नेगमो भणति-भरहे वसामि । भरहे वासे दुविहे पणत्ते, तं जहा-दाहिणह्ठभरहे य उत्तरह्ठभरहे य, तेसु सव्वेसु भवं वससि ? विसुद्धतराओ नेगमो भणति-दाहिणह्ठभरहे वसामि । दाहिणह्ठभरहे अणेगाइं गाम-णगर-खेड-कव्वड-मडंब-दोणमुह-पट्टणा-ऽऽगर-संवाह-सण्णिवेसाइं, तेसु सव्वेसु भवं वससि ? विसुद्धतराओ नेगमो भणति-पाडलिपुत्ते वसामि । पाडलिपुत्ते अणेगाइं गिहाइं, तेसु सव्वेसु भवं वससि ? विसुद्धतराओ नेगमो भणति-देवदत्तस्स घरे वसामि । देवदत्तस्स घरे अणेगा कोट्टगा, तेसु सव्वेसु भवं वससि ? विसुद्धतराओ नेगमो भणति-गब्भघरे वसामि । एवं विसुद्धस्स नेगमस्स वसमाणो वसति । एवमेव ववहारस्स वि । संगहस्स संथारसमारूढो वसति । उजुसुयस्स जेसु आगासपएसेसु ओगाढो तेसु वसइ । तिण्हं सद्दणयाणं आयभावे वसइ । से तं वसहिदिट्ठंतेणं । ४७६. से किं तं पदेसदिट्ठंतेणं ? २ नेगमो भणति-छण्हं पदेसो, तं जहा-धम्मपदेसो अधम्मपदेसो आगासपदेसो जीवपदेसो खंधपदेसो देसपदेसो । एवं वयंतं नेगमं संगहो भणइ-जं भणसि-छण्हं पदेसो तण्ण भवइ, कम्हा ? जम्हा जो सो देसपदेसो सो तस्सेव दव्वस्स, जहा को दिट्ठंतो ?, दासेण मे खरो कीओ दासो वि मे खरो वि मे, तं मा भणाहि-छण्हं पएसो, भणाहि पंचण्हं पएसो, तं जहा-धम्मपएसो अहम्मपएसो आगासपदेसो जीवपएसो खंधपदेसो । एवं वयंतं संगहं ववहारो भणइ-जं भणसि-पंचण्हं पएसो तं ण भवइ, कम्हा ? जइ जहा पंचण्हं गोट्टियाणं केइ दव्वजाए सामण्णे, तं जहा-हिरण्णे वा सुवण्णे वा धणे वा धण्णे वा, तो जुत्तं वत्तुं जहा पंचण्हं पएसो ?, तं मा भणाहि-पंचण्हं पएसो, भणाहि-पंचविहो पएसो, तं जहा-धम्मपदेसो अहम्मपदेसो आगासपदेसो जीवपदेसो खंधपदेसो । एवं वदंतं ववहारं उजुसुओ भणति-जं भणसि-पंचविहो पदेसो तं न भवइ, कम्हा ? जइ ते पंचविहो पएसो एवं ते एक्केक्को पएसो पंचविहो एवं ते पणुवीसतिविहो पदेसो भवति, तं मा भणाहि-पंचविहो पएसो, भणाहि-भतियव्वो पदेसो-सिया धम्मपदेसो सिया अधम्मपदेसो सिया आगासपदेसो सिया जीवपदेसो सिया खंधपदेसो । एवं वयंतं उजुसुयं संपतिसद्दणओ भणति-जं भणसि भइयव्वो पदेसो तं न भवति, कम्हा ? जइ ते भइयव्वो पदेसो एवं ते धम्मपदेसो वि सिया अधम्मपदेसो सिया आगासपदेसो सिया जीवपदेसो सिया खंधपदेसा १, अधम्मपदेसो वि सिया धम्मपदेसो सिया आगासपएसो सिया जीवपएसो सिया खंधपएसो २, आगासपएसो वि सिया धम्मपदेसो सिया अहम्मपएसो सिया जीवपएसो सिया खंधपएसो ३, जीवपएसो वि सिया धम्मपएसो सिया अधम्मपएसो सिया आगासपएसो सिया खंधपएसो ४, खंधपएसो वि सिया धम्मपदेसो सिया अधम्मपदेसो सिया आगासपदेसो सिया जीवपदेसो ५, एवं ते अणवत्था भविस्सइ, तं मा भणाहि-भइयव्वो पदेसो, भणाहि-धम्मे पदेसे से पदेसे धम्मे, अहम्मे पदेसे से पदेसे अहम्मे, आगासे पदेसे से पदेसे आगासे, जीवे पदेसे से पदेसे णोजीवे, खंधे पदेसे से पदेसे णोखंधे । एवं वयंतं सद्दणयं समभिरूढो भणति-जं भणसि-धम्मे पदेसे से पदेसे धम्मे जाव खंधे पदेसे से पदेसे नोखंधे, तं न भवइ, कम्हा ? एत्थ दो समासा भवंति, तं जहा-तप्पुरिसे य कम्मधारए य, तं

ण णज्जइ कतरेणं समासेणं भणसि ? किं तप्पुरिसेणं किं कम्मधारणं ?, जइ तप्पुरिसेणं भणसि तो मा एवं भणाहि, अह कम्मधारणं भणसि तो विसेसओ भणाहि-धम्मे य से पदेसे य से से पदेसे धम्मे, अहम्मे य से पदेसे य से से पदेसे अहम्मे, आगासे य से पदेसे य से से पदेसे आगासे, जीवे य से पदेसे य से से पदेसे नोजीवे, खंधे य से पदेसे य से से पदेसे नोखंधे । एवं वयंतं संपयं समभिरूढं एवंभूओ भणइ-जं जं भणसि तं तं सव्वं कसिणं पडिपुणं निरवसेसं एगगहणगहितं देसे वि मे अवत्थू पदसे वि मे अवत्थू । से तं पदेसदिट्ठंतेणं । से तं णयप्पमाणे । ४७७. से किं तं संखप्पमाणे ? २ अट्ठविहे पणत्ते । तं जहा-नामसंखा ठवणसंखा दव्वसंखा ओवमसंखा परिमाणसंखा जाणणासंखा गणणासंखा भावसंखा । ४७८. से किं तं नामसंखा ? २ जस्स णं जीवस्स वा अजीवस्स वा जीवाण वा अजीवाण वा तदुभयस्स वा तदुभयाण वा संखा ति णामं कज्जति । से तं नामसंखा । ४७९. से किं तं ठवणासंखा ? २ जणं कट्ठकम्मे वा पोत्थकम्मे वा चित्तकम्मे वा लेप्पकम्मे वा गंथिकम्मे वा वेढिमे वा पूरिमे वा संघाइमे वा अक्खे वा वराडए वा एक्को वा अणेगा वा सब्भावठवणाए वा असब्भावठवणाए वा संखा त्ति ठवणा ठवेज्जति । से तं ठवणासंखा । ४८०. नाम-ठवणाणं को पतिविसेसो ? नामं आवकहियं, ठवणा इत्तिरिया वा होज्जा आवकहिया वा । ४८१. से किं तं दव्वसंखा ? २ दुविहा पं० । तं०—आगमओ य नोआगमतो य । ४८२. से किं तं आगमओ दव्वसंखा ? २ जस्स णं संखा ति पदं सिक्खितं ठियं जियं मियं परिजियं जाव कंगिणह(कंठोट्ट)विप्पमुक्कं गुरुवायणोवगयं, से णं तत्थ वायणाए पुच्छणाए परियट्ठणाए धम्मकहाए, नो अणुप्पेहाए, कम्हा ? अणुवओगो दव्वमिति कट्ठ । ४८३.

[१] [णेगमस्स] एक्को अणुवउत्तो आगमतो एका दव्वसंखा, दो अणुवउत्ता आगमतो दो दव्वसंखाओ, तिन्नि अणुवउत्ता आगमतो तिन्नि दव्वसंखाओ, एवं जावतिया अणुवउत्ता तावतियाओ [णेगमस्स आगमतो] दव्वसंखाओ । [२] एवामेव ववहारस्स वि । [३] संगहस्स एको वा अणेगा वा अणुवउत्तो वा अणुवउत्ता वा [आगमओ] दव्वसंखा वा दव्वसंखाओ वा [सा एगा दव्वसंखा] । [४] उज्जुसुयस्स [एगो अणुवउत्तो] आगमओ एका दव्वसंखा, पुहत्तं णेच्छति । [५] तिण्हं सट्ठणयाणं जाणए अणुवउत्ते अवत्थू, कम्हा ? जति जाणए अणुवउत्ते ण भवति । से तं आगमओ दव्वसंखा । ४८४. से किं तं नोआगमतो दव्वसंखा ? २ तिविहा पं० । तं०-जाणयसरीरदव्वसंखा भवियसरीरदव्वसंखा जाणगसरीरभवियसरीरवतिरित्ता दव्वसंखा । ४८५. से किं तं जाणगसरीरदव्वसंखा ? २ संखा ति पयत्थाहिकारजाणगस्स जं सरीरयं ववगय-चुय-चइत-चत्तदेहं जीवविप्पजढं जाव अहो ! णं इमेणं सरीरसमूसएणं संखा ति पयं आघवितं जाव उवदंसियं, जहा को दिट्ठंतो ? अयं घयकुंभे आसि । से तं जाणगसरीरदव्वसंखा । ४८६. से किं तं भवियसरीरदव्वसंखा ? २ जे जीवे जोणीजम्मणणिक्खंते इमेणं चेव आदत्तएणं सरीरसमूसएणं जिणदिट्ठेणं भावेणं संखा ति पयं सेकाले सिक्खिस्सति, जहा को दिट्ठंतो ? अयं घयकुंभे भविस्सति । से तं भवियसरीरदव्वसंखा । ४८७. से किं तं जाणयसरीरभवियसरीरवइरित्ता दव्वसंखा ? २ तिविहा पणत्ता । तं जहा-एगभविए बद्धाउए अभिमुहणामगोत्ते य । ४८८. एगभविए णं भंते ! एगभविए त्ति कालतो केवचिरं होति ? जहण्णेणं अंतोमुहुत्तं, उक्कोसेणं पुव्वकोडी । ४८९. बद्धाउए णं भंते ! बद्धाउए त्ति कालतो केवचिरं होति ? जहण्णेणं अंतोमुहुत्तं, उक्कोसेणं पुव्वकोडीतिभागं । ४९०. अभिमुहनामगोत्ते णं भंते ! अभिमुहनामगोत्ते त्ति कालतो केवचिरं होति ? जहन्नेणं एक्कं समयं, उक्कोसेणं अंतमुहुत्तं । ४९१. रयाणिं को णओ कं संखं इच्छति ?-तत्थ णेगम-संगह-ववहारा तिविहं संखं इच्छंति, तं जहा-एक्कभवियं बद्धाउयं अभिमुहनामगोत्तं च । उजुसुओ दुविहं संखं इच्छति, तं जहा-बद्धाउयं च अभिमुहनामगोत्तं च । तिण्णि सट्ठणया अभिमुहणामगोत्तं संखं इच्छंति । से तं जाणयसरीरभवियसरीरवइरित्ता दव्वसंखा । से तं नोआगमओ दव्वसंखा । से तं दव्वसंखा । ४९२. [१] से किं तं ओवमसंखा ? २ चउव्विहा पणत्ता । तं जहा-अत्थि संतयं संतएणं उवमिज्जइ १ अत्थि संतयं असंतएणं उवमिज्जइ २ अत्थि असंतयं संतएणं उवमिज्जइ ३ अत्थि असंतयं असंतएणं उवमिज्जइ ४ । [२] तत्थ संतयं संतएणं उवमिज्जइ जहा—संता अरहंता संतएहिं पुरवरेहिं संतएहिं कवाडएहिं संतएहिं वच्छएहिं उवमिज्जंति, तं जहा- पुरवरकवाडवच्छा फलिहभुया दुंदुभित्थणियघोसा । सिरिवच्छंकिवच्छा सव्वे वि जिणा चउव्वीसं ॥११९॥ [३] संतयं असंतएणं उवमिज्जइ जहा-संताइं नेरइय-तिरिक्खजोणिय-मणूस-देवाणं आउयाइं असंतएहिं पलिओवम-सागरोवमेहिं उवमिज्जंति ।

[४] असंतयं संतएणं उवमिज्जति जहा—परिजूरियपेरंतं चलंतबेटं पडंत निच्छीरं । पत्तं वसणप्पत्तं कालपत्तं भणइ गाहं ॥१२०॥ जह तुब्भे तह अम्हे, तुम्हे वि य होहिहा जहा अम्हे । अप्पाहेति पडंतं पंडुयपत्तं किसलयाणं ॥१२१॥ णवि अत्थि णवि य होही उल्लावो किसल-पंडुपत्ताणं । उवमा खलु एस कया भवियजणविबोहणद्वाए ॥१२२। [५] असंतयं असंतएणं उवमिज्जति—जहा खरविसाणं तहा ससविसाणं । से तं ओवमसंखा । ४९३. से किं तं परिमाणसंखा ? २ दुविहा पण्णत्ता । तं०-कालियसुयपरिमाणसंखा दिट्ठिवायसुयपरिमाणसंखा य । ४९४. से किं तं कालियसुयपरिमाणसंखा ? २ अणेगविहा पण्णत्ता । तं जहा-पज्जवसंखा अक्खरसंखा संघायसंखा पदसंखा पादसंखा गाहासंखा सिलोगसंखा वेढसंखा निज्जुत्तिसंखा अणुओगदारसंखा उद्देसगसंखा अज्झयणसंखा सुयखंधसंखा अंगसंखा । से तं कालियसुयपरिमाणसंखा । ४९५. से किं तं दिट्ठिवायसुयपरिमाणसंखा ? २ अणेगविहा पण्णत्ता । तं जहा-पज्जवसंखा जाव अणुओगदारसंखा पाहुडसंखा पाहुडियासंखा पाहुडपाहुडियासंखा वत्थुसंखा पुव्वसंखा से तं दिट्ठिवायसुयपरिमाणसंखा । से तं परिमाणसंखा । ४९६. से किं तं जाणणासंखा ? २ जो जं जाणइ सो तं जाणति, तं जहा सहं सहिओ, गणियं गाणिओ, निमित्तं नेमित्तिओ, कालं कालनाणी, वेज्जो वेज्जियं । से तं जाणणासंखा । ४९७. से किं तं गणणासंखा ? २ एक्को गणणं न उवेति, दुप्पभितिसंखा । तं जहा संखेज्जए असंखेज्जए अणंतए । ४९८. से किं तं संखेज्जए ? २ तिविहे पण्णत्ते । तं जहा—जहण्णए उक्कोसए अजहण्णमणुक्कोसए । ४९९. से किं तं असंखेज्जए ? २ तिविहे पण्णत्ते । तं जहा—परित्तासंखेज्जए जुत्तासंखेज्जए असंखेज्जासंखेज्जए । ५००. से किं तं परित्तासंखेज्जए ? २ तिविहे पण्णत्ते । तं०—जहण्णए उक्कोसए अजहण्णमणुक्कोसए । ५०१. से किं तं जुत्तासंखेज्जए ? २ तिविहे पण्णत्ते । तं०—जहण्णए उक्कोसए अजहण्णमणुक्कोसए । ५०२. से किं तं असंखेज्जासंखेज्जए ? २ तिविहे पण्णत्ते । तं जहा—जहण्णए उक्कोसए अजहण्णमणुक्कोसए । ५०३. से किं तं अणंतए ? २ तिविहे पण्णत्ते । तं जहा—परित्ताणंतए जुत्ताणंतए अणंतानंतए । ५०४. से किं तं परित्ताणंतए ? २ तिविहे पण्णत्ते । तं०—जहण्णए उक्कोसए अजहण्णमणुक्कोसए । ५०५. से किं तं जुत्ताणंतए ? २ तिविहे पण्णत्ते । तं जहा—जहण्णए उक्कोसए अजहण्णमणुक्कोसए । ५०६. से किं तं अणंतानंतए ? २ दुविहे पण्णत्ते । तं जहा—जहण्णए य अजहण्णमणुक्कोसए य । ५०७. जहण्णयं संखेज्जयं केत्तियं होइ ? दोरूवाइं, तेण परं अजहण्णमणुक्कोसयाइं ठाणाइं जाव उक्कोसयं संखेज्जयं ण पावइ । ५०८. उक्कोसयं संखेज्जयं केत्तियं होइ ? उक्कोसयस्स संखेज्जयस्स परूवणं करिस्सामि—से जहानामए पल्ले सिया, एणं जोयणसयसहस्सं आयामविक्खंभेणं, तिण्णि जोयणसयसहस्साइं सोलस य सहस्साइं दोण्णि य सत्तावीसे जोयणसते तिण्णि य कोसे अट्ठावीसं च धणुसतं तेरस य अंगुलाइं अब्बंगुलयं च किंचिविसेसाहियं परिक्खेवेणं पण्णत्ते । से णं पल्ले सिद्धत्थयाणं भरिए । ततो णं तेहिं सिद्धत्थएहिं दीव-समुद्दाणं उद्दारे घेप्पति, एगे दीवे एगे समुद्दे २ एवं पक्खिप्पमाणेहिं २ जावइया णं दीव-समुद्दा तेहिं सिद्धत्थएहिं अप्फुण्णा एस णं एवतिए खेते पल्ले आइट्ठे । से णं पल्ले सिद्धत्थयाणं भरिए । ततो णं तेहिं सिद्धत्थएहिं दीव-समुद्दाणं उद्दारे घेप्पति एगे दीवे एगे समुद्दे २ एवं पाक्खिप्पमाणेहिं २ जावइया णं दीव-समुद्दा तेहिं सिद्धत्थएहिं अप्फुच्चा एस णं एवतिए खेत्ते पल्ले पढमा सलागा, एवइयाणं सलागाणं असंलप्पा लोगा भरिया तहा वि उक्कोसयं संखेज्जयं ण पावइ, जहा को दिट्ठंतो ? से जहानामए मंचे सिया आमलगाणं भरिते, तत्थ णं एगे आमलए पक्खिक्खेत्ते से माते, अण्णे वि पक्खिक्खेत्ते से वि माते, अच्चे वि पक्खिक्खेत्ते से वि माते, एवं पक्खिक्खिप्पमाणे २ होही से आमलए जम्मि पक्खिक्खेत्ते से मंचए भरिज्जिहिइ जे वि तत्थ आमलए न माहिति । ५०९. एवामेव उक्कोसए संखेज्जए रूवं पक्खिक्खत्तं जहण्णयं परित्तासंखेज्जयं भवति, तेण परं अजहण्णमणुक्कोसयाइं ठाणाइं जाव उक्कोसयं परित्तासंखेज्जयं ण पावइ । ५१०. उक्कोसयं परित्तासंखेज्जयं केत्तियं होति ? २ जहण्णयं परित्तासंखेज्जयं जहण्णयपरित्तासंखेज्जयमेत्ताणं रासीणं अण्णमण्णब्भासो रूवूणो उक्कोसयं परित्तासंखेज्जयं होति, अहवा जहन्नयं जुत्तासंखेज्जयं रूवूणं उक्कोसयं परित्तासंखेज्जयं होइ । ५११. जहन्नयं जुत्तासंखेज्जयं केत्तियं होति ? २ जहण्णयं परित्तासंखेज्जयं जहण्णयपरित्तासंखेज्जयमेत्ताणं रासीणं अण्णमण्णब्भासो पडिपुण्णो जहन्नयं जुत्तासंखेज्जयं हवति, अहवा उक्कोसए परित्तासंखेज्जए रूवं पक्खिक्खत्तं जहण्णयं जुत्तासंखेज्जयं होति, आवलिया वि तत्तिया चेव, तेण परं अजहण्णमणुक्कोसयाइं ठाणाइं जाव उक्कोसयं जुत्तासंखेज्जयं ण पावइ । ५१२. उक्कोसयं जुत्तासंखेज्जयं

केत्तियं होति ? २ जहणणएरं जुत्तासंखेज्जएणं आवलिया गुणिया अण्णमण्णम्भासो रूवूणो उक्कोसयं जुत्तासंखेज्जयं होइ, अहवा जहन्नयं असंखेज्जासंखेज्जयं रूवूणं उक्कोसयं जुत्तासंखेज्जयं होति । ५१३. जहणणयं असंखेज्जासंखेज्जयं केत्तियं होइ ? जहन्नएणं जुत्तासंखेज्जएणं आवलिया गुणिया अण्णमण्णम्भासो पडिपुण्णो जहणणयं असंखेज्जासंखेज्जयं होइ, अहवा उक्कोसए जुत्तासंखेज्जए रूवं पक्खित्तं जहणणयं असंखेज्जासंखेज्जयं होति, तेण परं अजहण्णमण्णुक्कोसयाइं ठाणाइं जाव उक्कोसयं असंखेज्जासंखेज्जयं ण पावति । ५१४. उक्कोसयं असंखेज्जासंखेज्जयं केत्तियं होति ? जहणणयं असंखेज्जासंखेज्जयं जहणणयअसंखेज्जासंखेज्जयमेत्ताणं रासीणं अण्णमण्णम्भासो रूवूणो उक्कोसयं असंखेज्जासंखेज्जयं होइ, अहवा जहणणयं परित्ताणंतयं रूवूणं उक्कोसयं असंखेज्जासंखेज्जयं होति । ५१५. जहणणयं परित्ताणंतयं केत्तियं होति ? २ जहणणयं असंखेज्जासंखेज्जयं जहणणयअसंखेज्जासंखेज्जयमेत्ताणं रासीणं अण्णमण्णम्भासो पडिपुण्णो जहणणयं परित्ताणंतयं होति, अहवा उक्कोसए असंखेज्जासंखेज्जए रूवं पक्खित्तं जहणणयं परित्ताणंतयं होइ । तेण परं अजहण्णमण्णुक्कोसयाइं ठाणाइं जाव उक्कोसयं परित्ताणंतयं ण पावइ । ५१६. उक्कोसयं परित्ताणंतयं केत्तियं होइ ? जहणणयं परित्ताणंतयं जहणणपरित्ताणंतयमेत्ताणं रासीणं अण्णमण्णम्भासो रूवूणो उक्कोसयं परित्ताणंतयं होइ, अहवा जहणणयं जुत्ताणंतयं रूवूणं उक्कोसयं परित्ताणंतयं होइ । ५१७. जहणणयं जुत्ताणंतयं केत्तियं होयति ? जहणणयं परित्ताणंतयं जहणणयपरित्ताणंतयमेत्ताणं रासीणं अण्णमण्णम्भासो पडिपुण्णो जहणणयं जुत्ताणंतयं होइ, अहवा उक्कोसए परित्ताणंतए रूवं पक्खित्तं जहन्नयं जुत्ताणंतयं होइ, अभवसिद्धिया वि तेत्तिया चैव, तेण परं अजहण्णमण्णुक्कोसयाइं ठाणाइं जाव उक्कोसयं जुत्ताणंतयं ण पावति । ५१८. उक्कोसयं जुत्ताणंतयं केत्तियं होति ? जहण्णएणं जुत्ताणंतएणं अभवसिद्धिया गुणिता अण्णमण्णम्भासो रूवूणो उक्कोसयं जुत्ताणंतयं होइ, अहवा जहणणयं अणंताणंतयं रूवूणं उक्कोसयं जुत्ताणंतयं होइ । ५१९. जहणणयं अणंताणंतयं केत्तियं होति ? जहण्णएणं जुत्ताणंतएणं अभवसिद्धिया गुणिया अण्णमण्णम्भासो पडिपुण्णो जहणणयं अणंताणंतयं होइ, अहवा उक्कोसए जुत्ताणंतए रूवं पक्खित्तं जहणणयं अणंताणंतयं होति, तेण परं अजहण्णमण्णुक्कोसयाइं ठाणाइं । से तं गण्णासंखा । ५२०. से किं तं भावसंखा ? २ जे इमे जीवा संखगइनाम-गोत्ताइं कम्माइं वेदेति । से तं भावसंखा । से तं संखप्पमाणे । से तं भावप्पमाणे । से तं पमाणे । ॥ [पमाणे त्ति पयं सम्मतं] ॥ [सुत्ताइं ५२१-५२५. वत्तव्वयादारं] ५२१. से किं तं वत्तव्वया ? २ तिविहा पण्णत्ता । तं० ससमयवत्तव्वया परसमयवत्तव्वया ससमयपरसमयवत्तव्वया । ५२२. से किं तं ससमयवत्तव्वया ? २ जत्थ णं ससमए आघविज्जति पण्णविज्जति परूविज्जति दंसिज्जति निदंसिज्जति उवदंसिज्जति । से तं ससमयवत्तव्वया । ५२३. से किं तं परसमयवत्तव्वया ? २ जत्थ णं परसमए आघविज्जति जाव उवदंसिज्जति । से तं परसमयवत्तव्वया । ५२४. से किं तं ससमयपरसमयवत्तव्वया ? २ जत्थ णं ससमए परसमए आघविज्जइ जाव उवदंसिज्जइ । से तं ससमयपरसमयवत्तव्वया । ५२५. [१] इयाणिं को णओ कं वत्तव्वयमिच्छति ? तत्थ णेगमववहारा तिविहं वत्तव्वयं इच्छंति । तं जहा—ससमयवत्तव्वयं परसमयवत्तव्वयं ससमयपरसमयवत्तव्वयं । [२] उज्जुसुओ दुविहं वत्तव्वयं इच्छति । तं जहा—ससमयवत्तव्वयं परसमयवत्तव्वयं । तत्थ णं जा सा ससमयवत्तव्वया सा ससमयं पविट्ठा, जा सा परसमयवत्तव्वया सा परसमयं पविट्ठा, तम्हा दुविहा वत्तव्वया, णत्थि तिविहा वत्तव्वया । [३] तिण्णि सद्दणया एणं ससमयवत्तव्वयं इच्छंति, नत्थि परसमयवत्तव्वया । कम्हा ? जम्हा परसमए अण्णट्ठे अहेऊ असम्भावे अकिरिया उम्मग्गे अणुवएसे मिच्छादंसणमिति कट्टु, तम्हा सव्वा ससमयवत्तव्वया, णत्थि परसमयवत्तव्वया णत्थि ससमयपरसमयवत्तव्वया । से तं वत्तव्वया । [सुत्तं ५२६. अत्थाहिगारदारं] ५२६. से किं तं अत्थाहिगारे ? २ जो जस्स अज्झयणस्स अत्थाहिगारे । तं जहा— सावज्जजोगविती १ उक्कित्तण २ गुणवओ य पडिवत्ती ३ । खलियस्स निंदणा ४ वणत्तिगिच्छ ५ गुणधारणा ६ चैव ॥१२३॥ से तं अत्थाहिगारे । [सुत्ताइं ५२७-५३३. समोयारदारं] ५२७. से किं तं समोयारे ? २ छव्विहे पण्णत्ते । तं०—णामसमोयारे ठवणसमोयारे दव्वसमोयारे खेत्तसमोयारे कालसमोयारे भावसमोयारे । ५२८. से किं तं णामसमोयारे ? नाम-ठवणाओ पुव्ववणियाओ । ५२९. से किं तं दव्वसमोयारे ? २ दुविहे पण्णत्ते । तं०-आगमतो य

णोआगमतो य । जाव से त्तं भवियसरीरदव्वसमोयारे । ५३०. [१] से किं तं जाणयसरीरभवियसरीरवइरित्ते दव्वसमोयारे ? २ तिविहे पणत्ते । तं जहा—आयसमोयारे परसमोयारे परसमोयरंति, तदुभयसमोयारे । १ सव्वदव्वा वि य णं आयसमोयारेणं आयभावे समोयरंति, परसमोयारेणं जहा कुंडे बदराणि, तदुभयसमोयारेणं जहा घरे थंभो आयभावे य जहा घडे गीवा आयभावे य । [२] अहवा जाणयसरीरभवियसरीरवइरित्ते दव्वसमोयारे दुविहे पणत्ते । तं जहा—आयसमोयारे य तदुभयसमोयारे य । चउसट्ठिया आयसमोयारेणं आयभावे समोयरति, तदुभयसमोयारेणं बत्तीसियाए समोयरति आयभावे य । बत्तीसिया आयसमोयारेणं आयभावे समोयरति, तदुभयसमोयारेणं सोलसियाए समोयरति आयभावे य । सोलसिया आयसमोयारेणं आयभावे समोयरति, तदुभयसमोयारेणं अट्ठभाइयाए समोयरति आयभावे य । अट्ठभाइयाआयभावे य । चउभाइया आयसमोयारेणंआयभावे य । अब्दमाणीय । से तं जाणयसरीरभवियसरीरवतिरित्ते दव्वसमोयारे । से तं नोआगमओ दव्वसमोयारे । से तं दव्वसमोयारे । ५३१. से किं तं खेत्तसमोयारे ? २ दुविहे पणत्ते । तं जहा—आय-समोयारे य तदुभयसमोयारे य । भरहे वासे आयसमोयारेणं आयभावे समोयरति, तदुभयसमोयारेणं जंबुद्दीवे समोयरति आयभावे य । जंबुद्दीवे दीवे आयसमोयारेणं आयभावे समोयरति, तदुभयसमोयारेणं तिरियलोए समोयरति आयभावे य । तिरियलोए आयसमोयारेणं आयभावे समोयरति, तदुभयसमोयारेणं लोए समोयरति आयभावे य; लोए आयसमोयारेणं आयभावे समोयरति, तदुभयसमोयारेणं अलोए समोयरति आयभावे य । से तं खेत्तसमोयारे । ५३२. से किं तं कालसमोयारे ? २ दुविहे पणत्ते । तं— आयसमोयारे य तदुभयसमोयारे य । समए आयसमोयारेणं आयभावे समोयरति, तदुभयसमोयारेणं आवलियाए समोयरति आयभावे य । एवं आणापाणू थोवे लवे मुहुत्ते अहोरत्ते पक्खे मासे उऊ अयणे संवच्छरे जुगे वाससते वाससहस्से वाससतसहस्से पुव्वंगे पुव्वे तुडियंगे तुडिए अडडंगे अडडे अववंगे अववे हुहुयंगे हुहुए उप्पलंगे उप्पले पउमंगे पउमे णल्लिणंगे णल्लिणे अत्थिनिउरंगे अत्थिनिउरे अउयंगे अउए णउयंगे णउए पउयंगे पउए चूलियंगे चूलिया सीसपहेलियंगे सीसपहेलिया पलिओवमे । सागरोवमे आयसमोयारेणं आयभावे समोतरति, तदुभयसमोयारेणं ओसप्पिणि-उस्सप्पिणीसु समोयरति आयभावे य; ओसप्पिणि-उस्सप्पिणीओ आयसमोयारेणं आयभावे समोयरंति, तदुभयसमोयारेणं पोग्गलपरियट्ठे समोयरंति आयभावे य । पोग्गलपरियट्ठे आयसमोयारेणं आयभावे समोयरति, तदुभयसमोयारेणं तीतद्धा-अणागतद्धासु समोयरति आयभावे य; तीतद्धा-अणागतद्धाओ आयसमोयारेणं आयभावे समोतरंति, तदुभयसमोयारेणं सव्वद्धाए समोयरंति आयभावे य । से तं कालसमोयारे । ५३३. से किं तं भावसमोयारे ? २ दुविहे पणत्ते । तं जहा-आयसमोयारे य तदुभयसमोयारे य । कोहे आयसमोयारेणं आयभावे समोयरति, तदुभयसमोयारेणं माणे समोयरति आयभावे य । एवं माणे माया लोभे रागे । मोहणिज्जे अट्ठकम्मपगडीओ आयसमोयारेण आयभावे समोयरंति, छव्विहे तदुभयसमोयारेणं भावे समोयरति आयभावे य । एवं जीवे । जीवत्थिकाए आयसमोयारेणं आयभावे समोयरति, तदुभयसमोयारेणं सव्वदव्वेसु समोयरति आयभावे य । एत्थं संगहणिगाहा— कोहे माणे माया लोभे रागे य मोहणिज्जे य । पगडी भावे जीवे जीवत्थिय सव्वदव्वा य ॥ १२४ ॥ से तं भावसमोयारे । से तं समोयारे । से तं उवक्कमे । ११ [उपक्रम इति प्रथमं द्वारमतिक्रान्तम्] ॥ [सुत्ताइं ५३४-६००. निक्खेवदारं] ५३४. से किं तं निक्खेवे ? २ तिविहे पणत्ते । तं जहा ओहविप्फण्णे य नामनिप्फण्णे य सुत्तालावगनिप्फण्णे य । ५३५. से किं तं ओहनिप्फण्णे ? २ चउव्विहे पणत्ते । तं जहा— अज्झयणे अज्झीणे आए झवणा । ५३६. से किं तं अज्झयणे ? २ चउव्विहे पणत्ते । तं जहा—णामज्झयणे ठवणज्झयणे दव्वज्झयणे भावज्झयणे । ५३७. णाम-ठवणाओ पुव्ववण्णियाओ । ५३८. से किं तं दव्वज्झयणे ? २ दुविहे पणत्ते । तं जहा-आगमओ य णोआगमओ य । ५३९. से किं तं आगमतो दव्वज्झयणे ? २ जस्स णं अज्झयणे त्ति पदं सिक्खितं ठितं जितं मितं परिजितं जाव जावइया अणुवउत्ता आगमओ तावइयाइं दव्वज्झयणाइं । एवमेव ववहारस्स वि । संगहस्स णं एगो वा अणेगो वा तं चेव भाणियव्वं जाव से तं आगमतो दव्वज्झयणे । ५४०. से किं तं णोआगमतो दव्वज्झयणे ? २ तिविहे पणत्ते । तंजहा—जाणयसरीरदव्वज्झयणे भवियसरीरदव्वज्झयणे जाणयसरीरभवियसरीरवतिरित्ते दव्वज्झयणे । ५४१. से किं तं जाणयस्स जं सरीरयं ववगत-चुत-चइय-चत्तदेहं जाव अहो ! णं इमेणं सरीरसमुस्सएणं अज्झयणे

त्ति पदं आघवियं जाव उवदंसियं ति, जहा को दिट्ठंतो ? अयं घयकुंभे आसी, अयं महुकुंभे आसी । से तं जाणयसरीरदव्वज्झयणे । ५४२. से किं तं भवियसरीरदव्वज्झयणे ? २ जे जीवे जोणीजम्मणनिकखंतं इमेणं चव आदत्तएणं सरिरसमुस्सएणं जिणदिट्ठेणं भावेणं अज्झयणे त्ति पयं सेयंकाले सिक्खिस्सति ण ताव सिक्खति, जहा को दिट्ठंतो ? अयं घयकुंभे भविस्सति, अयं महुकुंभे भविस्सति । से तं भवियसरीरदव्वज्झयणे । ५४३. से किं तं जाणयसरीरभवियसरीरवइरित्ते दव्वज्झयणे ? २ पत्तय-पोत्थयलिहियं । से तं जाणयसरीरभवियसरीरवइरित्ते दव्वज्झयणे । से तं णोआगमओ दव्वज्झयणे । से तं दव्वज्झयणे । ५४४. से किं तं भावज्झयणे ? २ दुविहे पण्णत्ते । तं जहा— आगमतो य णोआगमतो य । ५४५. से किं तं आगमतोभावज्झयणे ? २ जाणए उवउत्ते । से तं आगमतो भावज्झयणे । ५४६. से किं तं नोआगमतो भावज्झयणे ? २ अज्झप्पस्साऽऽणयणं, कम्मणं अवचओ उवचियाणं । अणुवचओ य नवाणं, तम्हा अज्झयणमिच्छंति ॥१२५॥ से तं णोआगमतो भावज्झयणे । से तं भावज्झयणे । से तं अज्झयणे । ५४७. से किं तं अज्झीणे ? २ चउव्विहे पण्णत्ते । तं जहा— णामज्झीणे ठवणज्झीणे दव्वज्झीणे भावज्झीणे । ५४८. नाम-ठवणाओ पुव्ववणियाओ । ५४९. से किं तं दव्वज्झीणे ? २ दुविहे पण्णत्ते । तं—आगमतो य नोआगमतो य । ५५०. से किं तं आगमतो दव्वज्झीणे ? २ जस्स णं अज्झीणे त्ति पदं सिक्खितं ठितं जितं मितं परिजितं तं चव जहा दव्वज्झयणे तहा भाणियव्वं, जाव से तं आगमतो दव्वज्झीणे । ५५१. से किं तं नोआगमतो दव्वज्झीणे ? २ तिविहे पण्णत्ते । तं जहा— जाणयसरीरदव्वज्झीणे भवियसरीरदव्वज्झीणे जाणयसरीरभवियसरीरवतित्ते दव्वज्झीणे । ५५२. से किं तं जाणयसरीरदव्वज्झीणे ? २ अज्झीणपयत्थाहिकारजाणयस्स जं सरीरयं ववगय-चुत-चइत-चतदेहं जहा दव्वज्झयणे तहा भाणियव्वं, जाव से तं जाणयसरीरदव्वज्झीणे । ५५३. से किं तं भवियसरीरदव्वज्झीणे ? २ जे जीवे जोणीजम्मणनिकखंतं जहा दव्वज्झयणे, जाव से तं भवियसरीरदव्वज्झीणे । ५५४. से किं तं जाणयसरीरभवियसरीरवइरित्ते दव्वज्झीणे ? २ सव्वागाससेठी । से तं जाणयसरीरभवियसरीरवइरित्ते दव्वज्झीणे । से तं नोआगमओ दव्वज्झीणे । से तं दव्वज्झीणे । ५५५. से किं तं भावज्झीणे ? २ दुविहे पण्णत्ते । तं जहा— आगमतो य नोआगमतो य । ५५६. से किं तं आगमतो भावज्झीणे ? २ जाणए उवउत्ते । से तं आगमतो भावज्झीणे । ५५७. से किं तं नोआगमतो भावज्झीणे ? २ जह दीवा दीवसतं पइप्पए, दिप्पए य सो दीवो । दीवसमा आयरिया दिप्पंति, परं च दीवेंति ॥१२६॥ से तं नोआगमतो भावज्झीणे । से तं भावज्झीणे । से तं अज्झीणे । ५५८. से किं तं आए ? २ चउव्विहे पण्णत्ते । तं जहा—नामाए ठवणाए दव्वाए भावाए । ५५९. नाम-ठवणाओ पुव्वभणियाओ । ५६०. से किं तं दव्वाए ? २ दुविहे पण्णत्ते । तं जहा— आगमतो य नोआगमतो य । ५६१. से किं तं आगमतो दव्वाए ? जस्स णं आए त्ति पयं सिक्खितं ठितं जाव अणुवओगो दव्वगिति कट्ठु, जाव जावइया अणुवउत्ता आगमओ तावइया ते दव्वाया, जाव से तं आगमओ दव्वाए । ५६२. से किं तं नोआगमओ दव्वाए ? २ तिविहे पण्णत्ते । तं जहा— जाणयसरीरदव्वाए भवियसरीरदव्वाए जाणयसरीरभवियसरीरवइरित्ते दव्वाए । ५६३. से किं तं जाणयसरीरदव्वाए ? २ आयपयत्थाहिकारजाणगस्स जं सरीरगं ववगय-चुत-चितिय-चत्तदेहं सेसं जहा दव्वज्झयणे, जाव से तं जाणयसरीरदव्वाए । ५६४. से किं तं भवियसरीरदव्वाये ? २ जे जीवे जोणीजम्मणनिकखंतं सेसं जहा दव्वज्झयणे, जाव से तं भवियसरीरदव्वाये । ५६५. से किं तं जाणयसरीरभवियसरीरवइरित्ते दव्वाये ? २ तिविहे पण्णत्ते । तं जहा— लोइए कुप्पावयणिए लोगुत्तरिए । ५६६. से किं तं लोइए ? २ तिविहे पण्णत्ते । तं जहा—सचित्ते अचित्ते मीसए य । ५६७. से किं तं सचित्ते ? २ तिविहे पण्णत्ते । तं जहा—दुपयाणं चउप्पयाणं अपयाणं । दुपयाणं दासाणं दासीणं, चउप्पयाणं आसाणं हत्थीणं, अपयाणं अंबाणं अंबाडगाणं आए । से तं सचित्ते । ५६८. से किं तं अचित्ते ? २ सुवण्ण-रयत-मणि-मोत्तिय-संख-सिलप्पवाल-रत्तरयाणं [संतसावएज्जस्स] आये । से तं अचित्ते । ५६९. से किं तं मीसए ? २ दासाणं दासीणं आसाणं हत्थीणं समाभरियाउज्जालंकियाणं आये । से तं मीसए । से तं लोइए । ५७०. से किं तं कुप्पावयणिये ? २ तिविहे पण्णत्ते । तं जहा—सचित्ते अचित्ते मीसए य । तिण्णि वि जहा लोइए, जाव से तं कुप्पावयणिए । ५७१. से किं तं लोगुत्तरिए ? तिविहे पण्णत्ते । तं जहा— सचित्ते अचित्ते मीसए य । ५७२. से किं तं सचित्ते ? २ सीसाणं सिस्सिणियाणं आये । से तं सचित्ते । ५७३. से किं तं सचित्ते ? २ पडिग्गहाणं वत्थाणं कंबलाणं

पायपुंछणाणं आए । से किं तं अचित्ते । ५७४. से किं तं मीसए ? २ सीसाणं सिस्सिणियाणं सभंडोवकरणाणं आये । से तं मीसए । से तं लोगुत्तरिए । से तं जाणयसरीरभवियसरीरवइरित्ते दव्वाए । से तं नोआगमओ दव्वाए । से तं दव्वाए । ५७५. से किं तं भावाए ? २ दुविहे पण्णत्ते । तं जहा—आगमतो य नोआगमतो य । ५७६. से किं तं आगमतो भावाए ? २ जाणए उवउत्ते । से तं आगमतो भावाए । ५७७. से किं तं नोआगमतो भावाए ? २ दुविहे पण्णत्ते । तं जहा—पसत्थे य अप्पसत्थे य । ५७८. से किं तं पसत्थे ? २ तिविहे पण्णत्ते । तं जहा णाणाए दंसणाए चरित्ताए । से तं पसत्थे । ५७९. से किं तं अपसत्थे ? २ चउव्विहे पण्णत्ते । तं जहा कोहाए माणाए मायाए लोभाए । से तं अपसत्थे । से तं णोआगमतो भावाए । से तं भावाए । से तं आये । ५८०. से किं तं झवणा ? २ चउव्विहा पण्णत्ता । तं जहा नामज्झवणा ठवणज्झवणा दव्वज्झवणा भावज्झवणा । ५८१. नाम—ठवणाओ पुव्वभणियाओ । ५८२. से किं तं दव्वज्झवणा ? २ दुविहा पण्णत्ता । तं जहा आगमतो य नोआगमतो य । ५८३. से किं तं आगमतो दव्वज्झवणा ? २ जस्स णं झवणेति पदं सिक्खियं ठितं जितं मितं परिजियं, सेसं जहा दव्वज्झवणे तथा भाणियव्वं, जाव से तं आगमतो दव्वज्झवणा । ५८४. से किं तं नोआगमओ दव्वज्झवणा ? २ तिविहा पण्णत्ता । तं जहा—जाणयसरीरदव्वज्झवणा भवियसरीरदव्वज्झवणा जाणयसरीरभवियसरीरवइरित्ता दव्वज्झवणा । ५८५. से किं तं जाणयसरीरदव्वज्झवणा ? २ झवणापयत्थाहिकारजाणयस्स जं सरीरयं ववगय-चुय-चइय-चत्तदेहं, सेसं जहा दव्वज्झयणे, जाव य से तं जाणयसरीरदव्वज्झवणा । ५८६. से किं तं भवियसरीरदव्वज्झवणा ? २ जे जीवे जोणीजम्मणणिकखंते आयत्तएणं ० जिणदिट्ठेणं भावेणं ज्झवण त्ति पयं सेयकाले सिक्खिस्सति, ण ताव सिक्खइ, को दिट्ठंतो ? जहा अयं घयकुंभे भविस्सति, अयं महुकुंभे भविस्सति । से तं भवियसरीरदव्वज्झवणा । ५८७. से किं तं जाणयसरीरभवियसरीरवइरित्ता दव्वज्झवणा ? २ जहा जाणयसरीरभवियसरीरवइरित्ते दव्वाए तथा भाणियव्वा, जाव से तं जाणयसरीरभवियसरीरवइरित्ता दव्वज्झवणा । से तं नोआगमओ दव्वज्झवणा । से तं दव्वज्झवणा । ५८८. से किं तं भावज्झवणा ? २ दुविहा पण्णत्ता । तं जहा-आगमतो य णोआगमतो य । ५८९. से किं तं आगमओ भावज्झवणा ? २ झवणापयत्थाहिकारजाणए उवउत्ते । से तं आगमतो भावज्झवणा । ५९०. से किं तं णोआगमतो भावज्झवणा ? २ दुविहा पण्णत्ता । तं जहा-पसत्था य अप्पसत्था य । ५९१. से किं तं पसत्था ? २ चउव्विहा पण्णत्ता । तं जहा-कोहज्झवणा माणज्झवणा मायज्झवणा लोभज्झवणा । से तं पसत्था । ५९२. से किं तं अप्पसत्था ? २ तिविहा पण्णत्ता । तं जहा-नाणज्झवणा दंसणज्झवणा चरित्तज्झवणा । से तं अप्पसत्था । से तं नोआगमतो भावज्झवणा । से तं भावज्झवणा । से तं झवणा । से तं ओहनिप्फण्णे । ५९३. से किं तं नामनिप्फण्णे ? २ सामइए । से समासओ चउव्विहे पण्णत्ते । तं जहा-णामसामाइए ठवणासामाइए दव्वसामाइए भावसामाइए । ५९४. णाम-ठवणाओ पुव्वभणियाओ । ५९५. दव्वसामाइए वि तहेव, जाव से तं भवियसरीरदव्वसामाइए । ५९६. से किं तं जाणयसरीरभवियसरीरवइरित्ते दव्वसामाइए ? २ पत्तय-पोत्थयलिहियं । से तं जाणयसरीरभवियसरीरवइरित्ते दव्वसामाइए । से तं णोआगमतो दव्वसामाइए । से तं दव्वसामाइए । ५९७. से किं तं भावसामाइए ? २ दुविहे पण्णत्ते । तं-आगमतो य नोआगमतो य । ५९८. से किं तं आगमतो भावसामाइए ? २ भावसामाइयपयत्थाहिकारजाणए उवउत्ते । से तं आगमतो भावसामाइए । ५९९. से किं तं नोआगमतो भावसामाइए ? २ जस्स सामाणिओ अप्पा संजमे णियवे तवे । तस्स सामाइयं होइ, इइ केवलिभासियं ॥१२७॥ जो समो सव्वभूएसु तसेसुं थावरेसु य । तस्स सामाइयं होइ, इइ केवलिभासियं ॥१२८॥ जह मम ण पियं दुक्खं जाणिय एमेव सव्वजीवाणं । न हणइ न हणावेइ य सममणती तेण सो समणो ॥१२९॥ णत्थि य से कोइ वेसो पिओ व सव्वेसु चेव जीवेसु । एएण होइ समणो, एसो अन्नो वि पज्जाओ ॥१३०॥ उरग-गिरि-जलण-सागर-नहतल-तरुणसमो य जो इ । भमर-मिग-धरणि-जलरुह-रवि-पवणसमो य सो समणो ॥१३१॥ तो समणो जइ सुमणो, भावेण य जइ ण होइ पावमणो । सयणे य जणे य समो, समो य माणाऽवमाणेसु ॥१३२॥ से तं नोआगमतो भावसाभाइए । से तं भावसामाइए । से तं सामाइए । से तं नामनिप्फण्णे । ६००. से किं तं सुत्तालावगनिप्फण्णे ? २ इदाणिं सुत्तालावगनिप्फण्णे निक्खेवे इच्छावेइ, से य पत्तलक्खणे वि ण णिक्खिप्पइ, कम्हा ? लाघवत्थ । इतो अत्थि ततिये अणुओगदारे अणुगमे त्ति, तहिं णं णिक्खित्ते इहं णिक्खित्ते भवति, इहं वा णिक्खित्ते

तहिं णिक्खित्ते भवति, तम्हा इहं ण णिक्खिप्पइ तहिं चेव णिक्खिप्पिस्सइत्त । से तं निक्खेवे । [सुत्ताइं ६०१-०६०५. अणुगमदारं] ६०१. से किं तं अणुगमे ? २ दुविहे पण्णत्ते । तं जहा-सुत्ताणुगमे य निज्जुत्तिअणुगमे य । ६०२. से किं तं निज्जुत्तिअणुगमे ? २ तिविहे पण्णत्ते । तं जहा- निक्खेवनिज्जुत्तिअणुगमे उवघातनिज्जुत्तिअणुगमे सुत्तप्फासियनिज्जुत्तिअणुगमे । ६०३. से किं तं निक्खेवनिज्जुत्तिअणुगमे ? २ अणुगए । ६०४. से किं तं उवघायनिज्जुत्तिअणुगमे ? २ इमाहिं दोहिं गाहाहिं अणुगंतव्वे । तं जहा- उद्देसे १ निद्देसे य २ निग्गमे ३ खेत्त ४ काल ५ पुरिसे य ६ । कारण ७ पच्चय ८ लक्खण ९ णये १० समयारणा ११ ऽणुमए १२ ॥१३३॥ किं १३ कइविहं १४ कस्स १५ कहिं १६ केसु १७ कहं १८ किच्चिरं हवइ कालं १९ । कइ २० संतर २१ मविरहितं २२ भवा २३ ऽऽगरिस २४ फासण २५ निरुत्ती २६ ॥१३४॥ से तं उवघातनिज्जुत्तिअणुगमे । ६०५. से किं तं सुत्तप्फासियनिज्जुत्तिअणुगमे ? २ सुत्तं उच्चारयेव्वं अखिलियं अमिलियं अविच्चामेलियं पडिपुण्णं पडिपुण्णघोसं कंठोद्धविप्पमुक्कं गुरुवायणोवगयं । तो तत्थ णज्जिहिति ससमयपयं वा परसमयपयं वा बंधपयं वा मोक्खपयं वा सामाइयपयं वा णोसामाइयपयं वा । तो तम्मि उच्चारिते समाणे केसिंचि भगवंताणं केइ अत्थाहिगारा अहिगया भवंति, केसिंचि य केइ अणहिगया भवंति, ततो तेसिं अणहिगयाणं अत्थाणं अभिगमणत्थाए पदेणं पदं वत्तइस्सामि— संहिता य पदं चेव पदत्थो पदविग्गहो । चालणा य पसिद्धी य, छव्विहं विद्धि लक्खणं ॥१३५॥ से तं सुत्तप्फासियनिज्जुत्तिअणुगमे । से तं निज्जुत्तिअणुगमे । से तं अणुगमे । [सुत्तं ६०६. णयदारं] ६०६. से किं तं णए ? सत्त मूलणया पण्णत्ता । तं जहा-णेगमे संगहे ववहारे उज्जुसुए सद्दे समभिरूढे एवंभूते । तत्थ- णेगेहिं माणेहिं मिणइ ती णेगमस्स य निरुत्ती १ । सेसाणं पि नयाणं लक्खणमिणमो सुणह वोच्छं ॥१३६॥ संगहियपिंडियत्थं संगहवयणं समासओ बेत्ति २ । वच्चइ विणिच्छियत्थं ववहारो सव्वदव्वेसुं ३ ॥१३७॥ पच्चुप्पन्नगाही उज्जुसुओ णयविही मुणेयव्वो ४ । इच्छइ विसेसियतरं पच्चुप्पणं णओ सद्दो ५ ॥१३८॥ वत्थूओ संकमणं होइ अवत्थुं णये समभिरूढे ६ । वंजण-अत्थ-तदुभयं एवंभूओ विसेसेइ ७ ॥१३९॥ णायम्मि गिण्हियव्वे अगिण्हियव्वम्मि चेव अत्थम्मि । जइयव्वमेव इइ जो उवएसो सो नओ नाम ॥१४०॥ सव्वेसिं पि नयाणं बहुविहवत्तव्वयं निसामेत्ता । तं सव्वनयविसुद्धं जं चरणगुणट्ठिओ साहू ॥१४१॥ से तं नए । [॥ अणुओगदाराइं सम्मत्ताइं ॥] सोलससयाणि चउरुत्तराणि गाहाण जाण सव्वग्गं । दुसहस्समणुडुभछंदवित्तपरिमाणओ भणियं ॥१४२॥ नगरमहादारा इव कम्मदाराणुओगवरदारा । अक्खर-पिंदू-मत्ता लिहिया दुक्खक्खयट्ठाए ॥१४३॥ *५५५॥ णमो त्थु णं समणस्स भगवओ महइमहावीरवद्धमाणसामिस्स ॥ णमो अणुओगघराणं थेराणं । भगवंसिरिसामज्जवायगविरइयं ५५५